

**MAATIU'**  
**Bakaang Tampara Doorenang**  
**Jiisuu' Karistoo'koong**  
**Kara Baavootunanka**  
**Ane'kooning**

1:1 Jiisuu' Kansi'koo Pou'na'

4:17 Jiisuu'ke Nantoong Kumponing-koo  
Tampa' Doorevuru'na' Taare-antavurima

9:35 Jiisuu'ke Bakaning Barevare-nupoong  
Mintoong-koo Botovuru'na'

11:1 Jiisuu' Baa Masikung?

16:21 Jiisuu'ke Bakaang Aarumo Bare-  
antavuru'na' Boaina'mung Due'uko

21:1 Jiisuu'ke Nantoong Asi'noo' Nau-  
antavuru'na' Jerusalema'

26:1 Jiisuu' Siskeera Tora'antavai Dupisi'aako  
Napo' Domamparu'na'

**Jiisuu' Kansi'koo Pou'na'**

(1:1-4:16)

*Jiisuu' Bakakatauro-koong Mirinanka  
(Luk 3:23-38)*

<sup>1</sup> Aung ane' tee Jiisuu' Karistoo'  
bakanarempo'koong mirinanka otoing, tee  
ee'nung Deevita' bakanaving-koong, tee Deevita'  
napo' tee Eebaraami' bakanaving-koong.

<sup>2</sup> Eebaraami' tee Aisake' bauma.  
Aisake' napo' tee Jeekopi' bauma.  
Jeekopi' tee Juda bauma batatakaampi ee'noko  
baara'mainkaang ninka nari'.

- <sup>3</sup> Juda tee Peeresi namainta Siira beuma. Beuko  
teni Teemaa.  
Peeresi tee Eesirong bauma.  
Eesirong napo' tee Arami' bauma.  
<sup>4</sup> Arami' tee Aminadapi' bauma.  
Aminadapi' tee Naasoni bauma.  
Naasoni tee Salamong bauma.  
<sup>5</sup> Salamong tee Booasi bauma, bauko teni Reeap.  
Booasi tee Oobete' bauma, teie bauko teni Rut.  
Oobete' tee Jeese' bauma. Ee'noko  
<sup>6</sup> Jeese' tee Deevita' bauma, tee daurarong~. Napo'  
Deevita' tee Solomoni' bauma, bauko teni ee'nani  
tutung Uraia ba'aang.  
<sup>7</sup> Solomoni' tee Reaboam bauma.  
Reaboam tee Abaisia' bauma.  
Abaisia' tee Eesa bauma.  
<sup>8</sup> Eesa tee Jeosapata bauma.  
Jeosapata tee Jooram bauma.  
Joram tee Usaia bauma.  
<sup>9</sup> Usaia tee Jootam bauma.  
Jootam tee Eeasi bauma.  
Eeasi tee Esekaia bauma.  
<sup>10</sup> Esekaia tee Manase bauma.  
Manase tee Aamon bauma.  
Aamon tee Josaia bauma.  
<sup>11</sup> Josaia tee Jekonaia bauma, ee'noko  
baara'mainkaang. Tekang ninka nari' mmau'  
Ju'nupoong Babiloni'nameensi'aape berou'  
kiimata-koo.  
<sup>12</sup> Babiloni'aape berou'noo'keta  
Jekonaia tee Sialeteale bauma deemparu'.  
Sialeteale tee Serababele bauma.  
<sup>13</sup> Serababele tee Abaiutu' bauma.  
Abaiutu' tee Elaiakim bauma.  
Elaiakim tee Eesoo bauma.

**14** Eesoo tee Siedoko bauma.  
Siedoko tee Eekim bauma.  
Eekim tee Elaitu' bauma.

**15** Elaitu' tee Eliesa' bauma.  
Eliesa' tee Mataani' bauma.  
Mataani' tee Jeekopi' bauma.

**16** Jeekopi' tee Josepa' bauma.  
Josepa' tee Meeri' ba'ung, teni Jiisuu'  
paravuu'nani, tee ee'nung Kumponinge  
Pako'pari'ni'i tampaamaung, Karistoo'!

**17** Aing teing avantevaranoo' kivora-ita  
karenaumo-koo basi Eebaraami'keta Deevita'koo  
basinoo', ee'noko teketa napo' kivora-ita  
karenaumo-navarantu otorou' Babiloni'ke  
kiimatavariri otorou'noo' basinoo'koo. Ee'noko  
teketa napo' kivora-ita karenaumo-navarantu  
depeto tee Kumponinge Pako'pari'ni'i'koo  
basinoo'koo.

*Jiisuu' Meeri'ke Paravuu'na'*  
*(Luk 2:1-7)*

**18** Enang tee' ee' nkoarara Jiisuu' Karistoo'  
ponto'aru'na'. Teni bauko Meeri' teni Josepa'koo  
miru'ni'i'nani, teka mme' nari' otorea' teni  
tooto'po'nani deemparu' ta'nina' Tanuaang  
Meekung bakaang iri'ke.

**19** Teketa teie Josepa'ke, teni-koo miru'ni'i'ke  
teni tooto'po'nani tasi'pura koonto'na' nko-koo  
noru'ari beekaang navunavu toto'koo mau'aru',  
teka makenge nko-koo piavou' ookara-koo  
sira'puko maia'o'neeng-koo teni.

**20** Teka tee' noru'arara otoko koosinung~  
narung Ovoring bakaang noone-koo tee-ankoi  
oro'paru' ee'noko aa'puu', "Josepa', Deevita'  
bauring, aroreauka' Meeri' boku-koo da'aang

deemparaa'naang, ai' tee tooto' teni-koo poontoaring~ tee Tanuaang Meekung-etaing.

<sup>21</sup> Tenie tee tooto' donkaani paravuaining, ee'noko dake tee miring Jiisuu'\* tampeaing, ai' teie tee bakaning nantoong biikaning orara aarumonanka-itaa moo'uriaing."

<sup>22</sup> Aing ookara kapoo'nanka nkoaru'noo' tee kapoo' Ovoringe tero nakaronara~ karantavuma~ nauvuu'nung masika'paraa'naang, ee' oro':

<sup>23</sup> "Teni kuukuma~ teni tooto'po'nani deemparara narung donkaani paravuai, ee'noko teinge ee'pina' tampaavaing, 'Imanuela!', miru'noo' tee 'Kumponing nii' ninka nari' otong.' "

(Aisaia' 7:14)

<sup>24</sup> Tenang Josepa'tanteearara tee' nari' teie koosinunge Ovoring bakaange botovuu'na' bera Meeri' bokuvuu' ba'aang deemparaa'naang.

<sup>25</sup> Teka teie tamung tanatavuu' bera tenie tee tooto' donkaani paravuu'noo'keta dama'ke nampuu'. Ee'noko tee tooto' miring Jiisuu' tampuu'.

## 2

### *Norukasi'nukai Jiisuu' Beero'au'na'*

<sup>1</sup> Teketa tee Jiisuu' ponto'ario' teke Beeteleema'ke Judia'koonoo'ke tenang tee daurarong~ Eeroti' otoko'nang nii'ning norukasi'nuka duaa' bakoaramanoo'keta Jerusalema'porou'. Porora nia'kaama aa'paako',

---

\* <sup>1:21:</sup> Iliburu-nupoong biikaang kara-koo tee miring "Iesua" tee "Kumponing niikaang Domang-anta" miru'ari otong; tee Jiisuu' tampampimaung.

<sup>2</sup> “Daurarong Ju'nupoong biikaang ponto'aru'nung arerai? Nii'ke bakaang beento'ta'da'puio' ooampira nanampikotaa' enang moring tee-koo dootuu'marii'naang.”

<sup>3</sup> Teketa tenang teie daurarong Eeroti'ke tee' taaravura tee bakei oraka' mantomparu', teing Jerusalema'nupoong tee ninka nari'.

<sup>4</sup> Teketa tenang teing ookara piristi'koo pankenuka ee'noko boto naunuka naro'bokuvurira nia'urima aa'puru', “Nko tee Kumponinge teroita Pako'pari'nii' nantoong domampurira tarevuriainoo'koo are'ke ponto'aravainge?”

<sup>5</sup> Teinge maku'aama aa'pau', “Beeteleema'ke, Judia'koonoo'ke, ai' aung kara nakaronarai daarivuu'nung Daari Meekung-koo, aa'puma,

<sup>6</sup> ‘Da' Beeteleema', Judia'koonavuntu' osi oki'navuntu' deea' teing-koo pankeng osi Judia'navaroi otoromaing-koo, ai'da'keta tee narung tanata-nko tavo'kuaing nkanavitu Isireeli-nupoong sipisipi'nankapina' tanatavuriaing.’” *(Maika 5:2)*

<sup>7</sup> Teketa teie Eeroti'ke teing norukasi'nuka baku'noo' bokuvuru' ee'noko teing batei tee beento' oro'pari otou'ning tampa' noru'uu'naang nia'uriko nauau'.

<sup>8</sup> Teketa botovurima te' Beeteleema'aape aa'puru', “Berira tampa' besi'eriai tee tooto', ee'noko ooverira namu'ke ning naumeriai, merai'nang tee-koo dootuu'maravaina'.”

<sup>9</sup> Teketa teinge tee daurarong taaravaara tenkenau', ee'noko tee beento' duaa'

bakoaramanoo'aapea tutung ooau'nung teing-koo napo' oro'parara uro'kanoo'ke nanuu' bera te' tooto' otou'noo' dau datearu'.

<sup>10</sup> Tenang teinge tee beento' teka ooaara dotur-otue maanto'urira bakei aa'na' do'dero'de'ariru'.

<sup>11</sup> Teketa tenang pava-koo kuung porora teinge tee tooto' ooau'bauko ninka Meeri' ninka otoreko. Ee'noko teing te' doonko miinge keemparira tee-koo dootuu'ariru'. Teketa biikaang bakurananka daate'aara kapoo' moo' pankeng-kooninge bauta'au' tee aa'ninge: koro, kapoo' betu'uko tampa' nuuraa' ee'noko duuni tampa' nuuraa' miring meeaa.

<sup>12</sup> Ee'noko noone-koo koono-antavurio' Eeroti'anko napo' beroaroo'naang teing norukasi'nuka nii'navunge biikanameensi'aape toroariru'.

### *Josepa'daang Iisipi'aape Koo'ariru'na'*

<sup>13</sup> Teing beroio' napo' tee koosinung Ovoring bakaang Josepa'ankoi oro'paru' noone-koo, teketa aa'puu', "Daa'daravai. Tee tooto' ee'noko bauko bokuereta Iisipi'aape mmariirira bera teke otoriko ninge nauranko deeko' tororariai, ai' Eeroti'ke tee besi'uu'naang tee tooto' dupisi'uu'naang."

<sup>14</sup> Teketa i'amparara tee tooto' ee'noko bauko bokuvureta tenang muunga Iisipi'aape tenkenau'.

<sup>15</sup> Bera teke otorou' Eeroti' boo'paru'noo'ke basi. Tee' nkoario' tee kara Ovoring bakaang makotuu' nakaronara~ karantavuma~ aa'puu'naare:

“Ninge bokuantu' tee nnuring Iisipi'keta.” (*Osea 11:1*)

*Eeroti'ke Tampuio' Toirekaa' Tavaaru'na'*

<sup>16</sup> Teketa tenang Eeroti'ke noru'urai'nange teinge norukasi'nukai tee tosiaara divu'au'nung tee, tee bakei aa'na' iiravou' ee'noko tee botoaru' ookara toirekaa' donkaang Beeteleema'navete-kooning dupisi'koo biikaang mare'beemareu-koo basiariaing\* teing norukasi'nukai nauau'noo'ka noru' nkavura.

<sup>17</sup> Teketa tenang ee'nang tee kapoo' tee-koo Daari Meekung-koo nakaronarai Jeremaia'ke tero minkuvuu'nung masika'paru'.

<sup>18</sup> Aa'puu',  
“Narung aurong teka Raama-nairu-koo taaravansing, aa'na' orarunsiari uiarama biromparako, teni Reesiel baurukaa'koo biromparako, dunsirunsi-antavaaako~ piavoaruu' baurukaa'oparirio!” (*Jeremaia 31:15; Pupu' 35:19*)

*Josepa'daang Iisipi'keta Toroariru'na'*

<sup>19</sup> Teketa tenang Eeroti' boo'pario', tee koosinung Oving bakaang napo' Josepa'ankoi noone-koo oro'paru' teke Iisipi'ke.

<sup>20</sup> Ee'noko aa'puu', “Tanterarara tee tooto' ee'noko bauko bokuereta te! Isireeli-nameensi'aape beriai, ai' teing tee tooto' dupisi'koo piavoroko'ning teing boo'pariru'ning.”

<sup>21</sup> Teketa tantearara tee tooto' ee'noko bauko bokuvureta Isireeli-nameensi'aape berou'.

---

\* **2:16:** Tee tooto' Pako'pari'nii' tokoa otoko naro'ka tavaava'naang piavora, mare'beemareu-koo kuunge otoing-pina' noru'uma.

<sup>22</sup> Teka tee Akeleasi Judia'navete tarevuko bauma tee Eeroti' pari'antavura tee Josepa' avorou' te' be'koo. Ee'noko noone-koo napo' koono-antavuio' Kumponinge Kaaleli'navete-koo berou'.

<sup>23</sup> Ee'noko berora narung osi miring Nasareti'namono-koo otorou'. Tee' nkoarako tee kara nakaronara karantavuma Ovoringe minkuvuu'nung masika'paru', aa'puu'nung, "Nasareti'nung tampaamaatoaing." (*Aisaia' 11:1; 53:2*)

### 3

*Jooni Minkinara Daankiarako'na'*  
(*Mak 1:2-8; Luk 3:1-18; Jon 1:19-28*)

<sup>1</sup> Tenang Jiiusu' Nasareti' otoko'nang ee'nang Jooni Minkinara sirakura' tavo'arara daankinang tutumpuu' mee'bora' sirakamaa'koo Judia'navete-koonoo'ke.

<sup>2</sup> Aa'puma daankiaru', "Bere'dariai paninung muu'koo tuntariaina', ai' tee muu' tee enang due' poing."

<sup>3</sup> Aung Jooni tee teie nakaronara Aisaia'ke urikamu' minkuvuu'nung Daari Meekung-koo aa'puu'noo'ka,

"Aurong narung naning-koong mee'bora' siraka-maa'koo bokuma aa'pumaang, 'Maamu-antaveriaing tee taung Ovoring bakaang. Koompevuriai poainavung.' " (*Aisaia' 40:3*)

<sup>4</sup> Tee Jooni Minkinara tee tamung mononopa' kaameli'koong dapo-koo nkonii' kurumparako',

ee'noko dopa'noo'ke tokoarako!\* Ee'noko bakaang taamang teing aa'ning maa'uriko': ntaa'nanka ee'noko davainta pora'kooning.

<sup>5</sup> Ee'noko mmau' nantoonanka Jerusalema'keta tee-anko berou', ookara Judia'nameng-nupoong nari', bera ookara Joo'dani-nari-nupoong-koo basi.

<sup>6</sup> Ee'noko biikaning oraka' nkonanka sira'pariko ntong-koo minkivurima meeka'antavuriko' teie Joo'dani-nari-koo.

<sup>7</sup> Ee'noko tenang ee'nang tevitu Moosesi bakaang Boto Keperuu'navitu miring Paarisinavitu ee'noko Noru' Pitunavitu miring Saadiusi-navitu nari' ntong-koo minkivurira meeka'antavurii'naang porou!. Teka Jooni Minkinarai oovurira aa'puriko',

"Dii' borukoporonuka, baie aa'duri dii' tamung minkirarira koo'dariaining Kumponing bakaang iira tavo'kuaing-eta?

<sup>8</sup> Masika' bere'dariaing tee-koo sinang oro'paravaina'.

<sup>9</sup> Tamung dii'ka aa'periauka', 'Eebaraami' tee nii'ke niuma otong,' ai' masikung ninge nau-rampimang Kumponinge tee Eebaraami' baurukaa' aing-eta kapananka-ita nkoveripeu' dii' pari'anta-koo, domang iveka'dariko deeko'.

<sup>10</sup> Teri' marekenari' teri' maamuari otong koi'koo okora'. Dii' teing koi' makosinuka. Dii'koo ookara sinang tampara nkaveriauka'ning tee nokiraarira nta'koo dua'daariaining.

---

\* <sup>3:4:</sup> Teing nakaro-nupoong urikupoong tee' kurumpariko' Elias kurumparako'na', aarumo baka kirokai kontevoma. Ooveai 2 Dauraronanka 1:8.

**11** Ninge tee tamung ntong-koo minkirampima meeka'antarampimaang domang bere'dariko, nka tee ning aa'na' apoo'mui otoing iirakuta mme' pomaang, doonge-taara~. Tee ee'nara pok'o aa'na' tampa' taaraveriai, ai' teie tee meeka'antaruriaing dii' Tanuaang Meekung ee'noko nta'ninka.

**12** Teie, tee simpe'nkoi~ teing makosinuka bakaang muu'koo kuunga onkeonke'uriaing, ee'noko teing makosinuka deeaing tee-koo nta'koo siri'paa'koo tai-antavuriaing."

*Joonie Jiisuu' Ntong-koo Minkivura  
Meeka'antavuu'na'  
(Mak 1:9-11; Luk 3:21-22)*

**13** Teketa tenang tee Jiisuu' Kaaleli'nameensi'keta Joo'dani-nari-aape pou' Joonie ntong-koo minkivura meeka'antavuu'naang.

**14** Teka Joonie orokovuma aa'puu', "Ning dake ntong-koo minkimera meeka'anta-koo makosi ee'noko da' arekee'koo ning-anko poi?"

**15** Teka Jiisuu'ke maku'uma aa'puu', "Emu' nkomeaing. Makosi nee'ke tee' nkoampema dupe-antavampeaing ookara aarumo koonto'nanka." Tenang tee' minkuvuio' Joonie aroo'uu'.

**16** Teketa tenang Joonie Jiisuu' ntong-koo minkivura meeka'antavuio' doompeto daa'ario' ntong-eta tonta'arako tee-koo batei-koo paning daate'aru' ee'noko tenang teie tee Tanuaang Meekung Kumponing bakaang, kuukuu'pina' siarara Jiisuu'koo pantoko oovuu'.

**17** Ee'noko kara auromparu' paning-eta aa'puma, "Aung tee nnuring ninge piaavamaung. Ning aung-koo aa'na' dotumaramaung."

## 4

*Sietani'ke Jiisuu' Paaravuu'na'  
(Mak 1:12-13; Luk 4:1-13)*

**1** Teketa teie Tanuaang Meekunge tee Jiisuu' mee'bora' sirakamaa'koo be'antavuu' Sietani'ke daua'uu'naang teka.

**2** Teke taamanua' otou' karenaumo kivora doong ee'noko karenaumo kivora muung-koo. Ee'noko teing doong oparu'noo'ke tee peeravou'.

**3** Ee'noko teie daua'baukoi pora aa'puu' tee Jiisuu', "Da' Kumponing Bauring deeko' aing kapanka naueriko taamananka deempariaing."

**4** Ee'noko Jiisuu'ke maku'uma aa'puu', "A, tee Daari Meekung-koo ee' daariari otong, 'Naning taamang narunge domampari otoaung, teka ookara kara Kumponing-etaning siom-pui domampari otomaung.'"  
*(Boto 8:3)*

**5** Teketa napo' Sietani'ke Jerusalema'aape, te' Meekamono-koo be'antavuu' tee Jiisuu', ee'noko a'dei' pava dootuu'navaa pankava-koo miiraka-koo pante'antavura aa'puu',

**6** "Da' Kumponing bauring deeko' doonko to'di'daravaing, tampa' dua'darako masika'antaraavaina', ai' Daari Meekung-koo ee' daariari otong,

'Teie bakaning koosinunanka botovuriaing da' paku-koo. Teinge biikaning birenge

deto doontaavaing kapang-koo kau'  
naapurara'neeng-koo.' " *(Kena 91:11-12)*

<sup>7</sup> Teka Jiisuu'ke maku'uma aa'puu' tee, "A, Daari Meekung-koo napo' ee' daariari otong,  
'Dii'ke tee Ovoring diikaang Kumponing parapaara-koo siperiauka!'" *(Boto 6:16)*

<sup>8</sup> Teketa napo' Sietani'ke Jiisuu' a'dei' iu'koo isikung-koo koing-antavura ookara muu'nanka kansi'koo tampa' oro'nanka oo-antavuu'.

<sup>9</sup> Ee'noko Sietani'ke aa'puu', "Aing ookara ninge oko-antarampeu' da' ning-koo miinge keentarara dootuu'mei dei."

<sup>10</sup> Teketa Jiisuu'ke aa'puu' tee, "Tokoi tenkeniai da' Sietani' ning-ankoita, ai' Daari Meekung-koo ee' daariari otong,  
'Dii'ke Ovoring diikaang Kumponing narung dootuu'eriaing, ee'noko nii'nung siomperia' otoriae!'" *(Boto 6:13)*

<sup>11</sup> Teketa tenang Sietani'ke sipura beko tee, koosi-nunankai porora puring-antavau'.

*Jiisuu'ke      Bakaang      Nko-nko      Kaaleli'ke  
Tutumpuu'na'*

*(Mak 1:14-15; Luk 4:14-15)*

<sup>12</sup> Tenang batei-koo Eeroti'ke Jooni Minkinarai kiimatanava-koo dai'ura sipuu'. Ee'noko Jiisuu'ke tee taaravura tee Kaaleli'nameng-aape\* toroaru'.

<sup>13</sup> Teka Nasareti' sipura Kapanume'nayuntu'koo otou' te' ee'noo' te' nuaru' due' Sebulon-namuu' ee'noko Napitalai-namuu' biikanameng-koonoo'.

---

\* **4:12:** Temeng Eeroti' tarevuko'nameng.

**14** Tee' biikanameng-koo beio' tee kara teie nakaronara temu'nunge Aisaia'ke minkuvuu'nung dupearu' Daari Meekung-koo aa'puu'noo'ka,

**15** “Teinge nantoonge mutaanano' otoromainge pankaing araka ooaavaing teinge Sebulon ee'noko Napitalai beekanavaro-kooninge, te' ookamenta-koo otoromanoo' aa'noko pirung-aape danto ee'noko Joo'dani-nari-eta ee'daanto, te' ee'noo' Kaaleli', Ju'deeaing Biikanoo'.

**16** Teing ee'ning te' boo'ke anivumanameng-koo otoromaing arakai tane'puriang.” (*Aisaia' 9:1-2*)

### **Jiisuu'ke Nantong Kumponing-koo Tampa' Doorevuru'na' Taare-antavurima (4:17-9:34)**

*Jiisuu'ke Bakaning-koo Tutuna'ning  
Karenaumo Bokuvuru'na'  
(Mak 1:16-20; Luk 5:1-11)*

**17** Ee'noko tenang-eta deto Jiisuu'ke daankinang tutumpuu' aa'puma, “Bere'dariai paninung muu'koo tuntariaina', ai' tee muu' tee enang due' poing.”

**18** Ee'noko teketa Jiisuu' Kaaleli'naru'koo miringe nanuma teie kemaintara teka oovuretu' aa'noko Saimoni' tee nii'noo'ke Piita, ee'noko tee Aanduru', baara'ma'nung, sionung dua'ureko teru'koo, ai' temainta tee tavi' baranka.

**19** Ee'noko Jiisuu'ke aa'puretu', "Poreta ning siomereai, nantoong baranka deeng-antarampeaina!"

**20** Ee'noko namu'ke tee beekaang sionung sipureta Jiisuu' siompuretu'.

**21** Teketa napo' nanuma nii'namainta oovuretu' miring Jeemisi namainta Jooni, Siebedi baurinketa, bakaasi-koo beuma ninka otoroko, Siebedi ninka, biikaang sionung pate'aama. Teketa Jiisuu'ke temainta bokuvuretu'.

**22** Ee'noko namu'ke temaintai biikaang bakaasi ee'noko tee beuma sipureta Jiisuu' siompuretu'.

*Jiisuu'ke Aining Nkovuko'na' Daankinang  
Ee'noko Taare-anta  
(Luk 6:17-19)*

**23** Jiisuu'ke tee ootukunairue Kaaleli'ke nanuma nau-antavuru' nantoong pava dootuu'nanka biikaning-koo. Nau-antavurima daankivuko' tee doorenang tampara Kumponing bakaang muu'koong, ee'noko taare-antavuriko' nantoong siipa amutemurii'po'nupoong.

**24** Ee'noko doorenang tee-koong Siirianamenge nanu'antavau', ee'noko teketa ookara siipa amutemurii'po'nupoong tavo'aaru' tee-anko, sisikeerai tora'antavuriko'ning, ma'narie koriaariko'ning, kookoko~po'nupoong, ee'noko dootanuka, ee'noko te' po'antavaariko taare-antavuriko'.

**25** Ee'noko nantoong karingai aa'ning-eta Jiisuu' siompai nanaako', Kaaleli'nupoong, Dekapolis-navete-nupoong, Jerusalema'nupoong, Judia'navete-nupoong, ee'noko ookara Joo'dani-nari-koo aveteraang-nupoong.

**5***Jiisuu' Mii-koo Daue Daankiaru'na'*

<sup>1</sup> Tenang teinge nantoong karingai Jiisuu' siompaio' oovurira tee mii-koo deto koinura ba'namparu!. Ee'noko bakaning barevare-nupoong tee-anko porou!.

*Teing Biraankenanka  
(Luk 6:20-23)*

- <sup>2</sup> Ee'noko teie nau-anta tutumpuma aa'puu!,
- <sup>3</sup> "Biraanke-nupoong teing nantoong biikaang tanuaang ataata'koo otoko tasi'pariaining, ai' muu' paninung tee teing okovoroaing.
- <sup>4</sup> Biraanke-nupoong teing nantoong orarunsiari-maing, ai' teing teing ee'ning Ovoringe dun-sirunsi~antavuriaining.
- <sup>5</sup> Biraanke-nupoong teing Kumponing-koo aroo'ariri banainge otoromaing, ai' biikaang barenku okovoroaing tee ookara kansi' tare-koong.
- <sup>6</sup> Biraanke-nupoong teing nantoong peeravoroma nukaa'oromaing tee-koo aarumo koonto' siong-koo, ai' teing teing poovuriaining.
- <sup>7</sup> Biraanke-nupoong teing nantoong piaabaukonuka, ai' Kumponinge teing piaavuriaing.
- <sup>8</sup> Biraanke-nupoong teing nantoong domang ki-iroraa'nuka, ai' teing teing Kumponing ooaavain-ing.
- <sup>9</sup> Biraanke-nupoong teing mooa nkonuka, ai' teing teing Kumponinge baurukaa' tampuriaining.
- <sup>10</sup> Biraanke-nupoong napo' teing nantoonge manki'antavaarimaatoaining

aarumo koonto' siompaio', ai' tee Muu' Paninung tee teing biikaang.

**11** Biraanke-nupoong napo' dii' tenang nantoonge deu'daarima manki'antaraariko ee'noko daana' avutevu'ai oraka' minkuraariko ning dii'ke siomerimaung-koo.

**12** Doturarima do'dero'de'dariai ee' noru'erima, 'Niikaang moo' pankaing otong teke paning-koo.' Ai' tee tee' nari' nantoonge teing nakaro-nupoong tee dii'pina' nari' manki'antavaariko', dii'koo uro'nupoong."

*Deva' Ee'noko Araka  
(Mak 9:50; Luk 14:34-35)*

**13** "Dii' teing deva'nuka ookara kansi'koo, teka tee deva'tarii'noo' paa'arapeu'nung arekee' napo' tarii'antavupeu'? Tee aa' tee tamunsi'nung deemparing. Tamung doonko dua'uma nantoonge mmemme'koo makosi.

**14** Napo' dii' teing arakanuka ookara kansi'koo. Narung osi iu'koo dau kaniaapeu'nung tee baku'koo makosi deea'.

**15** Nantoonge tee araka paro'aara antona'koo boong sipaavarupeu', teka sirang batanang-koo pante'aapeu' bakanoo', ee'noko teketa araka-antavuripeu' ookara nantoong pava-koo kuunge otoromaing.

**16** Tee' nari' diikaang araka araka-antaveriaing nantoong-koo uro'kanoo'ke diikaang nko-nko tampara ooaara Diuma tee paning-koong daangampaavaina'."

*Boto Dupe-anta-koonaare*

**17** "Ning dii'ke tee boto Moosesi-nung ee'noko nakaro-nupoong biikaang kara kui-koo

mou'nung-pina' noru'meriauka'. Ning teing kui-koo moa', teka teing dupe-anta-koo mou'nung.

<sup>18</sup> Masika' naurampimang, tenang paning ee'noko kansi' opareainoo'ke basinoo'koo oki'naare nii'noo' namoora'noo' daari-koo kuiarava' tee boto tee bakei tee' nari' otoaing bera ookara kapoo'nanka dupearavainoo'ke basi.

<sup>19</sup> Baa tee naning aung-koo botonanka-koo oki'nareka' masikeng-koo narung toto'pura nii'ning nari' nau-antavuriaing tee tee oki'nung masikung tang-koong teka muu' paninung-koo. Ee'noko baa tee naning siompuma nau-antavuriaing tee botonanka tee ee'nung pankaing tang-koong teka muu' paninung-koo.

<sup>20</sup> Ai' ninge dii' ee' naurampimang, diikaang aarumo tamparai te' kuung masipo' teing boto keperuu'navitu tamparimaing ee'noko boto naunuka biikaang puru'uauka'nung deeko' dii' muu' paninung-koo bakei tuntariauka'nung."

*Turang Tampa' Bake-anta-koonaare  
(Luk 12:57-59)*

<sup>21</sup> "Dii'ke taaraverimaung uripo'keta aa'pui oting, 'Nanineg nii'nung dupisi'eauka', ee'noko baa tee dupisi' nkovuaing tee tuutunang~koong.'

<sup>22</sup> Teka napo' ninge ee' naurampimang, baa tee naning ba'marang-koo narung iiraevuaing tee tee' nari' tuutunang-koonge. Napo' baa tee naning nii'nung ba'marang-koong noru' otoaung tampuaing tee tee koompaara'navituko be'anta-koo makosi. Teka baa tee naning nii'nung barakosi'uma aa'puasing, 'Da' kanu'!'

tee tee mosianung-aape nanu'koo makosi, te' nta'po'noo'.

<sup>23</sup> Tee'koo dake avuavu' darimpee'naang nkorrarama teke boonturomai ee'noko teke nii'nung da'marang-koong da' ninka iira otoing noru'era deeko',

<sup>24</sup> io' teka boonturoma uro'kanoo'ke sipera tee dakaang avuavu', tutung bera tee ninka mooa-antareereai, ee'noko teketa tororarara tee dakaang avuavu' darimpeai.

<sup>25</sup> "Naninge karenunge da' tuutunang-koo barantuko iri'narung koompeai tee kara, mme' taung naniresitaa' simpe'nko~anko tavo'duaruko. Teie napo' piatooro~anko be'antaruko kiimataroma si'du'neenga.

<sup>26</sup> Masika' naurampimang, dii' ki-imatanava'keta tenkeniriarupeu' mooni'koo asi'nu dua'kiria' deeko' tuutunang moo'koo."

*Nampeesi Orari-anta-koonaare  
(Mat 19:9; Mak 10:11-12; Luk 16:18)*

<sup>27</sup> "Dii'ke taaraverimaung uripo'keta aa'pui oting, 'Nampeesi orarieriauka'."

<sup>28</sup> Teka ninge aa'dampimang, baa tee naning nani manikuma karaa'ui oovuaing teie tee nampeesi tero orarivuing teni ninka bakaang domange.

<sup>29</sup> Dakaang duta tampavine-koonge dua'antaruko deeko' orara aarumo-koo tee ka'bampera taapo' dua'eai. Tampa'na' da'koo navio' paa'aravaing dakaang ootukunung mono mosianung-koo dua'du'neenga.

<sup>30</sup> Ee'noko napo' dakaang birenge tampavine-aapenunge dua'antaruko deeko' orara aarumokoo, tenaang napu'darara taapo' dua'eaing. Tampa'na' da'koo mono-koo navio' paa'aravaing dakaang ootukunung mono mosianung-koo nani'neenga.

<sup>31</sup> “Uripo'keta aa'pari otong, ‘Baa tee naning ba'aang sipuma teie narung karavoto~daarivuaing nampeesi toto'puing tasi'anta-koo.’

<sup>32</sup> Teka ninge aa'dampimang, baa tee naning ba'aange tutung kaukauro nkovuaruko bata'ura deeko' teie tee teni tuu'umaang nii'narai nampuko nampeesi orarivuu'naang. Ee'noko baa tee naning teni bata'nii' nampuaing teie tee nampeesi orarivuing.”

### *Masika' Deto Minku-koonaare*

<sup>33</sup> “Napo' dii'ke taaraverimaung uripo'keta aa'pui otoing, ‘Diikaning masika'detonanka toto'peria' otoai, nka tampa' siomperimatoai Ovoring-koo nkoverira.’

<sup>34</sup> Teka ninge ee' naurampimang, bakei masika' deto tamperia' otoai. Paning tang-koo makotua', ai' te' te' Kumponing bakanoo' meepo' ba'nani'doma.

<sup>35</sup> Kansi' tang-koo makotua', ai' te' te' Kumponing bakanoo' kau' patu'doma. Napo' Jerusalema' tang-koo makotua', ai' te' te' Daurarong~ Pankaing bakanoo' osi.

<sup>36</sup> Ee'noko napo' masika' deto dakaang bore' tampema minkueauka', ai' dake tee-koong dapon-avi' nii'na' du'antavearupeu' kakaara-antavema deeko' ee'noko mutaanu'antavema deeko'.

<sup>37</sup> Teka 'Ee' miru'ema 'Ee' narung tampeai. 'A' miru'ema, 'A' narung tampeai. Aing-koo taapo'ning, teing masika' deto dovang, kara teieta naning orara-it a pomaing."

*Mero' Nkonaare*

(Luk 6:29-30)

<sup>38</sup> "Dii'ke taaraverimaung uripo'keta aa'pui otoing, 'Nanine dakaang duta ka'bampuko, makosi bakaang duta ka'bampaavaing maku'koo,' ee'noko 'Nanine dakaang si'da' naki'uko, makosi bakaang si'da' naki'aavai maku'koo.'

<sup>39</sup> Teka ninge aa'dampimang, naninge oraka' nkoruko tanka'ni'peauka' tee. Naninge tampavine-koo amo'koo tanko'duko napo' bere'darako asi'nameng taura'peko tanko'duai.

<sup>40</sup> Ee'noko napo' nii'nunge naninge daang koosiruma mononopa'ke maku'koo eentavarako deeko', makosi tee avema napo' nii'naa' nari' aveai.

<sup>41</sup> Napo' nii'nung naninge nii'noo' basinoo' naniree'naang eturuko napo' bono' divu'eit nii'noo' basinoo' nari' nanireai.

<sup>42</sup> Naninge eentaruko kapoo' aveai ee'noko dakaang kapoo' kong-koo nia'duko orokoveauka!."

*Kare-nupoong Piaanaare*

(Luk 6:27-28,32-36)

<sup>43</sup> "Dii'ke taaraverimaung uripo'keta aa'pui otoing, 'Da'maiko' da'koo miirinung piaavema ee'noko da'koo karenung munte'eai.'

<sup>44</sup> Teka ninge ee' naurampimang, teing diikaning kare-nupoong piaaverererimaatoing.

Teing dii' barakosi'daariaining biraankevereriai.  
 Teing dii' munte'daariaining tampa' nkovereriai.  
 Ee'noko teing dii' oraka' nkoraarima  
 manki'antaraariaining kensi-koo pakuereriai.

**45** Dii'ke tee' nkoverima Diuma tee paning-koong baurukaa' deentariaina'. Tee ee'nung tee bakaang duaa' ookeng-koo araka-antavumaung tampeng-koo ee'noko oreng-koo, ee'noko apo' tee' nari' botovukoo' aa'ning-koo koonto'nuka-koo ee'noko koonto'nuka deeaing-koo.

**46** Ee'noko dii'ke teing nantoong dii' piaaraari-maing naing piaaverererira deeko' moo' are-murii' nkaveripeu' Kumponing-eta? Tee' ee deea' nari' teing oreng taakisi nkanuka nkoarimana'?

**47** Ee'noko dii'ke teing da'marang naing onkeonke'ereriaing deeko' aming kapoo' dau basi nii'ning nkoamaing-koo nkoveripeu'? Bakei katua'. Mutaanang-nupoonge ee tee' nkoavaaung?

**48** Tee'koo tampa' nari' nkoverimatoaing tee'  
 Diuma paning-koong tampa' nari' otomana'."

## 6

### *Ayuavu'koonaare*

**1** "Tanatarariaing dii!. Dootuu'koong aarumo tampara nkoverima nantoong-koo dutakanoo'ke nkoveriauka' teinge ooraarii'naang. Tee' nkoveriaing deeko' tee, teie Diumai paning-koonge moo' aruriauka'nung.

**2** Aa'nomaatoai tenang teing ata'oinku averererima deeko' tee-koo tuuviri puumperia' otoai teinge ampirinunukai nkoamana' pava dootuu'nanka-koo ee'noko napo' taung

sionairu-koo maroita nantoonge pankaing-antavaarii'naang. Ninge masika' naurampimang, teinge tee biikaang moo' ookara teka nkavaamaung.

<sup>3</sup> Teka tenang dii'ke teing ata'oinku averererima baku'eri nkoveriai kapoo' tampanaange nkovuaing mare'anaange noru'uauka';

<sup>4</sup> Ee'noko teie Diumai kapoo' baku'nii' oovumaunge sirapo'ke moo'duriae dii' tee-koo."

*Kunsi-koonaare  
(Luk 11:2-4)*

<sup>5</sup> "Tenang kunsirarima teing-pina' ampirinunuka-pina' nkoraria' otoai. Pava dootuu'nairu-koo ee'noko taung sionairue donkonai kunsi-koo aa'na' piavoromaing-pina' nantoonge ooaarii'naang. Ninge masika' naurampimang, teinge tee biikaang moo' ookara teka nkavaamaung.

<sup>6</sup> Tenang dii' kunsirarima diikanavaro-koo avo'nii'navaro-koo tuntarima karanaang da'perima kunsirarimatoai tee-koo Diuma-koo naninge oo-paa'koo, ee'noko teie Diumai kapoo' baku'nii' oovumaunge sirapo'ke moo'duriae dii' tee-koo.

<sup>7</sup> Ee'noko tenang kunsirarima kara putu'eria' otoai teinge mutaanang-koo-nupoonge nkaoamana' aa'paama, 'Mmau' kara-koo taaramuriaina!'

<sup>8</sup> Koonto' teing-pina' nkorariauka', ai' teie Diumai tee noru'umaung teing kapoo' dii' apuka'darimaing tutung eentaveriaruko tee.

<sup>9</sup> “Kunsirarima ee' kunsirarimatoai, ‘Niuma paning-koo otomaung, dakaang miring meeka'antavari otoaing.

<sup>10</sup> Dakaang muu' po'antaveai. Dakaang pia nkoaravaing anke kansi'koo paning-koo nkoaramana' nari'.

<sup>11</sup> E'mung-koo makosina' ameriai tee taamang doong kante amerimaung.

<sup>12</sup> Tonta'antameriai niikaning orarananka nii' oraka' nkomaarimaing tonta'antaevorompimana'.

<sup>13</sup> Ee'noko parapaara-koo si'meriauka', teka tonta'antameriai teieta naning orara bakaang purinto'keta; ai' da' tee ookara-koo okorui tarenumpo', purinto'po'nung, ee'noko meena'doi otomaung ookara doong-koo. Tee' ee'na!'

<sup>14</sup> “Ai' dii'ke nantoong tonta'antavereriko teing dii' oraka' nkoraarimaing teie Diumai paning-koonge dii' tee' nari' tonta'antaruriainge.

<sup>15</sup> Teka dii'ke tonta'antavereriaruko nantoong teing biikaning oraka' nkonanka-koo teie Diumai tee tonta'antaruriauka'nung diikaning orarananka-koo.”

### *Unkumonaare*

<sup>16</sup> “Tenang dii' unkumorarima munte'dorining-pina' oro'daria' otoai teing ampirinunuka nkoarimana', ai' teing teing oing oraka' oro'antavarimaing maroita unkumoaririning taa'ni'antavarima. Ning masika' naurampi-mang, teinge tee biikaang moo' ookara teka nkavaamaung.

<sup>17</sup> Teka tenang dii' unkumorarima oing duu'darimatoai bore' duunie sisi'darima

nantoong-koo    dii'    unkumoraririning-pina'  
oro'dariauka'na';

<sup>18</sup> Teka tee narung-koo Diuma-koo naninge oo-paa'koo deeko' sira'dariri otoriai ee'noko teie Diumai kapoo' baku'nii' oovumaunge sirapo'ke moo'duriai dii' tee-koo."

*Kapoo' Tampeng Paning-koo Oosi-koonaare  
(Luk 11:34-36; 12:21-34; 16:13)*

<sup>19</sup> "A' kansi'koo kapoo' tampeng kavonanka oosieria' otoai te' pumpu' dovange ee'noko takarau' aa'ninge orariaamanoo', napo' bakisipunankai pesi'aama bakiaa'aamanoo'ke.

<sup>20</sup> Teka paning-koo moo' tampeng oosierimaatoai te' ee'noo' pumpu' dovange ee'noko takarau'ke orariaavarupeu', napo' bakisipunankai pesi'aama bakiaa'aava'noo'ke.

<sup>21</sup> Ai' te' tokoo naning bakaang muuninava~ otoainoo' bakaang pankaruntoonge noru' tee te' otoaing.

<sup>22</sup> "Domang tee duta pina', tee diikaang mono bakaang puu. Tenang diikaang duta tampara deempari otoko diikaang mono ootukunairu arakai maanto'ui otopeu!.

<sup>23</sup> Teka duta tampara deeaung deempari otoko diikaang mono mutaanange maanto'ui otopeu!. Tee'koo tee diikaang domang mutaanang-nameng-koo otoko deeko' bakei aa'na' masika' mutaanantoriaining.

<sup>24</sup> Narunge kenaanka ovontura siompurearu-peu', ai' teie tee narung munte'uma nii'nung piaavumatopeu', nii'noo' narung siompuma nii'nung siompuaru-peu!.      Tee'koo dii'ke

Kumponing ee'noko kavokavoro ookeng deto deeng-antaveriarupeu'.

<sup>25</sup> "Tee'koo ninge naurampimang dii', noru'manki'doria' otoai aa'ning-koo taamang tovang ntong domanturiaining ee'noko mononopa'nanka. Aming-koo, nna', domaang tee taamang-koo bi'ari otoa' ee'noko mono teebaarong-koo io'arava'.

<sup>26</sup> Oovereriai teing barennanka auvi'aukooning. Teing teing kapoo' keeng noru'aava', kavaama oosi noru'aava', kore' noru'aava' pava-koo, teka teing teing Diumai paning-koonge bau'urimaing. Enang arekee', dii' ee teing-koo dau basinanka deea' bakaang norunoru'koo?

<sup>27</sup> Ee'noko dii'koo baie noru' manki'oma doong naraanga'noo' deto be'nu'antavura te'koo domampari otopeu'? Otoa'.

<sup>28</sup> Ee'noko aming-koo napo' dii'baarong tovang-koo noru' manki'dorikoo'? Oovereriai teing iioo'nanka tamung dupurimana', baarong tua'koo pore'oroainge.

<sup>29</sup> Teka ninge ee' naurampimang, aa'na' tampa' nerampurimaung nantoong biikaang meenasi puru'uitaa', bane dauraronanka Solomoni'pina'.

<sup>30</sup> Teka Kumponinge baa'nanka tee' nerampurimaung deeko', teing aa'nomaing na'mung doong-koo domamparara dauna'mung mara'oko tai-antavaakoo', tee tee tee' nari' tasi'periaing dii'ke, masika'anta oki'naa oto'derurininge, ai' dii' teing deto basinoo' noru'duri duaanaruriaining.

<sup>31</sup> Tee'koo enang tee noru' manki'doria' otoaing aa'perima, 'Aming naiampii'naang?' ee'noko 'Arenaa' kurumarii'naang?'

<sup>32</sup> Aing ee' oro' kapoo' mutaanang-nupoonge kariaamaing, teka dii' tee' deea', ai' dii' Diumai Paning-etaing noru'ui otong aing ookara kapoo' dii' apuka'darimaing.

<sup>33</sup> Tee'koo ainkato noru'eria' Kumponing bakaang muu' deto pankaruntoonge noru'erimatoai tee ninka bakaang aarumo koompari oto' ninka nari' ee'noko teing aing kapoo' apuka'darimaing nari' aruriainge.

<sup>34</sup> Tee'koo tane'nung doong-koo noru'manki'doriauka'. Tane' te'mung baka noru'aravaina'mung. Ai' ookara manki'nanka na'mung doong-koo makosina' bire'ari otong."

## 7

### *Nantoong Birevire' Pote-koonaare (Luk 6:37-38)*

<sup>1</sup> "Nantoong koong-anta-koo oioi'daria' otoi Kumponinge nari' koong-antaru'neenga.

<sup>2</sup> Ai' dii'ke koong-antavererimaung-koo tee' nari' Kumponinge dii' koong-antaruriaing. Tee paaranang kompei nantoong koong-antaverimanarong Kumponinge kompu da' koong-antaruu'naang.

<sup>3</sup> Aming-koo dake nanki' daara'ma'nung-koo duta-koo oovemaunge teka daka noru'darava' da'koo duta-koo konkinarong otoing?

<sup>4</sup> Arekee' dake aa'pepeu' tee daara'ma'nung, 'Io' nanki' moo'dampai da'koo duta-koo otoing,' tenang daka oorarava' tee konking da'koo duta-koo otoing.

<sup>5</sup> Da' ampirinung~, iro' tutung daka-koo moo'daravaing tee konking duta-koo ee'noko tenang daara'ma'nung-koo siraka'pei oovera moo'eai tee nanki' daara'ma'nung-koo duta-koo otoing."

<sup>6</sup> Ee'noko Jjisuu'ke mirumiru' nauvurima aa'puu', "Kapoo' meekung mosi'nanka avererereria' otoai bere'arima oki'noo'na' tairaarima busivusiriraari'neenga. Ee'noko napo' diikaang duku' pooro'anko dua'eria' otoai. Tee' nkoveriko meto' ninka nari' mee'aama more'aa'neenga."

*Kunsimarimatoaina'  
(Luk 11:9-13)*

<sup>7</sup> "Eenterariai aruriaina!. Besi'eriai daa'eriaina!. Kopikopi'eriai karanaang daate'deruriaina!.

<sup>8</sup> Ai' ookara nantoonge eentavarimainge tee nkavaamaung, ee'noko besi'aamainge tee daa'aamaunge, ee'noko karanaang kopikopi'aamaing teinge daate'evurimaunge.

<sup>9</sup> Dii'koo baie baurung taamang-koo eentavuko kapang avupeu'?

<sup>10</sup> Nii'noo' tavi'koo eentavuko ee boru' avupeu' tee? Otoa!.

<sup>11</sup> Tee tee dii'ke orenge diurukaa' tampa' averererimaung deeko' noru'eriaing teie Diumai paning-koo otomaunge bakei tampa' masika' avuriaing teing tee-koo eentavarimaing.

<sup>12</sup> Tee' nantoonge dii' tampa' nkoraarii'naang piarorimana' tee' nari' nkovererimaatoaing teing

dii'ke, ai' teie aunge aarumoi tee boto Moosesi-nung ee'noko nakaro-nupoong urikupoong bi-ikaang naro'ka dupeantavuri otong."

*Karanaang Kavaronta-koonaare  
(Luk 13:24)*

<sup>13</sup> "Muu' paninung-koo tuntoma te' ito-navarong. Teke tevaronge tuntariaing avutevu'daria', ai' tee karanaang pankaing, ee'noko taung tee beeta'nii' tee mosianung-aape bei otong, ee'noko mmau' tevaronge tumparimaung.

<sup>14</sup> Teka tevarong ito-navarong kaponavunge danto tee domaang isikung-anta-aape bei otong, ee'noko mmau' nantoonge dekopi'aamaung te-vung."

*Koi'navari Ee'noko Bakaning Sinananka  
(Luk 6:43-44; 13:25-27)*

<sup>15</sup> "Tanatarariaing teing-koo nakaro-nupoong daang Kumponing-etaning tamparimaing-koo. Teing teing dii'anko sipisipi'koong dopa' kurumpariri poroaing, teka kuunoo' teing teing nkaunanka makosi-nanka tairo'nanka.

<sup>16</sup> Teka tee-koo biikaang sinananka-koo dii'ke tasi'pereriaing. Ai' nantoonge ee karikau' too'murintaa'po'navari-koo kavaapeu'? Ai' kiring ee nantong-koo kavaapeu'? Otoa'!

<sup>17</sup> Tee' nari' ookara koi' tampenanka-koo tee sinang tamparananka bi'umaung. Ee'noko tee-koo koi' orara-koo sinang orara bi'umaung.

<sup>18</sup> Tee-koo koi' tampara-koo orara sinang bi'uarupeu', ee'noko orara koi'koo sinang tampara bi'uarupeu'.

<sup>19</sup> Ee'noko ookara koi'nanka sinang tampara bi'uauka'ning teing nokiaarima nta'koo dua'aariaining.

<sup>20</sup> Tee'koo biikaning sinananka-koo dii'ke tasi'pereriaing teing nakaro-nupoong Kumponing-etaning deeko'.

<sup>21</sup> "Mmau'ke tee aa'maamaung, 'Ovoring, ni-ikaang Ovoring,' nka teing ookara nari' tumpariauka'nung te' muu' paninung-koo, teka teing naing deeko' tee Mma' paning-koong bakaang pia siompaavaining tumpariaing.

<sup>22</sup> Napo' nantoong karingai aa'maavainge ning te'mung, 'Ovoring, Ovoring, nii' ee dakaang miring-koo tarampeemariaruu'ning~ napo' dakaang miring-koo ma'nari bata'arampiaruu'ninge taa'ni'antananka mmau' nkoampima?"

<sup>23</sup> Teka ninge ee'nauarampaing teing sira'pansi, 'Temu'keta dii' nkaning pina' noru'dampiaung. Tokoi beriai ning-ankoita dii' orara aarumo nkonuka.' "

*Matauna' Ee'noko Kanu'na' Pava Kani-koo  
(Luk 6:47-49)*

<sup>24</sup> "Tee'koo ookara nantoong aung nkaang kara taaravaama nkoakoo' teing teing tee-pina' naning norukasi' tee bakaang pava boia'koo dau kanivuu'nung.

<sup>25</sup> Teketa aing aa'ning pou': apo' dua'aru', doua tuuvuu', ee'noko dovinge aa'na' duparara dankampuu' tee pava, teka teva pesi'arava', kapang-koo boia'koo e'manii'nav a deemparako.

<sup>26</sup> Teka teing ookara nantoong nkaang kara tamung taaravaama siompaavarukoo' teing teing

tee-pina' naning kanu' tee bakaang pava tamung  
piisi'koo dau kanivuu'nung-pina', e'mang-  
antayua'.

<sup>27</sup> Ee'noko tenang teing aing aa'ning pora apo'  
dua'aru', doua tuuvuu', ee'noko dovinge aa'na'  
duperara dankampuu' tee pava, ee'noko bakei  
pesi'arara tuung tanuu' tee pava."

<sup>28-29</sup> Ee'noko tenang Jiisuu'ke tee' minkuvura  
bakeario' nantoong karinga bakei aa'na'  
ta'nimpariru' tee-koo bakaang nau-anta-koo  
kara bakaang purinto' deempario', teing-pina'  
biikaning boto naunuka-pina' deea'.

## 8

### *Naning Oramuu'po'nung* (Mak 1:40-44; Luk 5:12-14)

<sup>1</sup> Tenang Jiisuu' mii-eta nau-antavurira depeto  
siario' nantoong karingai siompau' tee.

<sup>2</sup> Ee'noko narung oramuu'po'nung pora  
Jiisuu'koo uro'kanoo' kinkinui eentavarama  
aa'puu', "Ovoring, da' piarora deeko' dake ning  
aung oramuu' kuimepeu'nung."

<sup>3</sup> Teketa Jiisuu'ke bireng tovoro'arara kompuu'  
tee, aa'puma, "Piamoi otong. Enang kuirar-  
ing!" Ee'noko namu'ke tee tee bakaang oramuu'  
kuiaru'.

<sup>4</sup> Teketa Jiisuu'ke aa'puu' tee, "Tarerari naning  
naueauka', teka namu'ke Moosesi bakaang boto  
siompei piristi'koo sira'antararavai, ee'noko  
tampa' ooruko Kumponing-koo boontunang  
nkoveai nantoonge tee taa'ni'anta ooaara da'  
teing ninka nari' oto'koo taura'nii' tasi'daavaina',  
tee' Moosesi bakaang botoi minkuvumana!."

*Piatooronuka~ Narung Daaku' Tanata  
(Luk 7:1-10)*

<sup>5</sup> Tenang Jiisuu' te' Kapaneume'navuntu'koo tumparara otoko narung Ju'deeaung piatooronuka narung daaku' tarenara tee-anko pora pakupaku-koo eentavaru' aa'puma,

<sup>6</sup> "Ovoring, nkaang bautara osie bempari otong siipai sisikeera ninka doota-antavuio!"

<sup>7</sup> Teketa Jiisuu'ke aa'puu' tee, "Merai'nang taare-antavama'naang tee."

<sup>8</sup> Ee'noko teie piatooronuka daaku' tarenarai maku'uma aa'puu', "Ovoring, ning tee makosi deea' da' nkanoo' pava-koo kuung po'koo;

<sup>9</sup> Ning da' pankaing tasi'damira tee' minkuamaang, ai' ning tee napo' nii'noo' basi-koo iri'koo kuung o'nong piatooronuka tare-koong-koo. Ee'noko nii'nung aa'panko dei, 'Beai,' tee bepeu'. Ee'noko nii'nung aa'panko dei, 'Poai,' tee popeu'. Ee'noko nkaang bautara aa'panko, 'Aung nkoveai,' teie nkovupeu' tee. Tee'koo dake tamung karai minkueko nkaang botovotona'a' taarevoaing."

<sup>10</sup> Tenang Jiisuu'ke tee' taaravura ta'ninuu', ee'noko teing siompaako'ning nauvirima aa'puu', "Ninge masika' naurampimang dii': Temu'keta aung amurii' baito pankaing ooampaung bane Isireeli-nupoong ninka nari' o'norimaunge.

<sup>11</sup> Ee'noko ningaa'a'dampimang, karinga nantoong duaa' pomanoo'keta ee'noko tumparamanoo' tenairu-eta poroaining nari' taaman-aavaing Eebaraami', Aisake'

ee'noko Jeekopi' ninka tee muu' paninung taa'ni'poaina'mung.

<sup>12</sup> Teka teing muu'koo temu' miru'nii'nuka\* teing a'dang dama'du dua'uriaining mutaanano', te' ee'noo' nantoong biromparima si'da' dovang kakirinkuarimatoainoo' sisikeera-koo otoroi."

<sup>13</sup> Teketa Jiisuu'ke tee piatooronuka daaku'tare-nara aa'puu!', "Naniai. Tee tee tee' nari' dake masika'antaveina' nkoaravaing." Ee'noko tee bakaang bautara tee tenang tee-koo batei-koo taarevou'!

*Jiisuu'ke Piita Ba'doraa Taare-antavuu'na'  
(Mak 1:29-31; Luk 4:38-39)*

<sup>14</sup> Tenang Jiisuu' Piita bakanava-koo pora teie Piita ba'doraa teke batanang-koo bempario' oovuu' uipaarii' ninka siipavora.

<sup>15</sup> Ee'noko teie teni bakaang bireng-koo kompuio' tee uipaarii' namu'ke boimpuu', ee'noko te-nie deto i'amparara bau'uru' teing.

<sup>16</sup> Teketa duaa' tumpario' nantoong mmau' ma'narie koriaariko'ning Jiisuu'anko tavo'aaru', ee'noko teie ma'nari kara nanaarei bata'uru', napo'siipa-nupoong taare-antavuru' ookara.

<sup>17</sup> Jiisuu'ke tee' nkovuma tee kara dupe-antavuu' teie Aisaia'ke nakaronunge urikunge minkuvuu'nung Daari Meekung-koo aa'puu'noo'ka,

"Teie niikaning siapananka ee'noko aruaru'nanka nkamemurira dua'uaing." *(Aisaia' 53:4)*

\* <sup>8:12:</sup> Teing miru'nii'nuka teing Ju'nupoong ee'ning.

*Jiisuu'*              *Siong-koo*              *Makotua'na'*  
*Noru'areko'naanka*  
*(Luk 9:57-60)*

<sup>18</sup> Tenang Jiisuu'ke nantoong karingai tee koroai otoroko oovurira bakaning ninka nari' pako'arii'naang botoaru' nuaru'ka amenka'koo karinga te' otoroko.

<sup>19</sup> Teketa narunge boto naunuka-koonge tee-anko pora aa'puu', "Pankaing ee, ninge tee da' siontampaing are' tokoo da' beainoo!".

<sup>20</sup> Teketa Jiisuu'ke maku'uma aa'puu' tee, "Nkaunanka biikaning kumpenanka oto'evoromaung, ee'noko barennanka auvi'au-kooning biikaning bitonanka, teka ning Tee Naning-naumpo' Paning-etaing~ tokoo bore' patu'maravainoo' oto'memua!".

<sup>21</sup> Teketa napo' teing siompaako'ning-koong narung pora aa'puu', "Ovoring, io' taura'meko mma' dako'ampainoo' basinoo' mma' ninka o'noreating, ee'noko mma' dako'amirai'nange da' siontampai."†

<sup>22</sup> Teka Jiisuu'ke aa'puu' tee, "Siperiko boo'nukai bii'ka boo'nuka dako'aariaing, teka da' aa'damaang: Bera daankieaing tee Kumponing bakaang muu!".‡

*Jiisuu'ke Piong Pankaing Bake-antavuu'na'*  
*(Mak 4:36-41; Luk 8:22-25)*

---

† **8:21:** Ee' oro'pari otong: Tee naning kapoo' baumai deing nka-koo noru'uitaa! Jiisuu' tee' minkuvuu!. ‡ **8:22:** Nantoong Jiisuu' domaang okora' tasi'paarimainge tee siompaama domaang isikung oto'evoromaung, teka kansi'koong kapoo' domange dai'aamaing teing domaang okora'keta taapo'nupoong, boo'nuka Kumponing-ankoi.

**23** Teketa tee Jiisuu' bakaasi-nareng-koo aa'earako teing bakaning barevare-nupoong tee siompai nari' aa'eariru'!

**24** Teketa tenkenaara nanaako namu'ke ta'nina' piong pankaing pou' teke nuaru'koo daue. Teketa tee boo'a bakaasi-nareng-koo daue ta'da'parama nanuu', teka Jiisuu' teke aatui otoko.

**25** Teketa teinge bakaning barevare-nupoonge berora tanteaama aa'pau' Jiisuu', "Ovoring, pakumeriai, nii' enang ke'nuru'marii'naang!"

**26** Teketa teie maku'urima aa'puu', "Dii' bakei diikaang baito oki'naa. Aming-koo tee' arore-rimang?" Teketa deto i'amparara teie tee pi-ong ee'noko tee eemaaru' ntong-koong aka'puio' bakei aa'na'tarorovuu'.

**27** Ee'noko teing ta'ninaara nia'kaama aa'paako', "Aung naning aremuri' aa'nung piong tovange eemaaru' dovange taaravaakoo!?"

*Jiisuu'ke Ma'nari Naninka Kenaankara-ita  
Bata'uru'na'  
(Mak 5:1-17; Luk 8:26-37)*

**28** Teketa teing Jiisuu'ninka Kadara'navete-koo tavo'ariko kenaankarai naninkai ma'narie koriaareko'naankai kuvi dako'doma-ita poreta Jiisuu' kune'uretu'. Bakei avo'avoro'ka. Naning teke tankinuarupeu' tenaanka-ankoi.

**29** Poreta aa'puretu', "Jiisuu' ee, dake Kumponing Bauringe nii' arekee' nkomerii'naang? Ai' nii' tora'anta-koo poinge niikaang batei mme' makotuaruko?"

**30** Teketa ee'noo'keta duerue'ke mmau' pooro'navontu meru'arima otoroko'.

<sup>31</sup> Ee'noko teinge ma'nari orenge eentavarima Jiisuu' aa'pau', "Dake bata'merima deeko' pooro'navontu-koo kuung tung-koo taura'meriai."

<sup>32</sup> Teketa Jiisuu'ke aa'puru', "Beriaing." Tee tee tenang ma'nari bakoarira pooro'nanka-koo tumpariru', ee'noko tevontu ootukunavontu pemue doonko koo'ariru' nuaru'koo bera ke'nuru'ariru' teke.

<sup>33</sup> Ee'noko teing pooro' bau'aariko'ning mmariau!. Teketa osi-aape kua'parira dooreaaru' tee ookara kapoo'nanka teke nkoaru'ning napo' ma'narie koriaareko'naanka-koo nkoaru'na'koo.

<sup>34</sup> Teketa ookara nantoong temono-nupoong berou' Jiisuu' kune'koo, ee'noko Jiisuu' ooaara teing aa'na' eentavariru' Jiisuu' teketa temeng-eta biikanameng-eta tenkenuu'naang.

## 9

*Jiisuu'ke Naning Doota Tamparu'antavuu'na'  
(Mak 2:1-12; Luk 5:17-26)*

<sup>1</sup> Teketa Jiisuu' bakaning ninka bakaasi-koo aa'earira pako'arira bakanoo' osi masipo'tavo'ariru'.

<sup>2</sup> Teka nii'ninge nantoonge naning doota tee-aniko tavo'au' batanang-koo bempario'. Ee'noko tenang Jiisuu'ke teing tee tavo'au'ning biikaang baito oovura aa'puu' tee naning doota, "Domang manki'doauka', ee aung, dakaning orarananka tonta'deronsing."

<sup>3</sup> Tee' nkovuko ooaara nii'ninge boto naunukai bii'ka kareaama aa'paako', "Aunge bakei naninge Kumponing bauvaupaa'umaang."

**4** Teketa Jiisuu'ke biikaang noru' noru'ura aa'puru' teing, "Dii' aming-koo diikaang domang-koo kuunge tee' munkururarimaang?

**5** Arera kara masika'poaruko ooverira ning makosi deeaung tammeripeu' aa'ning-koo ee' minku-koo, 'Dakaning orarananka tonta'deronsing,' nii'na' ee' minku-koo, 'Daa'darara naniai.'?

**6** Teka dii'ke iro' noru'koo makosi ning Tee Naning-naumpo' Paning-etaing tee taura' o'nong anke kansi'koo o'noi orarananka tonta'koo makosi..." Tee'pura tee naning doota aa'puu', "Daa'darara dakaang tani' nkavei naniai dakanava-koo."

**7** Ee'noko tee naning deto donkonura bakanava-koo beu'.

**8** Ee'noko ookara nantoong karingai ooaara tee aung karang kamaankiai datavorou'. Ee'noko teinge Kumponing daangampau' tee temurii' taura' nantoong avuru'nung-koo.

*Jiisuu'ke Maatiu' Bokuvuu'na'  
(Mak 2:13-17; Luk 5:27-32)*

**9** Ee'noko teketa Jiisuu'ke nanuma narung naning oovuu' miring Maatiu', taakisi nkavaako'nava-koo ba'nanuio' bakanavaro-koo. Teketa Jiisuu'ke aa'puu', "Ning siomeai." Ee'noko Maatiu'ke deto donkonura tenang-eta deto tee siompui nanuu'nung.

**10** Teketa taamang nkovuu'nung-koo Jiisuu' ba'nanuu' bakaning barevare-nupoong ninka ee'noko nantoong mmau' nii'ning orenanka aa'ning taakisi nkanuka porora ba'naniaara tee

ninka nari' taamanau' teke Maatiu' bakanavako.

<sup>11</sup> Ee'noko teinge Boto Keperuu'navitue tee' ooaarira teing bakaning tee siompaako'ning nia'aarima aa'pau', "Diikaang pankaing amingkoo taakisi nkanuka ninka ee'noko nantoong orenanka nari' taamanaamaang?"

<sup>12</sup> Ee'noko Jiisuu'ke tee' taaravura aa'puu', "Teing nantoong tampa' otoroining naninge nankai'urii'naang piavoroa', teka teing siipavoromaing naing piavoromaung.

<sup>13</sup> Berira io' tee kara daari meeckung-koong-koo tampa' barerariaing aa'pumanaare, 'Ninge tee aarumo piaa unaa-anta-po'nung pi-amoi o'nong, tee boontunang deea!' (*Osea 6:6*)

Ai' ning nantoong tampenanka-anko moa'. Ning orenanka-koo mou'nung nauaranko bere'aria'naang."

*Jiisuu' Unkumo-koo Nia'au'na'  
(Mak 2:18-22; Luk 5:33-39)*

<sup>14</sup> Napo' Jooni bakaninge barevare-nupoonge porora Jiisuu' nia'aama aa'pau', "Da' dakaning da' ninka nanirimaing arekee'koo dootuu'koong aarumo siompai unkumuariaung? Ee'noko nii' Boto Keperuu'navitu ninka unkumumarikoo!."

<sup>15</sup> Ee'noko Jiisuu'ke maku'urima aa'puru', "Teing nantoong baranee'navitu nampeesi-koo poromaing naning nampeesinara ninka nari' otoroi arekee' napo' orarunsiaripeu' tee nampeesinara teke otoko? Batei tee otong tee naning nampeesinara teing-eta

tonta'aravaina'mung, ee'noko tenang teing doong-koo unkumoariaing.

**16** Naninge tee baarong nerakara' urikara' ninka naro'ka pate'uarupeu', ai' nerakara'ke tera' urikara' beeto'uko dere'arara oraru'kupeu'.

**17** Napo' nantoonge nerakaru' uaininaru' urikaro'koo pare'aavarupeu'. Tee' nkaoako deeko' tee, tero' naka'arako teru' uaininaru' dakoarapeu' ee'noko tero' tenang oraru'kupeu'. Teru' nerakaru' uaininaru' nerakaro'koo deeko' pare'koo makosi, tee'koo ookeng tampa' otorepeu'."

*Teni Nerai'na' Boo' Ee'noko Napo' Manikuma  
Siipa-po'nani Taarevoretu'na'  
(Mak 5:22-43; Luk 8:41-56)*

**18** Tenang tee' minkuvuma teke otoko narung pava dootuu'nav a tanatanuka-koong narung tavo'arara tee-koo uro'kanoo' kinkinui eentavarama aa'puu', "Nnorang bakei enang oki'naruu'kuing. Porai'nange teni-koo bireng pante'eko teni domamparavai."

**19** Teketa Jiisuu' donkonura tee ninka nari' beretu' ee'noko teing bakaning barevarenupoong nari'.

**20-21** Teketa tenang nii'nani naning manikuma kivora-ita kemare'ka-koo tarumatearako'nani tee-koo dama'du pora bakaang mononopa'koo kainu' kompuu', ee' noru'arara, "Bane oki'noo' kompamira bakaang mononopa'koo, ning teni taaremoainani."

**22** Teketa Jiisuu'ke bere'arara teni oovura aa'puu', "Ani ee, da' doturaravaing. Dakaang

baitoi taarerooinani." Ee'noko teni manikuma tenang ee'nang taarevou'!

<sup>23</sup> Ee'noko tenang tee Jiisuu' tee naning pava dootuu'navaa tanatanuka-koong bakanava-koo koinura nantoonge patuaiarima, biromparima naampavaako oovuru' bakei karingai.

<sup>24</sup> Ee'noko teie aa'puru' teing, "Oko sirariai, ani nerai'na' booa', teka tamung aatumaang." Ee'noko teinge benkempau' tee.

<sup>25</sup> Teketa teing nantoong karinga dama'du etuvurira teni nerai'na' otou'navaro-koo tumparara teie bakaang bireng kompu deto i'ampuko teni daa'aru'.

<sup>26</sup> Ee'noko tee-koong aung-koong doorenang tee ootukunairu-koo beremparu'nung.

*Jiisuu'ke Kaputu'ka Bantang-antavureta  
Naning-koo Ma'naang Amako Bata'uu'na'*

<sup>27</sup> Ee'noko teketa nanuko Jiisuu' kenaankai naninkai kaputu'kai bokurema siompuretu' aa'purema, "Pankaing, Deevita' bakanaving-koong, Piaamereing nee!"

<sup>28</sup> Ee'noko teketa nii'nava-koo tumparako tenaanka kaputu'ka tee-anko poretu', ee'noko Jiisuu'ke nia'urema aa'puretu' tenaanka, "Dee'ke ee ning makosi masika'antameresi otong ningepiaroresina' nkorampee'naang?" Maku'urema aa'puretu', "Ee', Ovoring."

<sup>29</sup> Ee'noko tenang teie beekaang duta kompurema aa'puretu', "Deekaang baito-koo makosina' nkoaravaing dee'koo."

<sup>30</sup> Ee'noko beekaang duta tenang bantou'. Ee'noko aa'na' orokovuretu' aa'purema, "Teka aung naninge noru'uauka', makempereing."

<sup>31</sup> Teka tenaankai tee bereta Jiisuu'koong doorenang bereng-antavuretu' ootukunairu-koo temeensi'kooning-koo.

<sup>32</sup> Teketa napo' tenkenaako nii'nung naning ma'naange korivuko karoaruko'nung Jiisuu'anko tavo'au'.

<sup>33</sup> Ee'noko tenang tee ma'naang bata'ui'io' tee karoaruko'nung karou', ee'noko nantoong karingai ooaara ta'ninaara aa'pau', "Kapoo' ee' oro' ooampiaruu'nung teroita nii'koo Isireeli-nupoong-koo meu'ka."

<sup>34</sup> Teka teinge boto keperuu'navitue aa'pau', "Tee aa' ma'nari biikaang pankaing bakaang iri'ke tee' bata'urimang ma'nari."

## **Jiisuu'ke Bakaning Barevare-nupoong Mintoong-koo Botovuru'na'**

(9:35-10:42)

### *Nantoong Mintoong-nupoong Oki'ning*

<sup>35</sup> Jiisuu' tee tee' nari' osinankai pankenge ee'noko oki'nareka'ke nanuu' nau-antavurima biikaning pava dootuu'hanka-koo daankiarama, aa'noma, tampara doorenang daankivuma tee muu' paninung-koong ee'noko siapananka amute-murii' taare-antavurima.

<sup>36</sup> Ee'noko tenang teie teing nantoong karinga oovurira bakaang domang aa'na' piaavou' teing ereananuka ee'noko aruaru'nuka

deempariri otoroko'nung-koo, teing-pina'  
sipisipi' tanatanungropanuka-pina' oro'pariko.

<sup>37</sup> Teketa teing bakaning barevare-nupoong  
aa'puriko', "Sinang tee bakei aa'na' meura'puing,  
teka kavu'nupoong oki'ning.

<sup>38</sup> Tee'koo kunsirariaing sinang kavu'koo  
Ovoringe kavu'nupoong botovuriaina' tee-koo  
bakaang mintoong-koo."

## 10

*Aing Mirinanka Nanai'keta Kenaankara-koong  
Kara Okovuri Nkanuka  
(Mak 3:13-19; Luk 6:12-16)*

<sup>1</sup> Jiisuu'ke teing nanai'keta kenaankara  
bakaning barevare-nupoong tee-anko  
bokuvurira taura' avuru' makosi-antavurima  
ma'nari oreng bata'koong ee'noko napo'  
siipananka amutemurii'taare-anta-koonge.

<sup>2</sup> Aing teing mirinanka teing nanai'keta  
kenaankara kara okovuri nkanuka biikaning:  
Tutuna'nung Saimoni', nii'noo' Piita, ee'noko  
teie baara'ma'nung Aanduru'; napo' Jeemisi,  
tee Siebedi baurung; ee'noko baara'ma'nung tee  
Jooni.

<sup>3</sup> Napo' narung Pilipi', ee'noko narung  
Baatolomiu', napo' nii'nung Toomasi ee'noko  
Maatiu', tee ee'nung taakisi nkanuka-koong;  
napo' nii'nung Jeemisi, tee Alopeasi baurung;  
ee'noko narung Ta'deasi.

<sup>4</sup> Napo' nii'nung Saimoni', Ju' bii'ka donkong-  
koo pia-navitu-koong; ee'noko narung Judasi Ke-  
rio'nara, tee tooka kompui Jiisuu' taura'puu'nung  
bakaning kare-nupoong-koo.

*Jiisuu'ke Teing Nanai'keta Kenaankara Nko-nko  
Nkoava'naang Botovuru'na'  
(Mak 6:7-13; Luk 9:1-5)*

**5** Teing aing nanai'keta kenaankara Jiisuu'ke botovuru' kara aung ninka tautauvurima, "Ju'deeaing biikanoo' beriauka', napo' Sameria'kooning-koo osi-koo beriauka'.

**6** Teka teing Isireeli-nupoong sipisipi'pina' pooariru'ning biikanairu-koo beriai.

**7** Berira kara aung anaare daankieriai, 'Tee muu' paninung tee enang due' poing!'

**8** Ee'noko siipa-nupoong taare-antaverereriai. Napo' boo'nuka domampereriai. Oramuu'po'nupoong kiiroraa'antaverereriai. Ee'noko ma'nari bata'ereriai. Aung amurii' iri' tamung arompiring ee'noko dii'ke napo' tee' tamung pakuereriai tee ninka.

**9-10** Aing aa'ning kapoo'nanka nkaveriauka': mooni'nanka kerekako kuunga, miku taamang-po'nung, nii'noo' mononopa' paripari', ee'noko boonamante~, napo' donsi' nkaveriauka', ai' tee tee pakuereriko dii' napo' teinge pakuraariaing.

**11** Aremono-koo dii' beriaianamono-koo pankamono-koo deeko' nii'noo' osi oki'namono-koo deeko' naning makosi besi'eriaing teka, ee'noko tee ninka otoriae bakanava-koo bera tenkenirainoo'ke basi.

**12** Tenang teva-koo tuntarima mooa-antaveriai tee naning.

**13** Ee'noko teie teva'koonge nkaang kara taarakoo aroo'uaing deeko' tee mooa teke teva-koo otoaing tee ninka, ee'noko aroo'uauka'nung deeko' tee napo' diikaang mooa dii'koo napo'

toroaravaing makosi.

<sup>14</sup> Naninge onkeonke'duriauka'nung deeko' ee'noko diikaang kara taaravuauka' teketa tevaita, nii'noo' osi-eta, tenkenirima temono-koong da'mong tankaveriaing diikaang pe'naa'keta temono Kumponing-koo maarekusi'namono taa'ni'antaveri.

<sup>15</sup> Masika' naurampimang ninge, te'mung simpe' nkona'mung kiimata temono-nupoong biikaang koonto' bakei dau basi deemparavaing teing-koo temu'nupoong oreng-koo biikaang osi Kumponinge paro'uu'ning-koo, aa'noko Sodom ee'noko Komora'."

*Mankimanki' Amutemurii' Tavo'kuaiing  
(Mak 13:9-13; Luk 21:12-17)*

<sup>16</sup> "Aing ee, ninge tee dii' sipisipi'nankapina' botorampimang nkaunanka-koo meu'ke botorampipeu'na'.

<sup>17</sup> Tee'koo donta'peri naniriai, ai' dii' teinge nantoonge koompaara'navitu-koo tavo'daariaing, nii'noo' mura'daariainge dootuu'arimanairu-koo.

<sup>18</sup> Dii' teing ning-koo dai'daarira donkong-antaraariaing ovo'ma'nuka-koo ee'noko dauraronanka-koo uro'kanoo'. Tee' nkoaravaing dii' nkaang kara sira'koo miru'nii'nuka deentariko, teing-koo ee'noko ookara Ju'deeaing-koo.

<sup>19</sup> Teka teinge tee' tuutunang~koo be'antaraariko kapoo' minkueriaining ee'noko minkueriaina' noru'erima avitoitoinoruu' manki'doriauka'. Ai' tenang ee'nang

nia'daariko Kumponinge naururiaing kapoo' minkueriaining.

<sup>20</sup> Dii' dii'ka tee kareriauka'nung, teka tee Tanuaang Meekung Diuma-itaing dii'koo kuunge karoaing.

<sup>21</sup> "Napo' aa'noainge: bataatai tooka kompu baara'ma'nung taura'puasing dupisi'aava'naang, ee'noko baumai bauring tee' nari' nkovaui. Napo' biurukaa'ke biumaraang turampaarima dupisi'aari-ainge.

<sup>22</sup> Dii' teing ookara nantoonge munte'daariaining ning nkaang miring-po'nupoong deentariko, ee'noko naning purimpario' bera asirana'mung basiaravaing deeko' domamparavaing.

<sup>23</sup> Tenang dii' manki'antaraariko nii'namonokoo teketa nii'noo' napo' koo'dariai. Masika' nau-rampimang ninge, dii'ke teing osinanka Isireeli-nupoong otoromaing nanrima operiaruko tee ning Tee Naning-naumpo' Paning-etaing moaing.

<sup>24</sup> "Tee naning barevare-nung bakaang nau-anta-koo dau basi deea'. Napo' teie botovotona'a' bakaang pankaing-koo dau basi deea'.

<sup>25</sup> Teka tee tee naning barevare-nung bakaang nau-anta-pina' nari' nkovaavaing. Napo' tee botovotona'a' tee' nari' tee-pina' bakaang pankaing-pina' nkovaavainge. Ning tee nkanavitu-koo bore' Kopeu tamamaama poore'maamaung deemarako dii' teing nkanavitu baru' aa'noo' poore'daariaining.

<sup>26</sup> Teing-koo aroreria' otoriai, ai' ookara kapoo'nanka nopa'ari otoining teing

sira'paravaining. Ee'noko ookara kara baku'nii' nantoonge ookarai taaravaavainge.

<sup>27</sup> Kapoo' ninge mutaanano'ke naurampimaing doonaa' nau-antavereriaing. Kapoo' iaantampiko taaraverira deto karerima daankieriaing."

*Kumponing Narung-koo Amorompiai  
(Luk 12:2-9)*

<sup>28</sup> "Aroreriauka' teing-koo nkaang kara avo'aama diikaang mono dupisi'aavaining-koo teka diikaang tanuaang dupisi'aavarupeu'. Teka Kumponing-koo aroreriai aa'nung-koo: baitoveriaruko mono ee'noko tanuaang ookeng dua'ureai mosianung-koo.

<sup>29</sup> "Noru'eri otong nantoong keura barenning oki'nareka' baaveaamaung nau mooni'nukoo, teka bane oki'ninge, Diumai taura'puaruko kansi'koo teing-koo nau dua'aravarupeu'.

<sup>30</sup> Napo' tee'ke ookara daponanka diikaang bore'koo tee deerunii'nanka otorong.

<sup>31</sup> Tee'koo dii' aroreriauka', ai' dii' teing baru' deto basinoo' noru'duri otong bareng oki'nareka'koo.

<sup>32</sup> Ookara teing nantoong-koo uro'kanoo'ke ning aroo'mai otoing sira'pariko ningee tee'ke tee Mma'koo uro'kanoo'ke teke paning-koo nkaning tamparampaing.

<sup>33</sup> Teka baa tee naning ning penkemuaiing nantoong-koo uro'kanoo'ke ningee tee'ke tee' penkempampaing Mma'koo uro'kanoo'ke teke paning-koo."

*Jiisuu' Dau Basina' Noru'ampiai Ee'noko Bakan-ing Pakuarampiai  
(Luk 12:51-53; 14:26-27; Mak 9:41)*

**34** “Ee' noru'eriauka' ning kansi'koo mou'nung turanturang bake-anta-koo. Turanturang bake-anta-koo moa', teka siivenke' nkoaraa'naang mou'nung. Aa'noaing, narionge ning masika'antamaavai ee'noko nii'narionge masika'antamaavauka'.

**35** Ee'noko tee' nkoarama naning bauma-koo turani' deemparavai ee'noko baurang napo' bauko-koo turani' deempaaravaing, ee'noko napo' baampuru'naang bakaampo-koo.

**36** Naning bakaning kare-nupoong teing ee'ning bakanava-kooning.

**37** Ee'noko baa tee naning baumararing aa'na' piaavuremaung ning divu'mui ning siong-koo makotua'. Ee'noko napo' baa tee naning baurukaa' aa'na' piaavurimaung ning divu'mui tee tee ning nkaang naning deempari oto'koo makotua'.

**38** Ee'noko baa tee naning ning siong-koo baike aa'barata'koo~ kune'koo taura'paravarupeu'nung tee makotua' nkaang naning deempari oto'koo.

**39** Baa tee naning bakaang domaang baka tarearamaung tee bakaang domaang tee paa'aravaing, ee'noko baa tee naning ning siomuma bakaang domaang dua'uaing tee teie napo' daa'uaing tee domaang.

**40** “Baa tee naning dii' onkeonke'duriaing teie tee ning onkeonke'muaing, ee'noko baa tee naning ning onkeonke'muainge teie tee Naning

onkeonke'uaing ning botomuu'nung.

**41** Ee'noko baa tee naning tee Kumponing bakaang nakaronung onkeonke'uaing tee Kumponing bakaang deemparako teie tee bakaang nakaronung-pina' nari' Kumponinge moo'uaing. Ee'noko baa tee naning tee naning koonto'onkeonke'uaing koonto'deemparako, teie tee tee-pina' koonto'pina' nari' moo' nkavuaing.

**42** Ee'noko ninge masika' naurampimang, baa tee naning aing oki'nareka'koo narung ntonaru'avuaing ka'matonaru' tee ee'nung nkaang barevare-nung deemparako teie tee koonto'divu'uauka' tee bakaang moo'; nkavuaing."

## Jiisuu' Baa Masikung?

### 11

(11:1-16:20)

*Tee Jooni Minkinara Jiisuu'koo Nia'kuu'na'  
(Luk 7:18-23)*

**1** Teketa Jiisuu'ke teing bakaning nanai'keta kenaanka barevare-nupoong tautauvurikotaa'bakearako osinanka-koo Kaaleli'nameng-kooning-koo due'ke daankinamparama nau-antavurii'naang beu'.

**2-3** Ee'noko Jooni Minkinara kiimata-nava'koo otoi teing kapoo'nanka Karistoo'ke nkovuko'ning taaravura teie kenaankara bakaning barevare-nupoong-koo botovuretu' tee Jiisuu'anko tee nia'urema aa'puree'naang, "Da' ee tee tavo'kuaing-koong, ai' mme' nii'nung nempampiainge?"

<sup>4</sup> Ee'noko teie aa'puretu'nung tenaanka, "Bereta nauereai tee Jooni Minkinara kapoo' dee'ke ooveresining ee'noko taaraveresining;

<sup>5</sup> Aa'noining: kaputu'nuka banteaama ookai, kau' de'doonuka nanai, oramuu'po'nupoong kiiroraa'ariri ee'noko kipaunuka taareai, boo'nuka daa'ariri, ata'oinku tampara doorenang daankianko taaravai. (*Aisaia' 29:18-19; 35:5-6; 61:1*)

<sup>6</sup> Ee'noko biraankearavaing tee naning ning-koo date'pari baitoaravaing, ee'noko nkaang nko-nko akovee' mare'uauka!"

*Jiisuu'ke Tee Jooni Minkinara Minkuvuma Nau-vuru'na'*  
(*Luk 7:24-35*)

<sup>7</sup> Teketa Jooni Minkinara bakanaanka karan-kara toroareko Jiisuu'ke kara-nau tutumpuru' nantoong karinga Jooni minkuvuma, ee'noko aa'puu', "Dii'ke aremurii' naning doore taaraverira mee'bora' sirakamaa'koo ooverii'naang beriko' karika'duri? Naning tunsi-paaka onou avitoitoi eeari oto' oo-koo te' beriarupeu', ape'?

<sup>8</sup> Napo' naning nepu'arama kirokaiari otomaung oo-koo beria!, ape' aing? Ai' teing nantoongbaarong tampenge nopa'arimaing dauraronanka biikaning-koo pava-koo oovereripeu', mee'bora' sirakamaa'koo deea'.

<sup>9</sup> Teka arekee! masika' oro' oo-koo beriko' dii!, ai' narung nakaronara? Ee', tee bakei nakaronara masikung Kumponing-etaing emu' ninge naurampimang dii!. Tee tee aa'nung ookara nakaronuka-koo dau basie tee.

<sup>10</sup> Ai' aung ee'nung miru'ui Daari Meekung-koo ee' minkuari otong Kumponing bauring Karis-too' temu' nauvuu'noo'ka aa'puma,

'Ee aung, ninge botoampaing nkaang karan ka da'koo uro'ke tee taung maamu- antareruaing uroitaa!.' *(Malakai 3:1)*

<sup>11</sup> Masika' naurampimang dii', Jooni tee ookara nantoong tee-koo uro'ke ponto'ariru'ning-koo tee deto basi pankaing, teka ninge ee' naurampi- mang, enang-eta deto baata teing ninge tare- koo aroo'ariaining, bane Kumponing bakaang muu'koo miring oki'nareka', teinge tee Jooni puru'ai otoroaing.

<sup>12</sup> Teketa Jooni Minkinarai daankinang tutumpuu'noo'keta bera doong e'munung- koo basi-noo'koo tee paninung muu' tee iri'oi daa'aramang, ee'noko teing te' muu'koo kuung poromaing teing iri'oroi tee-koo pinka'arimaing.

<sup>13</sup> Ai' tee tee uripo'keta nakaro-nupoong ee'noko Moosesi-nung botoi paninung muu' tavo'aravaina' tarampeearima~ minkuau' bera Jooni bakaang batei-koo basi.

<sup>14</sup> Dii'ke masika-antaveriaing deeko' tee Jooni tee ee'nung Eliasi miru'ari otong Kumponing e uro'ke poo'naang tampuu'nung teinge nakaro- nupoonge minkuau'na'.

<sup>15</sup> Dii' punkang-po'nupoong deeko' enang taar- averiai!"

<sup>16</sup> Teketa Jiisuu'ke napo' aa'puu', "Dii' nantoong emu'navarang ninge aminge pa miru'dampipeu'? Dii' teing toire'pina' oro'nanka baaveroma ba'naniai turampeemaing bii'ka aa'peema,

**17** 'Kovi puunterorompiko konterorima neekarariarukoo!', Ai'nontu'mariko dii' birontariarukoo!.' Tee' nari' oorarampimaung nee' tokomererimaing.

**18** Jooni Minkinara porai'nange taamang tovang uaini kerempuko konterorima aa'periko', 'Tee ma'naang-po'nung.'

**19** Ee'noko ning Tee Naning-naumpo! Paning-etaing mora taamanama tuaamarako napo' konterorima aa'merimaung, 'Aung ooveriai taamang ee'noko uaini nai bauko, taakisi nkanuka ee'noko nii'ning orenge bii'maiko'ke!' Teka Kumponinge avutevu'muresi botomuresina' sinampuko dii'ke bakaang matau tasi'periaing.'

*Piaaru'nanka Bakei Teing Osi Pankeng  
Bere'ariaing.*

(Luk 10:13-15)

**20** Teketa tenang Jiisuu'ke teing osi pankenanka taa'ni'antananka nkovuko ooau'ning daankiarama turampuru'nung bere'ariaruko oovurira.

**21** Aa'puru', "Baka'e piaaru'nuka dii' Korasin-nupoong, tora'kiriaining. Piaaru'nuka dii' Besaida-nupoong, dii' tora'kiriaininge, ai' dii' teing kapoo'nanka iri'po'ning ta'nimpaarii'nanka dii'koo nkoaru'ning ooverima bere'dariaruu'. Teinge Ju'deeaing Saidoni'nupoong ee'noko Taia'nupoonge ooaara dei namu'ke bere'aripeu' sipunge poo'arima mononopa' orarunsi-koong kurumparipeu' bere'ariru'nung-koo taa'ni'antavarima.

**22** Teka aa'dampimang, te'mung Kumponinge nantoong simpe'urima kiimatavuriaina'mung

dii'ke dau basinoo' tora'periaing Taia' naankai Saidoni' tora'pureainoo'keta.

<sup>23</sup> Ee'noko dii' Kapaneume'nupoong deto paning-koo basirariaining-pina' daang noru'darimaing. Dii' doonko mosianung-koo sing-antaruriaining. Teing taa'ni'antananka dii'koo nkoantu'ning Sodom-namono-koo nkoantu'nung dei temono tee tee' nari' otopeu' e'mung-koo basinoo'koo.

<sup>24</sup> Teka ninge ee' naurampimang te'mung simpe' nkona'mung kiimata bakei aa'na' tora'periaining dii', teing-koo temu'nupoong oreng-koo dau basinoo', biikaang osi Sodom Kumponinge paro'uu'ning-koo."

*Manki'po'nupoonge Uaa Kompaavaina'  
(Luk 10:21-22)*

<sup>25</sup> Tenang ee'nang Jiisuu'ke aa'puu!, "Mma' ee, tampara tantamang da' Ovoring paning-koong ee'noko kansi'koonge, dake aa'nou'nung-koo: Dake tee doorenang tampara baku'eu'nung-koo teing-koo matau-po'nupoong ee'noko noru'po'nupoong tamparimaing-koo ee'noko sira'peu' teing-koo tootoia-pina' otoromaing-koo.

<sup>26</sup> Teing nantoong piaaveri piarou'na' tee'. Ee', Mma'."

<sup>27</sup> Ee'noko nantoong karavurima aa'puru', "Ookutunung kapoo'nanka tee Mma'ke pare'muu'nung, ee'noko naning otoa' ning Tee Bauring noru'mui otoing, Mma'ke deeko' noru'mui otong. Ee'noko napo' naning otoa' Mma' noru'ui otoing, teka ninge Bauringe deeko' noru'ansi o'nong. Ee'noko nantoong teing

naing ninge Bauringe miru'arampaining-koo  
oro'antavanko noru'aavaing tee.

**28** “Ning-koo poriai dii’ ookara iri’  
o’darima manki’dorimaing avutevu’ matau  
siomperima pore’dorimaing, ee’noko ninge uaa-  
antarampiaing diikaang tanuaang.

**29** Ning nkaang tare-koo kuung porira ning-koo  
barerariai, ai’ ning tee banainge oto’, ee’noko do-  
mang boonko noru’mari oto’ke. Ee’noko ning-koo  
tee diikaang tanuaang uaa-anta komperiaing.

**30** Ning tare-koo dii’ aroo’dariri dei  
manki’doria’ kuaa’doripeu’ ning siomeritaa!”

## 12

### *Tee Niania' Doong Uaana'mung-koong* (Mak 2:23-28; Luk 6:1-5)

**1** Teketa due’ka nii’na’mung Doong  
Uaana’mung Jiisuu’ uite’naue~ tankinuko  
bakaninge barevare-nupoonge tee siompaama  
peeravorora nii’ning bii’da’pau’nung uite’koong  
sinang-koo untu’noo’, ee’noko naako’paama  
maa’au’ tamung tankinaama, Ju’nupoong  
biikaang aarumo-koo taura’pari otoina’!

**2** Teka teinge Boto Keperuu’navitue~ tee’  
ooaarira aa’pau’ tee Jiisuu’, “Ooveko, dakaning  
barevare-nupoong mintoomparimaang boto  
toto’paitaa’ Doong Uaana’mung-koong.”

**3** Ee’noko Jiisuu’ke maku’urima aa’puru’,  
“Dii’ke aming-koo tee’ tuumpimerimaang?  
Tampa’ noru’eri otong tee kapoo’ Deevita’ke  
nkovuu’nung tenang tee peeravora, tee Deevita’  
ee’noko teing nari’ otoroko’ning ninka.

<sup>4</sup> Kumponing bakanava-koo Deevita' koinura nkavura naiau' tee taamang meekung, nii'ninge nai-koo taura'parava', teka piristi'nuka nainge deeko' nai-koo makosi. Ee'noko teie Deevita'ke teing nari' otoroko'ning avurio' boto toto'koo tuumpiaava'.

<sup>5</sup> Napo' ee ampankeena'doring Moosesi-nung botoi tampuio' teing piristi'nuka dootuu'nava pankava-koo pareka nkaoamaung bane tee Doong Uaana'mung-koong boto otoi otoko, ee'noko tuumpi-koo otoroa' dootuu'nava pankava bakaang mintoong dau basi deempari otoko.

<sup>6</sup> Teka ninge ee' naurampimang, naning dootuu'nava pankava-koo dau basi aung anke otong.

<sup>7</sup> Aung anaare kara Kumponinge aa'puu'nung, 'Ninge tee aarumo piaa unaa-anta-po'nung pi-amoi o'nong, tee boontunang deea!' (*Osea 6:6*)

Tenaare tasi'peri noru'ering deeko' dii'ke ning tee tuumpiropa napo' tuumpimeriarupeu'.

<sup>8</sup> Ai' tee ning Tee Naning-naumpo' Paning-etaing tee Ovoring Doong Uaana'mung-koo ee'noko taura' avorompeu' nantoonge kapoo' nko-koo."

*Jiisuu'ke Doong Uaana'mung Taare-anta  
Nkovuu'na'  
(Mak 3:1-6; Luk 6:6-11)*

<sup>9</sup> Ee'noko teketa tenkenura biikaang pava dootuu'nava-koo tumparara Jiisuu'ke nau-antavuriko' narung naning teke otoko bireng duuai'.

<sup>10</sup> Ee'noko teinge Boto Keperuu'navitue turang-koong taung besi'aama nia'aama aa'pau' tee, "Arekee', Doong Uaana'mung ee taare-anta nkoko taura'pari otong?"

<sup>11</sup> Jiisuu'ke aa'puru' teing, "Dii'koo nii'nung sipisipi'navoro' oto'evuing ee'noko tevoro' dinkung-koo dua'arapeu' Doong Uaana'mung, ee'noko teie tevoro' te'mung kompura ee taaru'uarupeu'? Tee aa' taaru'upeu'.

<sup>12</sup> Ee'noko naning ee sipisipi'koo dau basi deea'? Tee aa' naning tee sipisipi'koo dau basi. Tee'koo botoi taura'murimaung Doong Uaana'mung naning tampa' nko-nko."

<sup>13</sup> Teketa Jiisuu'ke aa'puu' tee naning, "Bireng tovoro'daravai." Ee'noko tovoro'arara koonto' bakei tamparu'kuu' nii'naang-pina' ba'maiko'naang-pina' nari'.

<sup>14</sup> Teka teing Boto Keperuu'navitu-koonupoong teketa siarira mumunsiariru' Jiisuu' dupisi'aavaina' minkuaama.

### *Jiisuu' Tee Botovotonaa' Kumponinge Miru'nii'*

<sup>15</sup> Teinge tavaava'naang mumunsiariko noru'uitaa' Jiisuu' teketa tenkenuko nantoong karingai siompau' tee, ee'noko teie taare-antavuru' teing ookara biikaning siipananka.

<sup>16</sup> Ee'noko teie orokovuru' teing tee Kumponing baurung sira'paavaroo'naang.

<sup>17</sup> Tee' nkoarara tee dupe-antavuu' tee kara Kumponinge tero tee nakaronung Aisaia' karan-tavuma~ minkuvuu'nung aa'puu'noo'ka,

<sup>18</sup> "Aung tee nkaang muu' tanatanara ninge miru'antu'nung. Tee ee'nung

ninge piaavamaung, ee'noko ning dotumaramaung tee-koo. Ningee tee nkaang Tanuaang tee-koo sipampaing ee'noko teie teing Ju'deeaing koonto'na' aarumo nau-antavuriaing.

- 19 Tee tee nantoong ninka tatari'eeauka', napo' bokuauka'. Naninge taung pankenankakoo bokuko bakaang aurong taaravuauka'.
- 20 Nantoong aruaru'nuka doonko mme'uriauка'. Noru' oki'nung sirivaa'uauka', bera tee koonto'nung aarumo iri'antavui dau basi-antavuainoo'ke basi.
- 21 Ee'noko tee-koo bakaang miring-koo ookara nantoonge noru' sipaavai." (*Aisaia' 42:1-4*)

*Jiisuu' Oraka' Minkuau'na' Tee Kopeu Ba'maiko'  
Daang Tampaama*

(*Mak 3:20-30; Luk 6:43-45; 11:14-23; 12:10*)

22 Teketa tee-anko naning ma'naang-po'nung kaputu' karoaung tavo'au'. Ee'noko Jiisuu'ke taare-antavuio' karou', duta bantou'.

23 Ee'noko ookara nantoonge ta'ninaara aa'pau', "Aung pa tee Deevita' baurung, Kumponinge Pako'pari'nii'."

24 Teka tenang teinge Boto Keperuu'navitue tee' taaravaara aa'pau', "Tee aa' Kopeu bakaang purinto'ke ma'nari bata'urimaung, tee ma'nari biikaang pankaing."

25 Ee'noko Jiisuu'ke biikaang onou tasi'pura aa'puru' teing, "Ookara muu'nanka bii'ka siivenke'arimaing kare-nupoonge pini daako'aarimaung. Ee'noko napo' tee puata' nii'noo' osi siivenke'eemaing teie dua'arimainge.

**26** Ee'noko napo' teie Sietani'ke bakanamuiaang bata'urira tee tee baka siivenke'arapeu' ee'noko tee'koo arekee' bakaang muu' donkonui nari' otopeu'?

**27** Ee'noko ooveriko dii' siontaarimaing-koo nii'ning ma'nari bata'aarimaing otorong. Ee'noko ninge Kopeu ninka ma'nari bata'aramaung tamperima deeko' teing siontaarimainge baa ninka bata'aarimaung tamperikoo'? Arekee', teing napo' ning-pina' nari' Kopeu bakaang purinto'ke bata'aarimaing tamperererimaang ee? Tee' taararaarira teinge tuutunantaariaing dii', ai' teing tee'ke ni'ninka nari' nkomarimaing.

**28** Teka Kumponing bakaang Tanuaang Meekunge ma'nari bata'aramaung deeko' tee muu' Kumponing bakaang tee dii'anko taa'ni'poi poing.

**29** "Ai' naninge naning purinto' bakanava-koo arekee' koinura ookara kapoo' bakaning nkavupeu' tee naning purinto' tutung dai'ua'? Dai'ura deeko' pari'upeu' bakanava-kooning kapoo'nanka.\*

**30** Ee'noko dii'ke tasi'meriarura dii' teing ning-koo kare-nupoong, ee'noko dii' ni'ninka nari' nantoong oosiarampiarura dii' purarenka' nkonuka Kumponing bakaang muu'keta.

**31** Tee'koo ee' naurampimang, tee aung diikaang oraka'nko tonta'aravauka'nung, ai' ookara oraka' nkonanka ee'noko oraka' minkunanka nantoong biikaning teing tonta'aravaining, teka naning Tanuaang Meekung Kopeu dovang tam-

---

\* **12:29:** Jjisuu' tee'ke, Sietani' puru'uitaa' pari'umaung teing pinka'urimaing.

puma oraka' minkuvumaung tonta'anta kom-puauka'nung.

<sup>32</sup> Ee'noko baa tee naning tee ning Tee Naning-naumpo' Paning-etaing oraka' minkumuaing tee Kumponinge tonta'anta-koo makosi. Teka tee naning Tanuaang Meekung mintoomparako oraka' minkuvuaing tee tee tonta'anta-koo makosi deea', enang anke aung batei-koo napo' dama'ke dama'nung batei-koo.

<sup>33</sup> Sinang tampara tamperiaing deeko' tevari koi'navari tee' nari' tampavari tamperiaing. Sinang orara deemparako deeko' tee koi' tevari oravari tang-koo makosi, ai' ookara koi'nanka tee sinang-koo tasi'parampimaung. Enang arekee'koo kapoo' tampeng nkoanko Kopeu-etaing tamperimaunge?

<sup>34</sup> Dii' borukoporonuka doparopa-po'ning, dii' teing oreng masikeng sira'darimaing kapoo' koonto'na' minku paa'erima! Ai' kapoo' tee domang-koo otoing piamparako karange minkuerimaung.

<sup>35</sup> Teie naning tamparai tee teieta tampara domang-koong kore'nang-eta tampara tavo'antavumaung ee'noko teie naning orarai tee teieta orarananka domang-koong kore'nang-eta orara tavo'antavumaung. Ee'noko naning orarai orananka kapoo'nanka tavo'antavukoo' bakaang domang-koo oreng kore'nang oto'evumaing-eta.

<sup>36</sup> Teka ninge ee' naurampimang, te'mung simpe' nkona'mung tee ookara karananka anutua minkuerimaing sira'deruriko maku'eriaing.

<sup>37</sup> Teie ee'nunge diikaang karanankai simpe'duriaining dii' koonto'nuka nii'noo'

koonto'nuka deeaing tanturiaing deeko!"

*Taa'ni'anta Oo-koo Nii'ninge Piavorou'na'  
(Mak 8:11-12; Luk 11:29-32)*

**38** Teketa tenang teinge Boto Keperuu'navitue ee'noko napo' teing boto nau-antanukai aa'pau' tee, "Nau-anta, nii' taa'ni'anta dake nkoveko oo-koo piamorimang."

**39** Jiisuu'ke maku'uma aa'puru', "Dii' enanavarang bakei oreng, nampeesi orarinukapina' diikaang Ovoring siperima, tosirarima aa'merimaing, 'Taa'ni'anta paning-etaing iro' naumeriko deeko' taararampiaing.' Bakei Kumponinge dii' taa'ni'anta nau-koo kasivuarura narung masikung aruri'naang, aa'noaing: Teie ning taa'ni'anta deeng-antamuaing temu' tee nakaronara Joona'taa'ni'anta deeng-antavuu'na'.

**40** Ee', tee' nari' nkoaravaing tee tavi' pankaing-koo ke'de-koo kuunge Joona' beenang doong ee'noko muung beenang otokotaa' taa'ni'antavari daa'aru'na' napo' tee' nari' ning Tee Naning-naumpo' Paning-etaing beenang doong ee'noko napo' muung beenang kansi'koo kuunge o'nokotaa' daa'maravaing taa'ni'antamari.

**41** Te'mung simpe' nkona'mung teing Ninevan-nupoong teinge daa'ariaininge dii' ninka enanavarang ninka nari' ee'noko napo' dii' kiimata-koo makosinuka tantaariaining Joona' daankiarako temu' bere'ariru'ning deemparima, ee'noko ee aing, naning aa'na' pankaing Joona' puru'ui otoing aung anke daankiarako dii' bere'dariaung.

<sup>42</sup> Napo' te'mung simpe' nkona'mung teni ovorinaang<sup>✉</sup> amentei'keta depeto pou'nanie nari' dii' emu'navarang ninka daa'arara dii' kiimata-koo makosinuka tanturiaing, teni kansi'koo basi-aapeita pou'nani deemparama Solomoni' bakaang norukasi'koo baroromparaa'naang, ee'noko ee aing Solomoni'koo dau basi aung anke otoko oomeri barorontaria' otong."

*Ma'nari Bata'nii'nanka Toroaripeu'na'  
(Luk 11:24-26)*

<sup>43</sup> Ee'noko Jisuu'ke kato nau-antavurima aa'puru', "Tenang ma'naang orara tamung bata'nisi naning-eta tenkenura avitoitoi nanupeu'nung ntong otoa'nairue uaavoainoo' besi'uma.

<sup>44</sup> Ee'noko tokoo oovuarura aa'pupeu', 'Ning toromaravaing napo' nkanava ning mou'navakoo.' Ee'noko tenang toroarara kiiroraa'ari neriaro' oovupeu' Tanuaang Meekung borivuaruko bakaang domang-koo.

<sup>45</sup> Teketa bera teie ~kenaanka-taa ma'nari napo' bokuvurira toroaripeu' baru' aa'na' oreng tee puru'ai. Ee'noko teing tumparira tee-koo otoropeu', ee'noko asi'nung otooto' tee naning bakaang bakei aa'na' oraru'kupeu' tutung otoko'noo'keta. Tee' ee'na' nari' nkoaravaing teing-koo aing-koo nantoong-koo emu'navarang-koo oreng-koo."

*Jisuu' Baumaraang Makosinuka Baata?  
(Mak 3:31-35; Luk 8:19-21)*

---

<sup>✉</sup> **12:42:** 1 Dauraronanka 10:1-10

**46** Tenang Jiisuu'ke nantoong karinga karavuriko teni bauko ee'noko baara'mainkaang te' porora dama'due donkonai Jiisuu' kara-koo piavoroko'.

**47** Teketa naninge narunge Jiisuu' nauvuma aa'puu', "Daara'mainkaang ee'noko dauko dama'due donkonai otorong, da' kara-koo piavoromang."

**48** Jiisuu'ke tee naning karavuko'nung maku'uma aa'puu', "Baa teni nko', ee'noko baata teing ntara'mainkaang?"

**49** Teketa teing bakaning barevare-nupoong toompurima aa'puu', "Aing teing ninge nko' makosinuka ee'noko napo' aing teing ntara'mainkaang.

**50** Ai' baata teing Mma' paning-koong bakaang pia siompaamaing teing teing ee'ning ninge aa'ning makosinuka: ntara'mainkaang, mmariikaampi ee'noko nko'dovo."

## 13

### *Tee Mirumiru' Sinang Tankavumaung-koong (Mak 4:1-9; Luk 8:4-8)*

**1** Te'mung ee'na'mung Jiisuu' teketa pava-ita siarara nuaru'koo miiring bera ba'nanuu'.

**2** Teketa teka nantoong karingai aa'na' kuronkurompaio' bakaasi-nareng-koo aa'earara te' kuung ba'nanuu' ee'noko nantoong piisi'koo donkonai otorou'.

**3** Teketa teie kapoo'nanka mmau' nauvuru' mirumiru'po'ning. Minkuvuma aa'puu', "Naning mintoong-koo sinang tanka-koo nanura tankavuko aa'nou':

**4** Nii'ning sinang taung-koo dau dua'ariru', ee'noko teka barennankai porora tunturavau'.

**5** Ee'noko nii'ning sinang kansi' aaveta'koo dau dua'ariru' kapang-koo dau otomaung-koo, ee'noko da'deng narung dupuu', te' kansi' baru' aaveta'noo' deemparako.

**6** Ee'noko batei doonkenang bakaang-koo tee keenkeeng mara'ou' teke, baru' biira doonko nauuaung deemparara kansi' baru' makotua'noo'ke.

**7** Ee'noko nii'ning sinang napo' too'murintaa' otoroinoo' meu' dua'ariru' ee'noko nari' dupurira too'murintaa'ke iinkenevuu' tee keenkeeng.

**8** Teka nii'ning kansi' pankauanoo' dau dua'arira maneeearira aa'nou': nii'ning-koo narung daaku' bi'uu', napo' nii'ning-koo pa'noko'keta narung kivora bi'uu', napo' nii'ning-koo beenaumo kivora bi'uu'.

**9** Punkang otorininge tee enang taaraveriaing!"

*Kuunoo' Mirumiru'koo  
(Mak 4:10-12; Luk 8:9-10)*

**10** Teketa bakaning barevare-nupoonge porora Jiiusu' nia'aama aa'pau', "Dake aming-koo nantoong kara mirumiru'po'nunge karema naueria-maung?"

**11** Teie maku'uma aa'puu', "Kumponinge dii' bakaang kara pinka'erimaing taura'duru'nung makensi'nung-koo miru'noo' noru'erii'naang tee-koobakaang muu'koo nkoaramana', teka aing nantoong tee' deea'.

**12** Ai' baa tee naning bakaang domang-koo kara Kumponing bakaang kompui otomaung tee ee'nung baru' aa'na' noru' nkavuaing bono' divu'ui, teka tee naning bakaang domange

kompuuaung tee oki'noo' naro' daunoo' noru'kui  
otoing tee tee pari'numpo'.

<sup>13</sup> Tee'koo aing nantoong mirumiru' narunge  
kara nauaramaung, ai' aing teing Kumponinge  
kapoo' nauvuriko tee-koo daunoo' naro'  
noru'kaamaing, bane aa'na' ookaama nii'noo'  
taarakaama.

<sup>14</sup> Teing-koo masika'pari otong tee teie Aisaia'ke  
tero tarampeearama minkuvuu'nung Daari  
Meekung-koo aa'puu'noo'ka,

'Dii'ke taaraverimaatoing, teka tasi'peria'  
otoaing. Napo' tee' ooveri otoma  
papaaraverimatoai.

<sup>15</sup> "Ai' teing aing nantoong biikaang domang  
poruruorou'ning~, biikaang punkange  
taara-koo baru' makotuaunge ee'noko  
biikaang duta mutuuariru'. Tee' bii'ka  
maroita nkoariru' aa'no'neeng-koo,  
dutai tasi'paama, punkange taaravaama,  
domange onouaara ning-koo toroariko  
ninge unaa-antavarami'neeng-koo.'  
(Aisaia' 6:9-10)

<sup>16</sup> "Teka dii' diikaang duta biraankenii' teinge  
ookirimaung-koo, ee'noko diikaang punkang bi-  
raankenii'ke teinge taarakirimaung-koo.

<sup>17</sup> Ai' ninge masika' naurampimang, karingai-  
nakaro-nupoong ee'noko nantoong koonto'nukai-  
tee kapoo' ninge nkoanko dii'ke ooverimaung  
oo-koo piavoroko', teka ooaavaruko'. Napo' tee  
kapoo' ninge daankianko dii'ke taaraverimaung  
taara-koo piavoroko', teka taaravaavaruko' tee."

*Miru'noo'    Tee-koo    Minkunaa    Sinang  
 Tankavumaung-koo  
 (Mak 4:13-20; Luk 8:11-15)*

**18** “Enang tee dii'ke taaraverii'naang tee miru'noo'    tee-koo    mirumiru'koo    sinang tankavumaung-koong.

**19** Tee sinang taung-koo dua'ariru'ning ee' miru'ari otong: Nii'ninge nantoonge tee minkunaa muu' paninung-koong daunoo' naro' taaravaama miru'noo' nkavaavaruko teie naning orarai, Sietani'ke tee kara te'nempumaung biikaang onou-eta.

**20** Napo' tee sinang kansi' aaveta'koo dau dua'ariru'ning ee' miru'noo': Nii'ning nantoong teing kara taaravaama doturotu ninka kompaamaung.

**21** Teka tee kara biikaang domang-koo tampa' ari'avuaruma pankaroong otoarukoo'. Ee'noko aa'nokoo': nii'ninge Kumponing-nung kara piavoroainge turampaarima manki'antavaariko namu'ke biikaang baito orariarakoo'.

**22** Ee'noko napo' tee sinang too'murintaa'koo meu' dua'ariru'ning ee' miru'noo': Nii'ning nantoong kara taaravaamaung teka aung kansi'koong manki'nanka-koo ee'noko kavo nka-koo daang noru'arima booni'antavaako tee kara teke sinampuarukoo'.

**23** Napo' tee sinang kansi' pankauang-koo dua'ariru'ning ee' miru'noo': Nii'ning nantoonge tee kara taaravaama tee-koong miru' nkavaamaung. Teketa biikaang domang-koo dupuriko sinananka mmau' bi'antavaakoo', nii'ning daaku'na', nii'ning pa'noko'keta narung

kivorana' ee'noko nii'ning beenaumo kivorana'  
teing-eta tankanii'nanka-ita."

*Tee Mirumiru' Tonto-koong*

<sup>24</sup> Napo' Jiisuu'ke nii'nung minkunaa miru-miru'po'nung nauvuru', aa'puru', "Tee muu' pani-nung tee-pina' naninge sinang tampara bakanau-koo tankavuu'nung-pina' oro'.

<sup>25</sup> Teka tenang ookara aasiaako teie bakaang karenunge pora tee sinang oramurii' dau-eta tankavuu' sinang tampenanka-koo meu'. Tee' nkovura tenkenuu'.

<sup>26</sup> Ee'noko tenang tee uite' dupura puaravuko tee oramurii' tonto tee'ke sira'pari oro'paru'.

<sup>27</sup> Ee'noko teinge bakaninge botovotona'a'nukai porora aa'pau' tee, 'Aung ee, tee orara tonto areketa pou'nung dakanau-koo te' dake tampa-murii' sinang tankaveru'noo'?'

<sup>28</sup> Ee'noko teie maku'urima aa'puru', 'Tee aa' teie naninge ning-koo karenunge tee' nkovuu'nung.' Ee'noko teinge aa'pau', 'Teka ee nii'ke bita'koo pia-antavemaang?'

<sup>29</sup> Teie aa'puu', 'A, tee aa' otoaing. Tee tonto bita'erima tee uite' naro'ka bita'eri'neenga.

<sup>30</sup> Siperio' nari' dupureaing bera kavu'koong batei makotuai, ee'noko tenang ninge teing kavu' nkonuka nauarama aa'pampai, "Tutung teenanka tonto orarananka bita'erima dai'ereriai tai-anta-koong, teketa tee uite'nanka kaverira nkanoo' pava-koo oosierereriai.' ''

*Tee Mirumiru' Masitara'naanka-koong Iisi  
(Mak 4:30-32; Luk 13:18-21)*

<sup>31</sup> Napo' teie nii'nung mirumiru' nauvuru', aa'puu', "Tee muu' paninung tee teu-pina' masitara'koong sinanu oki'nu naninge nkavura bakanau-koo keempuu'nung.

<sup>32</sup> Bane temurii' mukusiri' ookara-ita, nka tee tenang dupura panka'parama taamang mintoong-kooning divu'ura koi' pankavari deemparamaung, ee'noko barennanka poroma biikaang bitonanka kaniaamaunge kaumpe'nanka-koo."

<sup>33</sup> Napo' tee' nari' nii'nung mirumiru' nau-antavuru', aa'puu', "Tee muu' paninung tee teu-pina' parauanu naako'nii'nu iisi-po'nupina' naninge manikumai nkavura paraua diisi beerentu'koo maanto'ura naro'ka bere'uko bera teue ookara pangapangavopeu'."

<sup>34</sup> Aing ookara kapoo'nanka Jiisuu'ke nantoong karinga-koo minkuvuu'ning teing mirumiru'po'ning, ee'noko kapoo' nii'nung mirumiru'otoaruko nau-antavuru'nung otoa'.

<sup>35</sup> Tee'koo tee kara narunge nakaronunge minkuvuu'nung masika'paru' Daari Meekung-koo aa'puu'noo'ka,

"Ninge nkaang karang daate'maravaing mirumiru'nanka-koo. Ee'noko napo' ninge sira'antavampaing teing kapoo' makensi'ning otomaing kans'i pupu'aru'noo'keta." *(Kena 78:2)*

*Tee Mirumiru' Tonto-koong Jiisuu'ke Siraka'antavuu'noo'*

<sup>36</sup> Teketa teing nantoong karinga sipurira Jiisuu' pava-koo koinuu'. Ee'noko teka bakaning barevare-nupoonge porora aa'pau', "Tee kara

mirumiru'po'nung tonto-po'nau-koong nii'koo siraka'antaveai."

<sup>37</sup> Ee'noko maku'urima aa'puru' teie, "Tee naning sinang tampara tankavumaung tee ning ee'nung, Tee Naning-naumpo' Paning-etaing.

<sup>38</sup> Ee'noko tee mintoong tee aung kansi' ookutunung, ee'noko tee sinang tampara tee teing nantoong paninung muu'koo-nupoong makosi. Ee'noko tee tonto tee teing nantoong tee naning orara bakaning.

<sup>39</sup> Ee'noko tee karenung teing tankavuru'nung tee Sietani!. Ee'noko tee sinang kavu' tee batei asirang makosi, ee'noko teing sinang kavu'nupoong teing ee'ning koosinunanka.

<sup>40</sup> Tee' tontonanka bita'aama nta'koo betu'aarimana' tee tee' nantoong oreng nkoariaing asirana'mung.

<sup>41</sup> Ee'noko ninge Naning-naumpo' Paning-etainge nkaning koosinunanka botoaranko teinge tee nkaang muu'tontoaama bita'aariaing, ookara kapoo'nanka orara aarumo tavo'antavumaing ee'noko ookara nantoong orara aarumo nkoamaing.

<sup>42</sup> Ee'noko teinge teing teing urung-koo dua'aariaining, te' ee'noo' nantoong biromparima si'da' dovang kakirinkuarimatoainoo' sisikeera-koo otoroi.

<sup>43</sup> Teketa tenang teing koonto'nuka duaa'pina' arakavarai teke tee-koo muu' Biuma bakaang-koo. Punkang otorininge tee enang taaraveriaing!"

*Tee Mirumiru' Muuninava~koong Ee'noko Tee Duku'*

<sup>44</sup> “Napo' tee muu' paning-koong tee tee-pina' muuninava kansi'koo baku'nii'. Tenang naninge daa'ura napo' tampa' baku'uu' ee'noko bera doturotu ninka ookara kapoo'nanka tee oto'evuko'ning baavevuu' ee'noko mooni' nkavura teing-koo tee tenau kansi' moo'uu'.

<sup>45</sup> Napo' tee muu' paninung tee tee-pina' oro' naning baave-nko duku' tampara moo'koo besi'uko'nung.

<sup>46</sup> Teketa nau moo' pankaing-koonu oovura toroarara ookara kapoo'nanka bakaning baave-vura mooni' nkavura teu moo'uu'.”

### *Tee Sionung-koong Mirumiru'*

<sup>47</sup> “Napo' tee muu' paninung tee tee-pina' sionung-pina' oro'ke. Nuaru'koo dua'aara tavi' amutemurii' barampaaru'.

<sup>48</sup> Bera tenang aa'na' maanto'ui' teinge tavi' baranukai deto piisi'koo barampau'. Teketa ba'naniaara tampenanka tavi' bire'arima peku'koo kuung sipaaru', teka oreng dua'aaru'.

<sup>49</sup> Tee' ee'na' nari' nkoaravaing te'mung doong asi'na'mung. Teinge koosinunankai porora simpe'aariaing teing orananka teing-eta tampeng-eta.

<sup>50</sup> Ee'noko nta'koo kuung urung-koo dua'aariai te' ee'noo' nantoong biromparima si'da' dovang kakirinkuarimatoainoo' sisikeera-koo otoroi.”

<sup>51</sup> Teketa Jiisuu'ke nia'urima aa'puru', “Aing ee kapoo'nanka dii'ke tasi'pering?” Teinge maku'aama aa'pau', “Ee””.

<sup>52</sup> Napo' teie aa'puru' teing, “Ookara teing-koo boto nau-antanuka ning-koo barearimaing

muu' paning-aapening-koo teing teing biraanke-nupoong, ai' teinge urikupoong nakaro-nupoong biikaang kara tasi'pai otorong ee'noko ning-koo dupeararamana' tasi'pai otong tampa' nantoong nau-antavaarii'naang naro'ka."

*Nasareti'nupoonge Jiiusu' Dama'duaun'a'  
(Mak 6:1-6; Luk 4:16-30)*

<sup>53</sup> Tenang Jiiusu'ke aing mirumiru'nanka minku bakevura teketa diiri'aru'!

<sup>54</sup> Bera bakanoo' osi masipo' pora nantoong nau-anta tutumpuru' biikanava dootuu'navakoo. Ee'noko teing ta'ninaara aa'pau', "Aunge tee aung noru' are'ka nkavuu'nung, ee'noko teing aing ta'nimpaarii'nanka iri'po'ning?

<sup>55</sup> Aung ee ee'nung tee anke pava kani bau-ring ee deea'? Bauko miring Meeri' ee'noko baara'mainkaang ainge ee deea' aa'ning, Jeemisi, Josepa', Saimoni' ee'noko Judasi?

<sup>56</sup> Ba'marikaampi anke ee otoroa' nii' ninka? Are'ka nkavuu'nunge aunge aing kapoo'nanka?"

<sup>57</sup> Ee'noko teing tee-koo domang oraka' otoroko Jiiusu'ke aa'puru', "Mmau' nantoonge nii' nakaro-nupoong pankaing-antamaarimaung. Niikanoo'nupoong deeko' pankaing-antamaariaung, nii'marange."

<sup>58</sup> Ee'noko teie mmau' taa'ni'antananka teke nkovuaruu' biikaang masika'anta otoaruio'.

## 14

*Eerot'i'ke Jiiusu' Tee Jooni Minkinara-pina'  
Daang noru'uu'na'  
(Mak 6:14-29; Luk 3:19-20; 9:7-9)*

<sup>1</sup> Tenang ee'nang tee teie Eeroti'ke,  
Kaaleli'nameng tarevuko'nunge Jiisuu'koong  
doorenang taaravura aa'puru' bakaning  
bautarananka,

<sup>2</sup> “Tee tee ee'nung Jooni Minkinara; boo'keta  
napo' daa'aring. Tee'koo iri' ninka mintoompara-  
maang.”

<sup>3</sup> Tee tee ee'nunge Eeroti'ke botoario' Jooni  
moo'ura, dai'uu', ee'noko kiimatanava-koo sipau'  
Erodiasi dotu-anta-koo;

<sup>4</sup> Ai' Eeroti'ke teni ninka Erodiasi,  
baara'ma'nung Pilipi' ba'aang ninka otoresio'  
Joonie tero aa'puu', “Tee' botoi potevui otoina'  
nkoraring teni nampera.”

<sup>5</sup> Eeroti'ke Jooni tee dupisi'koo piavou', teka  
nantoong-koo avorou' teinge tee nakaronung  
noru'ai otoromanoo'koo.

<sup>6</sup> Teketa nii'na'mung tee, tee Eeroti' bakaang  
doong ponto'aru'na'mung-koo teni ee'nani Ero-  
diasi baurang damisimainku-ankoi neekavarara  
Eeroti' aa'na' karaa'antavuu'.

<sup>7</sup> Bera teie marakavarama teni kapoo' piavora  
eentavarako avuu'naang tampuu'.

<sup>8</sup> Teketa baukoi botovuko tenie aa'puu',  
“Jooni tee Minkinara-koong bore' a' daara-koo  
si'memura ameaing.”

<sup>9</sup> Teketa teie dauraronge~ tee' taaravura do-  
mang oraka' dee'ou', teka tee bakaang maraka-  
anta nkovuu'nung deemparako ee'noko napo'  
teing damisimainku otoroko, tee botoaru' teni  
avu'koo tee' eentavaru'na'.

<sup>10</sup> Ee'noko botoario' bakaning-koo narung bera  
pava kiimatanava'koo kuunga kuru tako'pevuu'.

<sup>11</sup> Ee'noko Jooni bakaang bore' daara-koo nkavui pora teni nerai'na' avuu'. Ee'noko tenie bauko-anko tavo'uu'.

<sup>12</sup> Ee'noko Jooni bakaning barevare-nupoonge porora bakaang mono nkavaara dako'au'. Teketa Jiisuu'anko berora nauau' tee.

*Jiisuu'ke Nantoong Pa'noko' Kokorei' Divu'  
Bau'uru'na'  
(Mak 6:31-44; Luk 9:10-17; Jon 6:1-13)*

<sup>13</sup> Tenang Jiisuu'ke taaravura tee kapoo' Jooni Minkinara-koo nkoaru'nung, teketa tenkenuu'nung ee'noko bakaasi-koo bakaning ninka aa'earira bii'ka oto'noo' berou'. Tee' taaravaara nantoong karingai siompai kau'ke berou' osinanka-ita.

<sup>14</sup> Tenang Jiisuu' bakaning ninka te' duumearira~ teka nantonanka mmau' karinga oovurira bakaang domang aa'na' piaavou' teing-koo, ee'noko siipa-nupoong po'antavaaru'ning taare-antavuru'.

<sup>15</sup> Teketa muung-aapevuma nanuu'nang teinge bakaning barevare-nupoonge tee-anko porora aa'pau' tee, "Nii' mee'bora' sirakamaa'koo o'noring ee'noko batei nanuinge. Aing nantoong karika' botoveriko osinanka-koo berora taamang moo'siiaavai."

<sup>16</sup> Jiisuu'ke maku'urima aa'puru', "Aing aa' tokoi bata'koo tampa' deea' nii' apuka'maria'. Dii'ke kapoo' averereriko naiaavaing."

<sup>17</sup> Ee'noko teinge maku'aama aa'pau', "Nii' anke berete' pa'noko' naing otong ee'noko tavi' keura oto'memurimaang."

**18** Jiisuu'ke aa'puru', "A' ning-anko po'antaveriaing teing."

**19** Ee'noko teie nantoong karinga karaasi'koo doonko ba'namparii'naang botovuru'. Ee'noko Jiisuu'ke teing pa'noko' berete' ee'noko tavi'ning keura nkavura tee paning-aape ankamparara biraankevura pisi'uu' teing berete'ning. Teketa teing bakaning barevare-nupoong avuriko teinge teing karinga avaaru'.

**20** Ee'noko ookara taamanaara poovorou'. Ee'noko teinge bakaning barevare-nupoonge kakita'nanka oosiaara kivora-ita keveku'ka peku' maanto'antavau' siparu'ninge.

**21** Nantoong donkaang teke taamanau'ning-koong deerunoo' pa'noko' kokorei', maniku' ee'noko toire' nari' deeruaria'.

*Jiisuu' Ntong-koo Daue Nanuu'na'  
(Mak 6:45-56; Jon 6:16-21)*

**22** Teketa tenang namu'ke Jiisuu'ke bakaning barevare-nupoong bakaasi-nareng-koo aa'e-antavurira nuaru'koo nii'navete-koo be'koo botovuru' tee-koo uro'ke, teing beroko nantoong karinga tenkeng-koo botovurii'naang.

**23** Teketa Jiisuu'ke teing karinga botovurira tee mii-koo deto baka beu' teke kansiaraa'naang, bera muumpuu' teke baka otoko.

**24** Ee'noko tereng bakaasi-nareng tee kans'i'keta isipo' basiaru', teka pionge kosi'uko boo'ai aa'na' neekavuko'.

**25** Bera tane' dere'uaruko Jiisuu' teing-aape pou' nuaru'koo daue nanuma.

<sup>26</sup> Teketa teinge barevare-nupoonge ooaara ntong-koo daue nanuko, aa'na' avoreaama bokiaama aa'paako', "Aunkapeto ma'naang!"

<sup>27</sup> Teka Jiisuu'ke namu'ke karavuru' teing, aa'purima, "Domang kuaa'doriai aroreria', tee ning ee' nanamang."

<sup>28</sup> Teketa Piitai aa'puu', "Ovoring, da' masikung deeko' bokumeko ning ntong-koo daue nanama da'anko meai."

<sup>29</sup> Jiisuu'ke aa'puu', "Poaing." Teketa tenang Piita doonko siaru' bakaasi-eta, ee'noko ntong-koo daue nanuu' Jiisuu'anko bema.

<sup>30</sup> Teka tenang teie doving oovura tee avorou', ee'noko minki tutumparu', ee'noko minki tutumparama bokuma aa'puu', "Ovoring, moo'meai!"

<sup>31</sup> Teketa namu'ke Jiisuu'ke tanka' toonura moo'ura aa'puu' tee, "Da' bakei dakaang masika'anta oki'nung. Aming-koo keekoo'daramaunge?"

<sup>32</sup> Ee'noko tenang bakaasi-koo deto aa'earesio' tee doving bakearu'.

<sup>33</sup> Ee'noko tenang teinge bakaasi-koo otorou'ninge tee-anko kinkinaara daangampaama aa'pau', "Da' tee Kumponing baurung masikung!"

<sup>34</sup> Teketa kato pako'arira Kenasereti'nameng-koo tavo'ariru'.

<sup>35</sup> Ee'noko tenang nantoonge Jiisuu' teka tasi'paara doorenang ootukunairue tevaro-koo nanu'antavau'. Teketa nantoonge ookara biikaning siipa-po'nupoong Jiisuu'anko tavo'aaru'.

**36** Ee'noko eentavariko' tamung bakaang mononopa'koo kainu' kompaama taarevoroo'naang. Ee'noko teing ookara tee kompau'ning tee taarevorou'!

## 15

*Kumponing Bakaang Botoi Niikakatauro Bi-ikaang Boto Divu'ui Otoina'  
(Mak 7:1-13)*

**1** Tenang tee nii'ning Boto Keperuu'navitu ee'noko boto naunuka Jerusalema'keta Jisuu'anko porou'.

**2** Ee'noko Jisuu' nia'aama aa'pau', "Dakaning barevare-nupoonge aming-koo niikakatauroi bamaaru'na' boto siompaavaung, aa'nomaung, biikaang bireng duu'paria' taamanaakoo' domang orari-antavarima Kumponing-koo dutakanoo'ke?"

**3** Teketa Jisuu'ke maku'uma aa'puru', "Nka dii'ke tee Kumponing bakaang boto aming-koo toto'perikoo' tee diikaang minkunaa sintokosintoi-koong toomo siomperima?

**4** Aa'noma, Kumponinge ee' botoaru', 'Daumararing deto noru'eresi pakuereing,' (*Boto 5:16*)

ee'noko,  
'Naning baumararing oraka' minkuvureaing tee  
bakei dupisi'numpo!.' (*Toro 21:17*)

**5** Teka dii'ke aa'perimaung, 'Naninge baumararing kapoo'koo apuka'pareko, beuringe tering paku-koo kupi'ora deeko' aa'pupeu', "A, nkaning kapoo' arompepeu'ning teing temu' Kumponing bareantu'ning." Ee'noko tee'pureta

orokoari otoaing teing kapoo' baumararing avu'koo.'

<sup>6</sup> Tee' nkorarima dii'ke tee Kumponing bakaang boto daang-antaverimaung tee diikaang sintokosintoi-koong minkunaa daang toomo pina' oro'paraal'naang.

<sup>7</sup> Dii' ampirinunuka! Masika' teie nakaronunge Aisaia'ke tarampeearama~ dii' ee'ning minkururima Kumponing bakaang kara ee' minkuvuu',

<sup>8</sup> 'Teinge ainge nantoonge biikaang be'duu'ke narunge pankaing-antamaamaung, teka biikaang domang ning-koo isipo' otoroi.

<sup>9</sup> Tamung ning dootuu'maamaing, ai' teing boto nkaang miring-koo nau-antavaarimaing teing tamung nantoong-etaning.' " (Aisaia' 29:13)

*Kapoo' Naning Domang Orari-antavumaung  
(Mak 7:14-23)*

<sup>10</sup> Teketa Jiisuu'ke nantoong karinga tee-anko bokuvurira aa'puru' teing, "Aing kapoo' dii'ke taaraverira tampa' norunoru'eriaing.

<sup>11</sup> Tee kapoo' naning-koo karang-koo tumparamaunge naning bakaang domang orari-antavuaung Kumponing bakaang duta-koo, teka teie kapoo'ke naning-eta karange doompeto pomaunge naning domang orari-antavumaung."

<sup>12</sup> Teketa napo' bakaning barevare-nupoong tee-anko porora nia'aama aa'pau', "Dake ee noru'ei otong teinge Boto Keperuu'navitue da' oraka' noru'daing tee' minkuveio'?"

<sup>13</sup> Jiisuu'ke maku'uma aa'puru', "Ookara keenkeenanka Mma'ke paning-koonge

keempuriaruu'ning teing bita'kooning ari'a ninka nari'.

<sup>14</sup> Teing teing bii'ka kaputu'ariri nii'ning duta kaputu'nuka taung nau-anta nkooamaing. Dii'ke teing siperereriaing, ai' naning kaputu'ke narung napo' kaputu' siong-antavuma tenaanka tee ookaanka dinkung-koo dua'areaing."

<sup>15</sup> Teketa Piitai aa'puu', "Tee mirumiru' nii'koo siraka'antaveai."

<sup>16</sup> Jisuu'ke aa'puu', "Dii' ee teing-pina' nari' mme' noru' siraka'daria'?

<sup>17</sup> Arekee' tasi'peria' tee kapoo' naning-koo karange doonko tumparama pakosii'koo bemaung, ee'noko teketa mono-itaa napo' siarakoo' domang orarivua'?

<sup>18</sup> Teka tee kapoo'nanka karange doompeto pomananka teing teing domang-eta pomaing, ee'noko teinge ee'ninge naning orari-antavumaung.

<sup>19</sup> Ai' ee'noo'keta domang-eta kapoo' orara noru'nanka pomaunge aing aa'ning: naning dupisi'koong noru', nampeesi orari-koong noru', kaukauro-koong noru', ee'noko bakiaa'nko, daang-koong kara minku tuutunantomai ee'noko poore'.

<sup>20</sup> Aing ee'ninge kapoo'nankai naning orari-antavumaung, teka bireng duu'parava' taamang naie naning orari-antavuaung."

*Nani Akovitu-koonanie Tee Jisuu' Ookara-koo  
Pankaing Masika'antavuu'na'  
(Mak 7:24-30)*

<sup>21</sup> Ee'noko Ju' biikanameng-eta uaa-koo tenkenurai'nange Jiisuu' bakaning ninka osi Taia' ee'noko Saidoni'nameng-koo berou'!

<sup>22</sup> Teka temeng-koo naning Keenang-naving-koonani Jiisuu'anko pora bokuma aa'puu!', "Ovoring, Deevita' bakanaving-koong, piaameai ning! Nnorang teni ma'naang aa'na' masika' kuru-maa'aramanani!"

<sup>23</sup> Teka Jiisuu'ke nanaarenoo' karoma maku'ua'. Tee' birompari otoko bakaninge barevare-nupoonge Jiisuu'anko beroma botoaama aa'pau' tee, "Ani bata'eai. Nii' siomurima birompari otomang."

<sup>24</sup> Teka Jiisuu'ke aa'puu' teni, "Ning tee Isireeli-nupoong-eta sipisipi'pina' pooariru'ning naing-koo botomuu'nung."

<sup>25</sup> Teketa teni pora Jiisuu'koo uro'kanoo' kink-inura eentavarama aa'puu!', "Ovoring pakumeai."

<sup>26</sup> Jiisuu'ke maku'uma aa'puu!', "Tee aa'taamang toire' biikaang mosi'nanka-anko dua'koo tampa'deea'!"

<sup>27</sup> Tenie aa'puu!', "Ee', Ovoring, masika', nka tee mosi'nankai napo' mukunanka naiaamaung ovoring baurukaa' taamanaamanoo'keta dua'arimaing."

<sup>28</sup> Teketa Jiisuu'ke maku'uma aa'puu' teni, "Ani ee, da' bakei dakaang baito pankaing, tee'koo tee kapoo' eentararing enang nkoaring." Ee'noko teni baurang tee-koo batei-koo tenang taarevou'.

*Jiisuu'ke Nantoong Siipa-po'nupoong Taare-antavuru'na'*

<sup>29</sup> Teketa Jiisuu'ke te' sipura Kaaleli'naru' sionge danto beu'. Teketa miie deto koinuu', bera a'dei' ba'namparu'.

<sup>30</sup> Teketa nantoong karinga tee-anko porou' nantoong de'doonuka ee'noko kaputu'nuka, koo' mare'nuka, amakoori ee'noko napo' mmau' nii'ning. Porora tee-koo kau'kanoo' bempaario' teka taare-atavuru'.

<sup>31</sup> Nantoong bakei aa'na' ta'ninau' tenang aing aa'ning nantoong ooaarira, amakonuka kareaako ooaaru', koo' mare'nuka koompariru', de'doonuka tampa' nanau', kaputu'nuka ookau'. Ee'noko teinge tee Kumponing Isireeli-nupoong biikaang daangampau'.

*Jiisuu'ke Nantoong Deerunoo' Karenaumo  
Kokorei' Divu' Bau'uru'na'  
(Mak 8:1-10)*

<sup>32</sup> Teketa Jiisuu'ke bakaning barevare-nupoong tee-anko bokuvurira aa'puru', "Nkaang domang aa'na' piaamoing aing-koo nantoong-koo. Aing teing ni'ninka beenang doong o'norining ee'noko kapoo' nai-koong oto'evoroa". Peeravoroi otoroko tokoi boto-koo piamaoa' taunga peerai tavuri'neeng."

<sup>33</sup> Ee'noko bakaning barevare-nupoonge aa'pau', "Aing bau'koong makosi nantoong karinga taamang are'ka nkavampii'naang aung-koo mee'bora' sirakamaa'koo meu'ka?"

<sup>34</sup> Ee'noko Jiisuu'ke nia'urima aa'puru', "Teka berete'ning arekee'ning oto'deruring?" Teinge aa'pau', "Pa'noko'keta keura ee'noko nii'ning tavi'ning oki'nareka!."

**35** Ee'noko teie nantoonge karinga kansi'koo ba'nani'aava'naang nauvuru'.

**36** Teketa teie teing pa'noko'keta keura berete'ning ee'noko tavi'ning nkavura Ovoring-koo tampara tampura pisi'ura teing bakaning barevare-nupoong avuru', ee'noko teinge nantoong avaaru'.

**37** Ee'noko ookara taamanaara poovorou'. Teketa dama'ke bakaning barevare-nupoonge peku' pa'noko'keta keveku'ka kakita'nankai sipaaru'ninge maanto'au'.

**38** Nantoong donkaang naing teke taamanau'ning-koong deerunoo' karenauamo kokorei', maniku' dovang toire' nari' deeruaria'.

**39** Teketa Jiisuu'ke nantoong karinga tenkeng-koo botovurira tee bakaasi-nareng-koo aa'earu', ee'noko teketa Ma'dala-aape-navete-koo berou'.

## 16

*Taa'ni'anta Oo-koo Piavorou'na'  
(Mak 8:11-13; Luk 12:54-56)*

**1** Nii'na'mung teing Boto Keperuu'navitu ee'noko napo' teing Noru' Pitunavitu Jiisuu'anko porora tee paara-antavaama nia'aama aa'pau', "Narung taa'ni'anta Paning-etaing naumeriai da' Kumponing-etaing deeko' tasi'dampiaina!."

**2** Jiisuu'ke maku'urima aa'puru', "Tenang muung-aapenang dii'ke aa'perimaung, 'Tane' tampa'mung, tampa' otoo'naang, kamo' urung deemparing.'

**3** Ee'noko napo' tane'nang aa'perikoo!, 'E'mung irinke nkoaraa'naang, ai' paning kamo'ke urunge nee'uing.' Dii'ke tee tampa' noru'eri

otong kamo' ooverima nkoaravaina' noru'koo,  
teka dii'ke emu'nung batei bakaang taa'ni'anta  
noru'eriarupeu'.

<sup>4</sup> Dii' enanavarang bakei oreng, nampeesi  
orarinuka-pina' diikaang Ovoring siperima,  
tosirarima aa'merimaing, 'Taa'ni'anta paning-  
etaing iro' naumeriko deeko' taararampiaing.'  
Bakei Kumponinge dii' taa'ni'anta nau-anta-koo  
kasivuarura narung masikung arurii'naang,  
aa'noaing: teie ning taa'ni'anta deeng-  
antamuaing temu' Joona' taa'ni'anta deeng-  
antavuu'na!.' Teketa Jiisuu' teing teka sipurira  
tenkenuu'.

*Tee Iisi Teing Boto-koo Keperuu'navitu Ee'noko  
Noru' Pitunavitu Biikaang  
(Mak 8:14-21)*

<sup>5</sup> Teka tenang tee-koo nuaru'koo beroma teinge  
bakaning barevare-nupoonge tee taamang nka-  
koo ampa'orou'.

<sup>6</sup> Ee'noko nuaru'koo pako'arirai'nange Jiisuu'ke  
aa'puru' teing, "Tanatarariaing teing-koo Boto  
Keperuu'navitu-koo ee'noko Noru' Pitunavitu bi-  
ikaang iisi-koo."

<sup>7</sup> Ee'noko tee'puio' tasi'paavarura kareaama  
aa'peeko', "Aunge pa nii'ke taamang  
nkavampiaruing-koo tee' minkuvumaang."

<sup>8</sup> Teketa Jiisuu'ke tee biikaang minku-  
naa noru'ura aa'puru' teing, "Dii' baru'  
masika'antaropanuka, aming-koo dii'ka  
minkurrimang taamang nkaveriarura?

<sup>9</sup> Koonto' ee mme' dii'ke tasi'meria' ning?  
Noru'eria' otong teing pa'noko'nuri berete',

nantoonge pa'noko' kokorei'ke naiau'ning,  
ee'noko teing-koo arekee'ning peku' oosierira  
maanto'eru' dama'ke taa'pario'?

<sup>10</sup> Napo' ee noru'eria' otong teing pa'noko'keta  
keura berete' nantoong karenauamo kokorei'ke  
naiau'ning ee'noko teing-koo arekee'ning peku'  
oosierira maanto'eru' dama'ke taa'pario'?

<sup>11</sup> Arekee'koo dii'ke tasi'periaunge? Ai'  
ninge tee taamang-koo minkuampaung. Teka  
dii' ee'ning tanatarariaining tee-koo Boto  
Keperuu'navitu ee'noko noru' pitunavitu  
biikaang iisi-koo."

<sup>12</sup> Teketa tenang teinge tasi'pau' teie tee  
tee iisi berete'koo sipaamaung minkuvuma  
tee' nauvuria', teka tee kapoo'koo teinge Boto  
Keperuu'navitue ee'noko Noru' Pitunukai nau-  
antavaarimaung-koo tee' minkuvuriko'.

*Piitai Jiisuu' Tee Pako'pari'nii' Tasi'pura  
Sira'puu'na'*  
(Mak 8:27-30; Luk 9:18-21)

<sup>13</sup> Teketa tenang Jiisuu' bakaning barevare-  
nupoong ninka Sisaria' Pilipai-navuntu'koonoo'  
berora teing nia'urima aa'puru', "Ning Tee  
Naning-naumpo' Paning-etaing nantoonge baa  
tammaamaung?"

<sup>14</sup> Teinge maku'aama aa'pau', "Nii'ninge  
aa'daamaung, 'Aung pa tee Jooni Minkinara,'  
ee'noko nii'ninge Eliasi poaing-koong  
tantaamaung, ee'noko nii'ninge napo'  
urikupoong nakaro-nupoong-koo narung,  
boo'keta daa'aru'nung, ai' Jeremaia pa."

<sup>15</sup> Ee'noko napo' Jiisuu'ke aa'puru' teing, "Teka dii'ke napo' baa tammerimaung ning?"

<sup>16</sup> Teketa Saimoni' Piitai bari'uma aa'puu', "Da' aa' tee Kumponinge teroita Pako'pari'nii' nantoong domamperira tareveriaainoo'koo, tee Kumponing domantoo' bauring."

<sup>17</sup> Jiisuu'ke maku'uma aa'puu', "Biraankeraring da', Jooni bauring, ai' aung tee naninge kansi'koonge naurua', teka tee Mma'ke paning-koonge nauruing.

<sup>18</sup> Ee'noko ninge aa'damaang, da' tee ee'nung Piita, Manto, ee'noko aung-koo boia'koo e'maniang-koo ninge tee nkaang dootuu' donkong-antavampaing, mosianung-koonge purinto'ke puru'uauka'nung.

<sup>19</sup> Ee'noko ninge da' tee kii'nanka arompaing teing muu' paninung-kooning. Aming kapoo' dake anke kansi'koo pinka'eaing deeko' paning-koo tee' pinka'aravaing, ee'noko aming kapoo' anke kansi'koo dapa'eaing deeko' paning-koo tee' nari' dapa'aravainge."

<sup>20</sup> Teketa potevuru' teing bakaning barevare-nupoong sira'paavaroo'naang tee Kumponinge Pako'pari'nii'.

## **Jiisuu'ke Bakaang Aarumo Bare-antavuru'na' Boaina'mung Due'uko**

(16:21-20:34)

*Piitai Jiisuu' Booaing Tamparako Orokovuu'na'  
(Mak 8:31-33; Luk 9:22)*

<sup>21</sup> Tenang-eta deto Jiisuu'ke tee te' Jerusalema' bera kapoo'nanka arikananka tora'puaining

bakaning barevare-nupoong nau tutumpuru'. Aing aa'ninge tora'antavaavaing: nantoong pankenge, piristi'koong ovontunankai, ee'noko boto naunukai. Ee'noko tee tee' nkaoama dupisi'aavaing, ee'noko beenang doong deemparako napo' domamparara daa'aravai.

<sup>22</sup> Teketa Piitai taapo' be'antavura teka potevuma aa'puu', "Bakei makotua' da' tee' nko-koo, Ovoring. Tee' da'koo nkaoaravauka'nung."

<sup>23</sup> Teketa Jiisuu' bakaning barevare-nupoong-aape bere'arama Piita turampuma aa'puu', "Tokoi beai da' Sietani'. Da' tee ning-koo baanka' makosi. Dake tee Kumponing bakaang noru' noru'ea', nantoong biikaang noru' narung noru'ei otong."

*Karistoo' Siong-koo Amariaina'  
(Mak 8:34-9:1; Luk 9:23-27)*

<sup>24</sup> Teketa Jiisuu'ke aa'puru' teing bakaning barevare-nupoong, "Naning ning siomui poo'naang piavora deeko', baka bakaang pia iro' doonko tompimparavaing ee'noko bakaang aa'barata' poru'ui ning siomumaatoaing.

<sup>25</sup> Ee'koo, baa tee naning bakaang domaang ning-koo orokovuma baka tare-koo piavoaring tee paa'aravaing, teka baa tee naning bakaang domaang ning-koo aroo'ari dua'uaing, teie tee napo' daa'uaing.

<sup>26</sup> Ee'noko aming kapoo' tampara basiarapeu' naning-koo ookara kapoo'nanka kansi'po' barampuma okovui baka orariarakotaa' domaang paa'aravaina'? Ee'noko naning aming avupeu' tee bakaang domaang paa'aru'nung napo' moo'koo?

<sup>27</sup> Ai' ning Tee Naning-naumpo' Paning-etaing tee teie Mma' bakaang meenasie baumari moaing teing ninka nkaning koosinunanka ninka, teketa moo' avorompaing nantoong naruna' naruna' kapoo' nkoau'ning siompario'.

<sup>28</sup> Teka ninge masikung naurampimang, dii'koo nii'ning anke nari' donkoniri otorining-koo mme' boo'koo mantonkiria' ning Tee Naning-naumpo' Paning-etaing nkaang muu'koo Daurarong~ deemari moko oomeriaing."

## 17

*Jiisuu' Paning-etaing Daurarong-pina'  
Oro'paru'na'  
(Mak 9:2-13; Luk 9:23-36)*

<sup>1</sup> Teketa pa'noko'keta na'mung doong tankinuo' Jiisuu'ke Piita dovang Jeemisi ee'noko baara'ma'nung Jooni, bokuvurira iu' isikung-koo deto koinau' teing naing bii'ka.

<sup>2</sup> Ee'noko teke teinge ooaio' Jiisuu' bakaang mono aampari'arama aa'nou', bakaang oing duaa'pina' siisiou' ee'noko bakaang mononopa' aa'na' kakaaravou' araka-pina'.

<sup>3</sup> Ee'noko tenang teing-ankoi Moosesi naanka Eliasi oro'pareta Jiisuu' ninka kareaako'.

<sup>4</sup> Ee'noko Piitai aa'puu' tee Jiisuu', "Ovoring ee, bakei tampa' nii' anke o'norimaang. Da' piaroko deeko' ninge bare beevaari kaniampaing, nava da' dakanava, nava Moosesi bakanava ee'noko nava Eliasi bakanava."

<sup>5</sup> Ee'noko tenang tee Piita tee' karoi otoko narunge kamo'ke sisisiisie teka daka'puru',

ee'noko teieta kamo'keta auronge karoma  
aa'puu',

“Aung tee nnuring ninge piaavamaung. Ning tee-  
koo aa'na' dotumaramaung. Taaraveriaing  
tee.”

<sup>6</sup> Tenang teinge bakaning barevare-nupoonge  
tee aurong taaravaara avoreaara oing kansi'koo  
doonko kinkinau'.

<sup>7</sup> Teka Jiisuu'ke pora kompurima aa'puru',  
“Deto daa'dariai, aroreria!”

<sup>8</sup> Teketa tenang deto daa'arira ookaama nii'nara  
naning ooaava', Jiisuu' narung teka ooau'.

<sup>9</sup> Teketa iu'keta depeto siarima Jiisuu'ke  
teing orokovuru' tee kapoo' ooau'nung  
nauaariaro'naang bera tee Naning-naumpo'  
Paning-etaing boo'keta daa'aravainoo'ke basi.

<sup>10</sup> Teketa teinge bakaning barevare-nupoonge  
tee nia'aama aa'pau', “Teinge boto naunukai  
aming-koo aa'paamaung Eliasi tee tee-koo  
Kumponinge Pako'pari'nii'koo~ uro'ke poaing?”

<sup>11</sup> Ee'noko Jiisuu'ke maku'urima aa'puu',  
“Masika' Daari Meekung-koo Eliasi tee  
poo'naang tampari otong ookara kapoo'nanka  
nerivuu'naang.

<sup>12</sup> Teka ninge aa'dampimang, tee Eliasi aa' tee  
tero pou'nung, teka teinge tasi'paavarura tee  
oraka' piavorou'na' nari' nkoau' tee. Tee' nari'  
napo' ning Tee Naning-naumpo' Paning-etaing  
nantoonge sisikeera-antamaavainge.”

<sup>13</sup> Teketa tee' minkuvuio' teinge bakaning  
barevare-nupoonge tasi'pau' tee ee'nung Jooni  
Minkinara miru'ui Eliasi tee' minkuvuu'nung.

*Jiisuu'ke Narung Nemaka Kookokoarako'nung~  
 Taare-antavuu'na'  
 (Mak 9:14-29; Luk 9:37-42)*

<sup>14</sup> Tenang teing nantoong karinga-anko poroio' naning narung pora Jiisuu'anko kinkinura aa'puu',

<sup>15</sup> "Ovoring ee, nnuring piaaveai kookokoara-maung, ee'noko aa'na' sisikeeravokoo'. Mmau'namu'pie nta'koo nii'noo' ntong-koo dua'arakoo".

<sup>16</sup> Aing-anko dakaning barevare-nupoong-anko tavo'ansio' teinge taare-anta-koo makosiaavaruing."

<sup>17</sup> Ee'noko Jiisuu'ke maku'urima aa'puru' teing, "Nko dii' masika'anta otoriainge, koontariaing, are' basinaroonge dii' ninka nari' o'norimaatoainge dooroontampiri? Po'antaveai tee oki'nara a' ning-anko."

<sup>18</sup> Teketa tavo'ui! Jiisuu'ke tee ma'naang teka aka'puio' teieta nemaka-ita bakoaru', ee'noko tenang-eta deto taarevou'.

<sup>19</sup> Teketa teing bakaning barevare-nupoong makenge tee-anko porora aa'pau', "Nii' aming-koo tee ma'naang bata'koo makotumpia!?"

<sup>20</sup> Jiisuu'ke maku'uma aa'puru', "Diikaang masika'anta bakei oki'nung deemparako tee' bata'eriarupeu'nung. Masika' naurampimang ninge, diikaang masika'anta tee masitara'koong sinang-pina' basi oto'derui dei dii'ke aunteto iu' aa'peripeu', 'Anka' diiri'daravai anketa,' ee'noko tee diiri'arapeu'. Tee'koo kapoo' dii'ke nko-koo makosi deeaung otoarupeu' dii'koo.

<sup>21</sup> Teka tee aung amurii' tamung bakoaravarupeu', naninge kunsiarama ee'noko unkumoarama deeko' makosi temurii' bata'koo."

*Jiisuu'ke Dama'ke Boo'antavaavaing  
Kemu'kana' Sira'puu'noo'  
(Mak 9:30-32; Luk 9:43-45)*

<sup>22</sup> Ee'noko tenang teing ookara Kaaleli' porora oosiarirai'nange Jiisuu'ke aa'puru' teing, "Ning Tee Naning-naumpo' Paning-etaing tee nkaning-koo navumainuka-koo narunge tooka kompui taura'muu'naang nantoong oreng biikaang bireng-koo.

<sup>23</sup> Teinge dupisi'maavaing, teka beenang doong deemparako napo' domamarara daa'maravaing." Ee'noko teing bakaning oraka' dee'orou' tee'puio'.

### *Piita naankai Jiisuu' Taakisi Dua'uretu'na'*

<sup>24</sup> Teketa Jiisuu' bakanavitu ninka Kapaneume'navuntu'koo basiaririo' taakisi nkanukai porora Piita nia'aama aa'pau', "Diikaang nau-antai ee taakisi dootuu'nava pankava-koong dua'uaung?"

<sup>25</sup> Piitai maku'uma aa'puu', "A, tee aa' dua'umaung." Teketa tenang Piita pava-koo pora mme' nauvuaruko teie Jiisuu'ke tutung minkuvuma aa'puu', "Saimoni' ee, arekee' noru'emaang, ookara dauraronukai kansikooninge baata-koo taakisi barampaamaung, biurukaa'koo ai' oovuning-koo?"

<sup>26</sup> Piitai maku'uma aa'puu', "Oovuning-eta barampaamaung." Teketa Jiisuu'ke aa'puu', "Tee tee tee'koo dauraronuka biurukaa' teing unaanisi

oto'nuka, ee'noko ning napo' tee'ke, unaanisi oto'nara.

<sup>27</sup> Teka makosi nee'ke moo'ampeaing noru' orari-antavarampe'neeng teing. Enang bera a'doong nuaru'koo airiraravaing, teketa tutuna'nu tavi'nu barampeainu-koo karang kaake'era teka mooni' ooveaing. Oovera nkavera teing averiaing, neekaang taakisi deemparavaing."

## 18

*Toire' Teing Pankenuka Tee-koo Muu' Paninung-koo*

(Mak 9:33-37,42-48; Luk 9:46-48; 17:1-2; 15:3-7)

<sup>1</sup> Tenang ee'nang napo' teinge bakaning barevare-nupoonge porora Jjisuu' nia'aama aa'pau', "Pankaing baa tee-koo muu' paninung-koo!"

<sup>2</sup> Teketa Jjisuu'ke narung tooto' bokuvura teing-koo meu' donkong-antavura aa'puru',

<sup>3</sup> "Masika' naurampimang, dii' diikaang domang bere'dariarura deeko' toirekaa'pina' onou-koo dii' teing bakei makosiria' te' muu' paninung-koo tung-koo.

<sup>4</sup> Tee'koo baa tee naning baka boonko noru'aravaing aung-pina' tooto'pina' tee tee ee'nung muu' paninung-koo pankaing.

<sup>5</sup> Ee'noko baa tee naning ning nkaang miring-koo onkeonke'uaing narung tooto' oki'nara aung-pina' oro' teie tee onkeonke'muaing.

<sup>6</sup> "Teka Baa tee naning aing toire' ning masika'antamaamaing-koo narung dua'antavuaing tee-koo orara aarumo-koo

deeko' tee tee piaaru!. Tee' oro' naning baukoi paravuaruu'nung dei tampa', ai' Kumponinge aa'na' kiimatavuaing tee.

<sup>7</sup> Bakei piaaru'nuka kansi'nupoong amutemuriaunanka orara aarumo-koo nantoong dua'antavaarimaing. Masika', tee' oro' aarumo dua'anta-koong tee poaing, teka bakei piaaru'nuka teing nantoong tee' oro' aarumo tavo'antavaavaining!

<sup>8</sup> “Ee'noko dakaang birenge nii'noo' kau'ke dua'antaruko deeko' orara aarumo-koo, napu'darara taapo' dua'eaing tenau!. Tampa' masika' tee da' nanau' kopu'darara de'doonima domaang otoi oto'noo' beaing, ookanau'ka otoi nta'koo otoi-oto'koong-koo dua'du'neenga.

<sup>9</sup> Ee'noko napo' dakaang dutai orari-antaruko deeko' ka'bantarara taapo' dua'eai. Tampa' masika' tee da' naruta otoi domaang otoi oto'noo' beaing, ookaruta otoko mosianung-koong nta'koo dua'daa'neenga.

<sup>10</sup> Tee'koo tarerariri otoriaing dii'ke aing-koo narung oki'nareka'koo tamung baa'pina' ooeri'neeng, ai' toire' biikaning koosinunakai tee paning-koo uatepa Mma'anko beroma sira'paarimaung baata teing anutua oraka' nkaoarimaing.

<sup>11</sup> “Ee'noko ning Tee Naning-naumpo' Paning-etaing tee nantoong toire' makosinuka pooariru'ning besi'koo mou'nung.

<sup>12</sup> Arekee' noru'erimang dii'ke, naning narung daaku' sipisipi' oto'evuma otopeu'nung ee'noko teing-koo nau pooari dei, teie ee teing nii'ning

mmau' tee-koo mii-koo nii'nameng-koo sipurira  
teu nau besi'koo nanuarupeu' pooarapeu'nu?

<sup>13</sup> Ee'noko masika' minkuamaang, teie daa'ura  
deeko' teu, tee tee bakei aa'na' dotuarapeu' teu-  
koo ee'nu-koo sipisipi'nu-koo, bane teing nii'ning  
mmau' otoroko pooariarupeu'ning.

<sup>14</sup> Tee' nari' napo' tee ee'nung Diuma  
paning-koong koonto' piavoa' narung toire'koo  
oki'nareka' makosinuka-koong paa'koo."

*Naning Da'maiko' Oraka' Nkoarapeu'nung  
Koong-antana'*

<sup>15</sup> "Naning da'marang-koonge oraka' nkoruko  
deeko' bera naueai bakaang oraka'nko dee'dee'ka  
otoresi, ee'noko da' taararuuaing deeko' tee dake  
tampameng-koo barampeing tee.

<sup>16</sup> Teka da'taararuuaruko deeko' nii'nara nii'noo'  
kenaankara da' ninka bokuereta nari' beriai  
tee-anko. Tee' nkoveko ookara kapoo'nanka  
makosina' masika' sira'paravaing kenaankarai  
nii'noo' beenaumoi ooaio'. *(Boto 19:15)*

<sup>17</sup> Ee'noko napo' teing taara-koo piavoaruko  
deeko' dootuu'koo sira'peai. Ee'noko napo'  
dootuu'nupoong taara-koo piavoaruko deeko'  
koonto' mutaanang-koong-pina' nii'noo' taakisi  
nkanuka-koong-pina' nari' nkoveriaing.

<sup>18</sup> Masika' naurampimang, aming kapoo' dii'ke  
anke kansi'koo pinka'eriaing tee napo' paning-  
koo pinka'ari otoainge, ee'noko aming kapoo'  
anke kansi'koo dii'ke dapa'eriaing deeko', paning-  
koo tee' nari' dapa'ari otoainge.

<sup>19</sup> Napo' ee' naurampii'naang, dii'koo  
nii'naankai anke kansi'koo kapoo'koo kara  
naroompereta nia'kireko deeko' tee tee' nari'

piaroreaina' nko-antavuaing teie Mma'ke paning-koonge.

<sup>20</sup> Ai' are' tokoo beenaumo nii'noo' kenaanka naro' poroainoo' nkaang miring-koo, ning tee teke teing-ankoi nari' o'noaing."

### *Tee Mirumiru' Naning Tonta'anta Noru'uaung-koong*

<sup>21</sup> Teketa Piitai pora Jiisuu' nia'uma aa'puu', "Ovoring, ninge naning mmarang-koong are-kee'ning bateie tonta'antavampeu' ning oraka' nkomuko deeko'? Ai' ~kemu'ka-taae?"

<sup>22</sup> Teka Jiisuu'ke maku'uma aa'puu', "Ninge ee' naurama'naang, ~kemu'ka-taae deea', teka teing ~kemu'ka-taa tampe matomaing amutemu'ari ~kemu'ka-taa kivora-namu'pie tonta'antaveaing tee da'maiko'.

<sup>23</sup> "Tee'koo tee muu' paninung tee ee' oro'pari otong: Narung daurarong~ otopeu'nung, ee'noko teie bakaning botovotonaanu ka biikaang ko-maaruu~ tee-koo nkoau'ning nerivuu'naang pi'avou'.

<sup>24</sup> Teketa nerivuri otoko naning mmau' koko-kokorei' mooni' nkavuu'nung tee-anko po'antavaau' bakaang komaaru narivuu'naang.

<sup>25</sup> Teketa pora teie moo' kasi-antavuaruo' teie bakaang ovoringe ee' minkuvuu', 'Ookara-da', da'aang, ee'noko daurukaa', ee'noko dakaning kapoo'nanka baave-koong tee komaaru maku'aravaina'.'

<sup>26</sup> Teketa teie botovotonaanu' tee-koo uro'kanoo' miinge keemparara eentavarama aa'puu', 'Io' si'mera batei ameko ookara kapoo'nanka maku'derompaing.'

<sup>27</sup> Ee'noko teie bakaang ovoringe tee' oovura bakaang domang aa'na' piaavou' tee-koo, ee'noko unaa-antavuma tonta'evuu' tee bakaang komaaru.

<sup>28</sup> Teka tee ee'nung botovotona' teketa tenkenura teie nii'nung botovotona' oovuu' napo' tee-koo nau kiina'nu komaaru oto'evuing. Ee'noko teie moo'ura keni'uma aa'puu', 'Koonto' maku'memuai tee nkaang mooni' dake nkaveu'nung!'

<sup>29</sup> Teketa tee ee'nung ba'maiko' doonko kink-inura eentavarama aa'puu', 'Io' si'mera batei ameko maku'derompaing.'

<sup>30</sup> Teka teie aroo'ua' tee' minkuarako, nka teie bera kiimatanava-koo dai'antavuu' teke otoo'naang bera tee komaaru maku'uainoo'ke basi.

<sup>31</sup> Ee'noko nii'ning botovotona'a'nukai tee teie tee' nkovuko ooaara oraka' dee'orora berora tee biikaang ovoring nauau' ookara kapoo' teie nkovuu'nung.

<sup>32</sup> Teketa teie bakaang ovoringe tee botovotona'a' kuung bokuvuu'. Bokuvura aa'puu', 'Da' tee bakei orara botovotona'a'!

<sup>33</sup> Ning teing dakaning komaarunanka een-tameio' ookara o'antareronsio' dake aming-koo tee da'maiko' nari' botovotona'a' piaavearui tee' ning piaarantu'na' da'?

<sup>34</sup> Ee'noko teie bakaang ovoringe iiravoma tee kiimata-nupoong tanatanuka-anko kosi'uu' teke kiimatavari otoo'naang bera ookara komaarunanka maku'uainoo'ke basi.

<sup>35</sup> Tee' ee'na' nari' teie Mma'ke paning-koonge dii' naruna' naruna' nkoruriaing dii'marang

tonta'antaverereriaruko      deeko'      diikaang  
domang-eta."

## 19

*Nampeesi Toto'koo Jiisuu' Nia'au'na'  
(Mak 10:1-12; Luk 16:18)*

<sup>1</sup> Teketa tenang Jiisuu'ke tee aung karananka minku bakevura Kaaleli'nameng sipura Judia'navora'aape pare'aru' Joo'dani-nari-koo amenka'koonoo'.

<sup>2</sup> Ee'noko nantoong karingai Jiisuu' siompai te' napo' berou', ee'noko teka taare-antavuru' teing.

<sup>3</sup> Ee'noko nii'ning boto keperuu'navitu nari' Jiisuu'anko pororai'nange aavavaama aa'pau', "Botoi ee taura'pui otong naninge ba'aang bata'koo baka piavoma deeko'?"

<sup>4</sup> Jiisuu'ke maku'urima aa'puru' teing, "Dii'ke ee deeruerima tasi'periaung tee Kumponinge pupu'uu'nang donkaani ee'noko manikuma nari' nkovuretu'na'?

<sup>5</sup> Ee'noko aa'pui otong Daari Meekung-koo, 'Tee'koo donkaanie baumararing sipureta ba'aang ninka pinka'areaing, ee'noko tee tenaanka narung mono deempareaing.'  
*(Pupu' 2:24)*

<sup>6</sup> Enang tee, kenaanka deemparea' teka narung deemparesing. Tee'koo kapoo' Kumponinge be'nu'antavuu'nung naro'ka naninge tankaampuauka'nung."

<sup>7</sup> Ee'noko teinge nia'aama napo' aa'pau', "Teka Moosesie aming-koo taura'puma aa'puu',

'Naninge ba'aang sipuma deeko' narung karavoto~ daarivuaiing nampeesi toto'puing tasi'anta-koo?" "*(Boto 24:1-4)*

<sup>8</sup> Teketa Jiisuu'ke maku'urima aa'puu', "Mosesie tee' taura'puu'noo' dii'ankaampi si'koo tee dii' diikaang domang iveka'doriko, teka pupu'aru'noo'ke Kumponinge tee' minkuvua'.

<sup>9</sup> Teka ee' naurampimang ninge, baa tee naning ba'aange tutung kaukauro nkovuaruko bata'ura ee'noko oovunani nampura deeko' teie nampeesi orarivumaung."

<sup>10</sup> Teketa bakaning barevare-nupoonge aa'pau' tee, "Ei, bakei naning ba'aang ninka tee' nari' dai'aresi otoremaatoing deeko' nantoong nampeesiaria' otoaing-koo tampa!"

<sup>11</sup> Teketa Jiisuu'ke maku'uma aa'puru', "Tee' minkuerimatomanan' ookara nantoonge aroo'aavarupeu', teing naing Kumponinge tee' oto'koo miru'urimaing deeko' tee' otoropeu'.

<sup>12</sup> Aa'nomaung-koo: nii'ning makosiaavaing ke'de-ita ponto'arikoo', ee'noko nii'ning nantoonge deeko' tuukavaarikoo', ee'noko nii'ning maroita nampeesi-koo piavoroarukoo' muu' paninung narung-koo kei'oroo'naang. Baa naning tee' oto'koo aroo'aravaing tee makosi tee' otoaing."

### *Toirekaa' Jiisuu'anko Tavo'aaru'na' (Mak 10:13-16; Luk 18:15-17)*

<sup>13</sup> Teketa toirekaa' oki'nareka' Jiisuu'anko tavo'aaru' Jiisuu'ke bireng pante'urira kunsivurii'naang teing. Teka teinge bakaning

barevare-nupoonge      poteaariko'      teing  
tavo'aaru'ning.

<sup>14</sup> Ee'noko Jiisuu'ke aa'puu', "Teing toirekaa'  
taura'perereriko poroai ning-anko, para'ereria',  
ai' tee muu' paninung nantoong amurii' okovuri-  
aing."

<sup>15</sup> Teketa tenang bireng pante'urira teing-koo  
teketa tenkenuu'.

*Narung      Nemaka      Barevarenku      Mmau'  
Oto'evuko'nung*

(Mak 10:17-31; Luk 18:18-30)

<sup>16</sup> Enang tee teketa naning narung Jiisuu'anko  
pora nia'uma aa'puu', "Nau-anta, aming kapoo'  
tampara ninge nkoamira tee domaang opar-  
avauka'nung kompampaing?"

<sup>17</sup> Jiisuu'ke maku'uma aa'puu' tee, "Dake aming-  
koo ning kapoo' tampara nkovepeu'nung-koo  
nia'memaang? Ai' Kumponing narung masikung  
tampara otong. Da' tee domaang oparavaung-koo  
tuntaraa'naangpiarora deeko' dake tee bakaang  
botonanka siompeaing."

<sup>18</sup> Teie aa'puu', "Boto areing?" Ee'noko Jiisuu'ke  
maku'uma aa'puu', "Aing ee' oro' botonanka:

<sup>19</sup> 'Naning dupisi'eauka',  
Nampeesi orarieauka',  
Bakiaa' nkoveauka',  
Daang-koo tuutunampeauka',  
Daumararing deto noru'eresi pakuereaing,' (Toro  
20:12-16)

ee'noko  
'Dake tee naning da'koo due'nung daka piaarara-  
mana' nari' tee' piaaveaing.' " (Boontu  
19:18)

**20** Ee'noko teie nemakai aa'puu', "Aing ookara teroita tanatavantu'ning, ai' aming kapoo' ninge mme' nkoampa'?"

**21** Jiisuu'ke maku'uma aa'puu'tee, "Dake ookara dupe-anta-koo piarora deeko' bera kapoo'nanka dakaning ookara baavevera mooni' nkavera ata'oi'nuka-koo tankaampeaing. Tee' nkovera Paning-koong kavonanka oto'deruaing. Ee'noko ning siomei poai."

**22** Ee'noko teie nemakai tee' taaravura teketa orarunsiari tenkenuu' tee kavokavoro mmau'po'nung deemparako.

**23** Jiisuu'ke tee' oovura bakaning barevare-nupoong nauvurima aa'puru', "Ninge masika' naurampimang dii', tee naning kapoo' mmau'po'nung bakei pore' masikung te' muu' paninung-koo tung-koo.

**24** Ee'noko napo' unampansi naurampii'naang, kaameli'navoro' bamaru'koong busie tumparavarupeu'na' bakei naning kavonanka-poo'nung dau basinoo' makotua' Kumponing bakaang muu'koo tung-koo."

**25** Ee'noko tenang teinge bakaning barevare-nupoonge tee' minkuvuko taaravaara bakei aa'na' ta'ninau'. Ee'noko aa'pau', "Nka enang baa domaang moo'aravaing?"

**26** Ee'noko Jiisuu'ke teing oovurira aa'puru', "Nantoong bii'ka domaang moo'koo makosi deea', Kumponinge deeko' ookara kapoo' nko-koo makosi."

**27** Teketa Piitai baari'uma aa'puu', "Aung ee, teka nii'ke ookara kapoo'nanka niikaning sipampiru'nung da' siontampima, ee'noko nii'ke aming

nkavampiaing?"

<sup>28</sup> Jiisuu'ke maku'urima napo' aa'puru' teing, "Ninge masika' naurampimang, tenang ookara kapoo' neraka'paravainang, ning Tee Naning-naumpo' Paning-etaing teke nkanoo' ba'nava'nani'domai ovorimari ba'nanampainang paninung meenaside baumaritaa', tee' nari' napo' dii' kante ba'nantariri kara simpe'erimaatoaing teing kivora-ita kenaanka muu' Isireeli-nupoong-koo ovontuntariri.

<sup>29</sup> Ee'noko ookara nantoonge aing aa'ning nkaang miring pankaing-anta-koo sipau'ning: pavananka, biumaraang, biurukaa' toire', nii'noo' biikaang kansi', teinge tee daaku'namu'pie maku' nkavaavaing ee'noko napo' tee barenku domaang oparavaung-koong okovuriaing teing.

<sup>30</sup> Teka mmau' nantoong ureai otoromaing dama'ke dama'duariaing, ee'noko dama'duariri otoromaing ureaavai."

## 20

*Tee Mirumiru' Mintoomparira Moo'  
Nkavau'na'koong*

<sup>1</sup> "Tee muu' paninung tee tee-pina' oro', naning mintoonau-po'nung tero tane'ke bera nantoong bakanau-koo mintoong-koo bokuvuru'nung, na'mung doong-koo mintoompariko moo'koo namikue moo'urii'naang tampura;

<sup>2</sup> Ee'noko aroo'aririo' teie bakanau-koo botovuru!"

<sup>3</sup> Teketa napo' duaal deto sirang poio' bera baaveromaa nii'ning nantoong tamung donkon aio' oovuru'.

<sup>4</sup> Ee'noko aa'puru' teing, 'Dii' aing berira nkanau-koo mintoontariai, ee'noko ninge tee makosina' moo'dampiaing.' Ee'noko teing berou' mintoong-koo.

<sup>5</sup> Teketa napo' duaaki'nang ee'noko kamunoo'nang napo' beu' bera tee' nari' tutung nkovuu'na' nkovuu'.

<sup>6</sup> Teketa napo' muung-aapenang berai'nange nii'ning nantoong tamung donkon aio' oovuru', ee'noko nia'uru' teing, aa'puru', 'Dii' aming-koo tamung donkoniri otorimaang e'mung ootukuna'mung kapoo' nkoveria'?'

<sup>7</sup> Teinge aa'pau', 'Nanine bokumuriaruko tee' o'norimaang.' Ee'noko teie aa'puru' teing, 'Dii' napo' berira nkanoo'ke mintoontariaing, ee'noko moo' makosina' nkaveriaing.'

<sup>8</sup> "Teketa muumpuko teie mintoong okovenunge teing bakaning mintoong-nupoong tarevuriko'ning bokuvura aa'puu', 'Teing nantoong mintoomparirining bokuerira moo' averiaing asi'ning-eta bera tutuna'nupoong-koo basi.'

<sup>9</sup> Teing mintoong-nupoong muung-aapenang bokuvurio' tutumpariru'ning poroio' moo'koo namikuna' avuru'.

<sup>10</sup> Tee'koo teing tutung bokuvurio' mintoong tutumpariru'ning mmau' nkavaavaing-pina' noru'ariru', teka teing napo' tee' namikuna' mono kante nkakau'.

<sup>11</sup> Ee'noko teinge tee' nkavaara minkuminkuau'

tee mintoong okovenung, aa'paama,

<sup>12</sup> 'Dake aing dama' mintoong tutumparira narung aua mintoomparirining nii' uipaarii'koo aa'na' mintoomaririning ninka nari' basie moo'ering.'

<sup>13</sup> Teka teie narung teing-koo karavuma aa'puu', 'Ee mmaiko', ninge dii' oraka' nkorampia'. Aroo'eriaruinge ee temiku namiku mintoontarira nka-koo?

<sup>14</sup> Nkaverira aung diikaang moo' beriai. Teing dama' bokuaransing tee' nari' avu'koo piamoi o'nong.

<sup>15</sup> Oraka'ke kapoo' nkaang mooni' ninge pi-amopeu'na' nari' nko-koo? Ai' dii' domang oraru'kiring ee ning tampa' avusiro'mario'?"

<sup>16</sup> Tee' nari' teing nantoong dama'du-nupoong teing ureaavaining, ee'noko ureaamaing teing dama'duariaining."

*Jiisuu'ke      Dama'ke      Boo'antavaavaing  
Beemu'pina' Sira'puu'noo'  
(Mak 10:32-34; Luk 18:31-33)*

<sup>17</sup> Enang tee Jiisuu' uroitaa' Jerusalema'aape daanto beroma bakaning nanai'keta kenaankara barevare-nupoong taapo' tonta'urira teka aa'puru' teing,

<sup>18</sup> "Aing ee, Jerusalema'aape merimang ee'noko teka ee'noo'ka naninge tooka kompui ning Tee Naning-naumpo' Paning-etaing taura'muu'naang aa'ning-koo Piristi'nuka-koo ovontung ee'noko boto naunuka, ee'noko teinge tee ning dupisi'koo manemaavaing.

<sup>19</sup> Ee'noko teinge Ju'deeing-anko si'maavaing teka akapeu'maama mura'maava'naang, ee'noko aa'barata'koo bi'maara dupisi'maavaing. Teketa beenang doong deemparako napo' daa'maravaing."

*Jiemisi Namainta Jooni Beuko Bakaang Piapia  
(Mak 10:35-45)*

<sup>20</sup> Teketa napo' Siebedi baurinketa beuko Ji-isuu'anko pou'baurinketa ninka. Pora uro'kanoo' kinkinura eentavaru'.

<sup>21</sup> Jiisuu'ke aa'puu', nia'uma, "Da' aming kapoo' piaromaang?" Ee'noko tenie aa'puu', "Amainta nnurinketa dake enang ee' miru'erealing narung tampavine-aape ba'nanuaing ee'noko narung mare'aanavine-aape da'koo tenang da' dauarong deentaravainang."

<sup>22</sup> Teketa Jiisuu'ke temainta aa'puretu', "Dee'ke noru'erea' tee kapoo' eentameremaatomaung. Dee'ke ee teru' ntonaru' oraka' dee'naru' ning naikampainaru' naikirepeu'? Ee'noko tee sisikeera ning meeka'antamaravainge ee meeka'antararepeu'?" Ee'noko temaintai maku'urema aa'puretu', "Ee', nee' makosira."

<sup>23</sup> Teketa Jiisuu'ke aa'puretu', "Ee', masika' dee'ke naiereaing teru' nkanareng-eta, ee'noko tee' sisikeerai meeka'antarareainge ning meeka'antamaravaina', teka tee ba'nava'nani' ning-koo tampavine-koo nii'noo' mare'aanavine-koo ning-koo ninge miru'koo makosi deea'. Teie Mma'ke bampuu'na' ba'nantareaing."

<sup>24</sup> Ee'noko teinge napo' nanai'ke tee' taaravaara teinge iikoo'aaretu' temainta.

<sup>25</sup> Teketa Jiisuu'ke ookara naro' bokuvurira aa'puru', "Dii'ke noru'eri otong teing nantoong Ju'deeaaing-kooning urantanuka bii'ka ovontumparimaing ee'noko biikaning pankenankai biikaang iri'ke nantoong etuaarikoo'.

<sup>26</sup> Teka dii'koo tee' nkoaravauka'nung. Ee' nkoaravaing dii'koo: baa tee naning Kumponing bakaang duta-koo pankaimparaa'naang piavoiaing dii'koo meu'ke tee tee ee'nung pakupakunung deemparavaing.

<sup>27</sup> Ee'noko napo' baa tee naning dii'koo dau basi deemparaan'aang piavoiaing tee tee ee'nung napo' dii'koo botovotonaa' otoaing.

<sup>28</sup> Ning Tee Naning-naumpo' Paning-etaing tee'ke, kansi'koo ovoring-pina' oto'koo moa', teka pakupakunung deemaraan'aang mou'nung, ee'noko nkaang domaang dua'koo teing-koo mmau' boo'keta simpiri'ariif'naang."

*Kenaanka Kaputu'ka Ookuretu'na'  
(Mak 10:46-52; Luk 18:35-43)*

<sup>29</sup> Teketa tenang Jiisuu' teing ninka bakaning barevare-nupoong Jerikoo'namono sipaara beroko nantoong karingai siompau' tee.

<sup>30</sup> Kenaanka naninka kaputu'ka taung miiringe ba'nanuresi otoreko', ee'noko tenang tee Jiisuu' teketa tankinuko taaravureta tenaanka bokurema aa'puretu', "Ovoring, Deevita' bakanaving-koong, piaamereai nee'."

<sup>31</sup> Teka nantoong karingai aka'paarema dooroomparee'naang botaaretu'. Teka tenaanka baru' aa'na' bokuretu' aa'purema,

“Ovoring, Deevita' bakanaving-koong, piaamereai nee!.”

<sup>32</sup> Jiisuu'ke te' datearara bokuvuretu' tenaanka, teketa aa'puretu', “Dee' ninge arekee' nkorampee'naang piaroremang?”

<sup>33</sup> Tenaankai nauvurema aa'puretu', “Ovoring ee, nee' ookampee'naang piomoremang.”

<sup>34</sup> Jiisuu' bakaang domang aa'na' piaavou' tenaanka-koo, ee'noko beekaang duta kompureko namu'ke bantoreta ookuretu'. Teketa Jiisuu' siompuretu'.

## **Jiisuu'ke Nantoong Asi'noo' Nau-antavuru'na' Jerusalema'**

### 21

*(21:1-25:46)*

*Jiisuu' Daurarong Deemparara Jerusalema'  
Tumparu'na'*

*(Kena 118:25-27; Mak 11:1-11; Luk 19:28-40; Jon 12:12-19)*

<sup>1</sup> Tenang Jiisuu' bakaning ninka Jerusalema' duerue'aama Bepasi-namono-koo basiarima Olive'po'namii-koo otoinoo', Jiisuu'ke bakaning barevare-nupoong-koo kenaanka uro'ke botovuretu' aa'purema,

<sup>2</sup> “Temono-koo danto uro'kanoo'ke otoi-namono-koo du'dareai, ee'noko du'dareta namu'ke doonkii'navoro' mo'ming-koo bi'ari teke otoko oo veree'naang, baurung-navoro' kampia-navoro' nari!. Tevoro' dapa'ereta ookeng a' ning-anko po'antavereai.

**3** Nii'nung naninge tokoona' minkurureko nauerema aa'pereai, 'Ovoring piavoing akong,' ee'noko teie namu'ke botorureaing aa'puma, 'Bokuvereri bereai.'

**4** Aung tee kapoo' narunge temu'nunge nakaronunge tarampeearama~ minkuvuu'nung dupearaa'naang tee' nkoaru', tee Daari Meekung-koo aa'puu'noo'ka minkuvuu'nung,

**5** "Bera naueriai teing Saioni-nupoong, aa'periaing, 'Ooveriaing, diikaang daurarong~ dii'anko dooroompari banainge pomaang, doonkii'nu\* kampianu-koo dau ba'nanui, kau' karenaumo-nu dooroompari manki'nanka nkavumau-koo.' " (*Aisaia' 62:11; Sekaraia 9:9*)

**6** Teketa tenaanka Jiisuu' bakaning-koonaanka barevare-nupoong-naanka bereta tee' nauvuretu'na' nkoaretu'.

**7** Tenaankai teu doonkii'nu baurinu ninka po'antavuresio' teinge biikaang baarong dau tani'au', ee'noko Jiisuu' baaronanka-koo dau ba'namparu'.

**8** Teketa nantoong karingai biikaang baaronanka taunge danto tani'au', ee'noko nii'ninge uurung tovang napu'aama tani'au'.

**9** Ee'noko teing karinga Jiisuu'koo uro'kanoo'ke nanau'ninge ee'noko dama'du-eta porou'ninge eura bokiaama aa'paako', "Biraanke tee-koo Deevita' baurung! Biraanke-po'nung aung Ovoring

\* **21:5:** Nii'ning dauraronanka oosi pankenankai kare-koo data-voromainge nanaamaung nantoonge ankampaarii'naang.

bakaang miring-koo pomaang! Biraanke otoi otaoing a'dei'ke paning-koo nari!"

<sup>10</sup> Teketa tenang Jiisuu' Jerusalema' tumparako ookara nantoong temono-koo-nupoonge irikung-antavarira nia'kaama aa'paako', "Aung baa?"

<sup>11</sup> Ee'noko nantoong karingai maku'aama aa'pau', "Aung tee nakaronara Jiisuu', Nasareti'nung, te' ee'noo' Kaaleli'koonoo!."

*Jiisuu'ke Dootuu'navaa Pankava-koo Baave Nkonuka Bata'uru'na'  
(Mak 11:15-19; Luk 19:45-48; Jon 2:13-22)*

<sup>12</sup> Teketa Jiisuu' parang-koo tumparara pava dootuu'navaa pankava-koong-koo nantoong sipisipi' dovang parekanumpo' baaveveeko'ning bata'uru'nung. Aa'noko batanananka mooni' aampari'aako'ning biikaning ee'noko napo' ba'navaa'nananka kuukuu' baave-aariko'ning biikaning teka piakatu'uru'.

<sup>13</sup> Aa'puru' teing, "Kumponing bakaang kara Daari Meekung-koo tee ee' daariari otong, 'Nkaang pava tee pava kunsinava tampari otaoing,' *(Aisaia' 56:7)* teka dii'ke 'bakiaa' nkonuka biikanoo" deeng-antavering." *(Jeremaia 7:11)*

<sup>14</sup> Teketa kaputu'nanka ee'noko dootananka tee-anko porou' te' dootuu'navaa pankava-koo, ee'noko teka taare-antavuru' teing.

<sup>15</sup> Teka teing piristi'nuka-koo pankenge ee'noko boto naunukai tee' ooaara domang oraka' dee'orou' teie kapoo' tampeng ta'nimpaarii'nanka nkovuko ee'noko napo'

toire'ke dootuu'navaa pankava-koo parang-koo kuunga oovavaama aa'paako'nung-koo, "Daangampampimaatoaing tee Deevita'bauring."

<sup>16</sup> Teinge nia'aama aa'pau!, "Dake ee taarave-maang tee kapoo' toire'ke minkuaamatomaung?" Jiisuu'ke maku'urima aa'puu!, "Ee!. Teka ee dii'ke tee Daari Meekung-koo deeruerima noru'eriaung aa'pumanoo'ka,

'Toire' ee'noko nerakau'nuka biikaang be'duu'keta dake tee dangaraangang tavo'antaveaing?" "*(Kena 8:2)*

<sup>17</sup> Ee'noko teing teka temono-koo sipurira Beetani-navuntu'aape tenkenura teke aatuu'.

*Tee Koi' Piiki' Mara'ou'na' Jiisuu'ke  
Barakosi'ui'*  
*(Mak 11:12-14,20-24)*

<sup>18</sup> Teketa dauna'mung tero maata Jerusalema'aape napo' bema Jiisuu' tee peeravou!.

<sup>19</sup> Teketa piiki'navari taung miiringa oovura te' tevari-anko beu!. Teka sinang tevari-koo oovua', para' narung otoko oovuu'. Teketa aa'puu' tevari, "Da'koo tee napo' sinang bi'duauka'nung." Teketa namu'ke tevari mara'oi boo'paru'.

<sup>20</sup> Teketa tenang bakaning barevare-nupoonge tee ooaara teing bakei ta'ninau' ee'noko aa'pau!, "Aung avari arekee' namu'ke mara'oi boo'paring?"

<sup>21</sup> Jiisuu'ke teing maku'urima aa'puru!, "Masika' naurampimang ning, dii' masika'anta oto'deruri

deeko', keekoo'daria', aung avari-koo nkoaring-pina' oro' dau basina' nkoveriaing, aa'noko aunte-to iu' dii'ke aa'periko, 'Bita'darara pirung-koo dua'daravai,' tee' nkoarapeu'.

<sup>22</sup> Masika'antaveri nia'kiriaing deeko' tee nkaveriaing kapoo' eentarariaing diikaang kunsikoo."

*Jiisuu' Bakaang Purinto'koong Okora'  
Nia'au'na'*  
(Mak 11:27-33; Luk 20:1-8)

<sup>23</sup> Teketa tee Jiisuu' pava dootuu'navaa pankava-koong-koo parang-koo kuung tumparu', ee'noko teke nau-antavarako piristi'koo ovontung ee'noko nantoong urang-antanuka tee-anko porou'. Porora tana'aama aa'pau', "Tee aung aremurii' taura' otoko dake aing kapoo'nanka nkovemaatoing? Ee'noko napo' baie aruu'nunge tee taura'?"

<sup>24</sup> Jiisuu'ke maku'urima aa'puru', "Ninge dii' napo'tana'dampiaing, ee'noko ning maku'meriko ning naurampiaing tee taura' ning oto'memuko teing aing kapoo'nanka nkoamaung okora'noo'.

<sup>25</sup> Jooni Minkinara-koo nia'dampii'naang: baie taura'puio' nantoong ntong-koo minkivurima meeka'antavuriko'? Kumponinge, ai' tamung nantoonge?" Teketa teing bii'ka nia'eema aa'peeko', "Are'pampii'naang? Aa'pampiko deeko', 'Kumponinge,' teie aa'murii'naang, 'Teka dii'ke aming-koo Jooni masika'antaveriaruko'?"

<sup>26</sup> Napo' aa'pampiko deeko', 'Tamung nantoong-etaing,' nantoonge tamaari'neenga, ai' teinge tee ookarai Jooni nakaronara Kumponing-etaing tasi'pai otong."

**27** Teketa Jiisuu' maku'aama aa'pau', "Nii'ke aa' noru'ampia!." Teketa Jiisuu'ke aa'puru' teing, "Ee', ninge tee'ke dii' naurampiaroo'naang baa tee ning taura' amuu'nung aing kapoo'nanka nkokoos."

### *Tee Mirumiru' Naning-namainta Kemaintara-koong*

**28** "Aung minkunaa arekee' pa noru'erii'naang dii'ke? Naning narung baurinketa kenaanka otoko'nung. Tutuna'nung bauring-anko bera aa'puu' tee, 'E'mung da' bera mintoona-koo mintoontaravai.'

**29** Ee'noko teie maku'uma aa'puu', 'Ning aa' mearoo'naang,' teka dama'ke noru' paariarara mintoong-koo nanuu'.

**30** Teketa tee bauma napo' nii'nung-anko bauring-anko bera tee' nari' minkuvuu', ee'noko teie aa'puu', 'Mera mintoomaraa'naang,' teka dama'ke bearuu' mintoong-koo.

**31** Temainta-koo arerai beuma bakaang pia siompuu'?" Teinge maku'aama aa'pau', "Teie tutuna'nunge." Teketa Jiisuu'ke aa'puru' teing, "Masika' naurampimang ninge dii', teinge taakisi nkanukai ee'noko teing maniku' auning nkonuka teinge tee dii' divu'daari muu' Kumponing bakaang-koo beroaing.

**32** Ai' Jooni tee dii'anko pora taung koonto'navung naururiko dii'ke masika'antaveriaruu', teka teinge taakisi nkanukai ee'noko maniku' auning nkonukai masika'antavaamaung, ee'noko bane bere'ariko ooverira, dii'ke tee masika'antaverima bere'daria' otong."

*Kara Dikito' Teing Nantoong Oreng Mintoong  
Tanata-koo Sipuru'ning-koong  
(Mak 12:1-12; Luk 20:9-19)*

<sup>33</sup> "Napo' nii'nung mirumiru'koo taarakiriai. Aung aa' tee naning narung ovoring otoko'nung bakaang kansil'koo mintoonau uaininau keempura. Ee'noko parampuu' tenau, dinkung nenke'uu' uaini mii'doma tenau-koong. Ee'noko pava tarenava siarua' kanivuu'. Teketa nii'ning nantoong tenau tare-antavurira nii'nameensi'koo tenkenuu'.

<sup>34</sup> Teketa batei sinang kavu'koong due'uko teie bakaning botovotona'a'nuka botovuru' teing-anko uaini tarenuka-anko bakaang baarauni~ tenau-koong nkaevaava'naang.

<sup>35</sup> Teketa teinge tenau tarenuksi teing bakaning botovotona'a'nuka moo'aarima dai'aaru', narung murasiavaama nii'nung dupisi'au', teketa beenaumo-nung kapange tavaama dupisi'au'.

<sup>36</sup> Teketa napo' teie ovoringe nii'ning mmau' botovotona'a'nuka napo' teing-anko botovuru' tutuna'namu'koo botovuru'ning-koo dau basining, teketa teinge tenau tare-antavuru'ninge tee' nari' tutuna'ning nkaoaru'na' nkaoaru'.

<sup>37</sup> Asi'na'moo masika'moo teie baurung botovuu' teing tarenuka-anko, ee' noru'ura, teing tee nnuring-koo amaiaa'oroaing.

<sup>38</sup> Teka teing tare nkonusi teie baurung ooaara teinge bii'ka kareaama aa'paako', 'Tee aung ee'nung barenku okovuaing. Aia' dupisi'ampiaing tee, barenku okomuriaina!.'

<sup>39</sup> Teketa teinge kompaara tee uaininau-eta dama'du dua'aara teka dupisi'au' tee.

**40** Ee'noko tenau okonarai pora teing tenau tarenuka arekee' nkovuriaing?"

**41** Teinge aa'pau', "Teie aa' teing maarekusi'nuka bakei maremaarenoo' basi-antavuri dupisi'uriaing, ee'noko tee tenau teie nii'ning napo' tare-antavuriaing baarauni~ tenau-koong avaamatoaining sinang kavaama."

**42** Teketa Jiisuu'ke aa'puru' teing, "Dii'ke ee tee Daari Meekung-koong kara deeruerima dama' nkoaravaina' tasi'periaung aa'pui otoinoo'ka,

'Tere' ee'nare' kapanare' pava kaninukai poore'aama dua'au'nare' ookutunavakoo e'manianare' tumanare' deempario' tasi'pau' dama'ke. Ovoringe tee' ee'na' nko-antavuu' ee'noko bakei ta'nimpaarii' niikaang duta-koo.' *(Kena 118:22-23)*

**43** Tee'koo ninge naurampimang, tee muu' Kumponing bakaang tee dii' pari'duriaing bera teing nantoong sinang tampara tavo'antavaavaining avuriai.

**44** Ee'noko ookara nantoong tere'koo tasi'paava' tupampariaining tee biil'ka pisira'ariaing, bera baa tee naning tere' dau dua'aravaing tee tere'ke puutuvuaing."

**45** Teketa tenang teinge piristi'koo ovontunge ee'noko Boto Keperuu'navitue Jiisuu' bakaang kara mirumiru' taaravaara tee teing tasi'pariru' teing ee'ning minkuvuru'nung Jiisuu'ke.

**46** Teka tee dai'aava'naang taung besi'aama nantoong karinga-koo avoreeaako', nantoonge tee ee'nung nakaronung noru'ai otoinoo'koo.

## 22

*Kara Mirumiru' Nampeesi-koong Paroro-koo  
(Luk 14:16-24)*

<sup>1</sup> Napo' Jiisuu'ke kara mirumiru'po'nung nauvurima aa'puru',

<sup>2</sup> "Tee muu' paninung napo' tee tee' oro' narung dauraronge~ bauring nampeesiaraa'naang paroro pankaing maamu-antavuu'nung-pina'.

<sup>3</sup> Teie tee bakaning botovotonaanuka botovuru' teing nantoong paroro-koo para' avaaru'ning bokuaariko poroo'naang, teka teing kupi'orora poroaruu'.

<sup>4</sup> Teketa teie napo' nii'ning botovotonaanuka botovurima aa'puru', 'Berira nauereriaing teing ninge para' avorontu'ning tee nkaang taamang emu' maamuari otong. Aa'noing boromaka' pankeng bi'aransi, kampianing nunkemparamaing nari!. Enang tee ookara kapoo'nanka tee maamu-antavari otong. Poroaing enang nampeesi-koong paroro-koo.'

<sup>5</sup> "Teka teinge taaravaava' tenkenau', aa'nou' narung bakanoo' mintoong-koo nanuu', nii'nung mooni' besi'koong-koo nko-nko-koo nanuu'.

<sup>6</sup> Ee'noko nii'ninge teing bakaning botovotonaanuka moo'aarima poore'aarima tavaarira dupisi'aaru'.

<sup>7</sup> Ee'noko tee daurarong bakei iiravou' bera teie bakaning piatooronuka~ botovurio' berora pini-aaru' teing dupisi' nkonuka, ee'noko biikaang osi tai-antavau'.

<sup>8</sup> Teketa aa'puru' teing bakaning botovotonaanuka, 'Paroro tee nampeesi-koong

maamuari otong, teka teing nantoong para'  
avorontu'ning teing makosinuka deempariarura  
poroaruining.

<sup>9</sup> Berira nantoong kunekune'nairu-koo naniri-  
aing ee'noko baata teka meu'pereriaining ookara  
paroro-koo para' averererai.'

<sup>10</sup> Teketa teing botovotona'a'nuka taung  
sionairue nanaama ookara nantoong bokuaaru'  
meu'paaru'ning ookamurii'ka nantoong, oreng  
ee'noko tampeng. Ee'noko teketa tee teva'  
nampeesinava baranee'ke aa'na' maanto'au'.

<sup>11</sup> "Teketa tenang daurarong kuung poma  
baranee' oovurii'naang teka naning narung  
nampeesi-koong paroro-koo mononopa'  
kurumparavaruu'nung oovuu'.

<sup>12</sup> Teketa nia'uma aa'puu' tee, 'Mmaiko' ee,  
da' arekee' a' poi nampeesi-koong paroro-koo  
mononopa' kuruntaravaung?' Teka tee naning  
karoa'.

<sup>13</sup> Teketa dauraronge teing bakaning pakupaku-  
nupoong nauvurima aa'puru', 'Dai'eriai tee aung  
ookeng kau' ee'noko bireng. Teketa a'dang  
dama'du dua'eriai mutaananoo', te' ee'noo' nant-  
toong biromparima si'da' dovang kakirinkuari-  
matoainoo' sisikeera-koo otoroi.'

<sup>14</sup> Tee' nari' nantoong mmau' para' avu'nii'nuka  
otorong, teka oki'ning naing miru'uriaing panin-  
ung muu'koo."

*Taakisi Moo'koo Jiisuu' Nia'au'na'  
(Mak 12:13-17; Luk 20:20-26)*

<sup>15</sup> Teketa teing Boto Keperuu'navitu tenkenaara  
taung besi'au' Jiisuu' dawa'koo.

<sup>16</sup> Teketa biikaning barevare-nupoong Jiisuu'anko botoaaru'. Ee'noko Eeroti' bakanavitu ninka nari' berora aa'pau', "Nau-anta ee, nii'ke da' noru'dampiri otong naning masikung narung minku. Kumponing bakanavung taung nau-antaverimaung miru'ari otoina' masika'. Tankaang-anta-pina' oro'daravaunge, ai' nantoong-koo amaiaa'doaunge biikaang miring noru'ema.

<sup>17</sup> Enang naumeriaing nii' dake noru'emana': Arekee', nii'ke Ju'nupoonge ee daurarong~ pankaing, Siisa'~, Rooma'nung, taakisi avu'koo makosi, ai' makosi deea'?"

<sup>18</sup> Teka Jiisuu'ke tee biikaang noru' orara noru'ura aa'puru', "Dii'ke ampirinunukai ning aming-koo dawa'merimaang?

<sup>19</sup> Io' mooni'nu naumeriai teu taakisi-koo dua'erimaung." Ee'noko teinge mooni'nu nau tavo'au' tee-anko.

<sup>20</sup> Ee'noko Jiisuu'ke nia'urima aa'puru' teing, "Au-koo aung bore'uu'aa' baa-koong aa'nung miring daariari otong?"

<sup>21</sup> Teinge aa'pau', "Siisa'koong." Teketa teie aa'puru' teing, "Tee tee averiaing teing kapoo' Siisa' bakaning tee-anko, ee'noko Kumponing bakaning Kumponing-aape averiai."

<sup>22</sup> Teketa tenang tee' taaravaara teing bakei ta'ninaara tee teka sipaara tenkenau'.

*Dama'ke      Nampeesi-koo      Nkoaravaina'  
Nia'au'na'  
(Mak 12:18-27; Luk 20:27-40)*

<sup>23</sup> Te'mung ee'na'mung napo' noru' pitunavitu-koo nii'ning Jiisuu'anko niania' ninka porou', boo'keta napo' daa' masika'antavaava'navitu.

<sup>24</sup> Porora avakareaama aa'pau', "Nau-anta, Moosesie ee' naumurima daarivuu', 'Naning narung booko ba'aang otoko toire' otoa' tee donkaani baara'ma'nunge nampuaing teni naaro tee ninka bataata boo'paru'nung tooto' paraevuree'naang.' *(Boto 25:5)*

<sup>25</sup> Uriamu' tee namaia' naro'ka pa'noko'keta kenaanka nii'koo otoroko'nung. Ee'noko tutuna'nung nampeesiaraara boo'paru' baurung otoa'. Ee'noko baara'ma'nunge teni manikuma nampura tee' nari' boo'paru' baurung otoa'.

<sup>26</sup> Teketa beenaumo-nunge. Tee' nari' temaia'koo ookara-koo pa'noko'keta kenaanka-koo nkoaru'. Ookara boorou' biurukaa' otoroa'.

<sup>27</sup> Ee'noko asi'na'moo teni nani manikuma boo'paru'.

<sup>28</sup> Enang te'mung asirana'mung boo'nuka daa'ariaina'mung teni ani arera temaia'koo pa'noko'keta kenaanka-koo ba'aang deemparavainani? Ai' teinge tee ookarai nampau'nanie teni."

<sup>29</sup> Jiisuu'ke maku'uma aa'puru' teing, "Dii' bakei papaarararimaung tee Daari Meekung-koong kara ee'noko Kumponing bakaang purinto' noru'eriarama.

<sup>30</sup> Dama'ke nantoong boo'keta daa'arira teing nampeesiaria' otoroaing Kumponing bakaning koosinunanka paning-etaning-pina'.

<sup>31</sup> Teka tenaare-koo boo'keta napo' daa'naare-koo dii'ke ee deeruerima tasi'periaung aung

Kumponinge Daari Meekung-koo aa'duru'nung,  
 32 'Ning tee Kumponing teing aing aa'ning  
 temu'nupoong biikaang: Eebaraami',  
 Aisake', Jeekopi'. Teing ninka komeeri  
 O'noi O'nomaung ning.'? *(Toro 3:6)*

Tee' minkuvuu'nung-koo tasil'pampiri otong  
 ookara bakaning deempariri domantoo'nuka  
 otorong Kumponing bakaang duta-koo, boo'nuka  
 deea!'."

33 Teketa nantoong karingai tee bakaang nau-  
 anta taaravaara bakei ta'ninau'.

*Botonanka-koo Dau Basi Masikung Boto*  
*(Mak 12:28-31; Luk 10:25-28)*

34 Jiisuu'ke noru' pitunavitu karantavuriaruio'  
 taaravaara Boto Keperuu'navitu bii'ka  
 naro'ariru'.

35 Ee'noko teketa narunge teing-koo boto-koo  
 norukasi'ke Jiisuu' paaravuma niania' nia'uma  
 aa'puu',

36 "Nau-anta, botonanka-koo arera pankaing  
 masikung boto?"

37 Jiisuu'ke maku'uma aa'puu' tee, "Aung boto  
 pankaing masikung:

'Dake pankaruntoompeaing Ovoring dakaang  
 Kumponing ootukunung dakaang domang-  
 eta ee'noko ootukunung dakaang uraang-  
 eta~ ee'noko ootukunung dakaang onou-  
 eta.' *(Boto 6:5)*

38 Aung tee ookara-koo boto-koo tutuna'nung  
 ee'noko pankaing masikung.

39 Ee'noko tee kenaanka-nung boto tee tee-pina'  
 nari' oro' aung:

'Dake tee naning da'koo due'nung daka piaarara-mana' nari' tee' piaaveaing.' *(Boontu 19:18)*

<sup>40</sup> Ookara botonanka ee'noko nakaro-nupoong biikaning kara aing-koo kenaanka-koo boto-koo bi'ariri otorong."

*Karistoo' Baa Bauring Deempari Poaing?*  
*(Mak 12:35-37; Luk 10:25-28)*

<sup>41</sup> Tenang ee'nang teing Boto Keperuu'navitu naro'arira otoroko Jiisuu'ke biikaang noru' tante-anta-koo nia'urima aa'puru',

<sup>42</sup> "Tee naning Kumponinge Pako'pari'uu'nung~ nantoong domampuri tarevuriaainoo'koo arekee' noru'erimaung, baa bakanaving-koong deempari tavo'aravainge?" Teinge maku'aama aa'pau', "Deevita' bakanaving-koong deempari tavo'aravaing."

<sup>43</sup> Ee'noko teie aa'puru' teing, "Nka Deevita' arekee'koo Tanuaang Meekunge karantavuko tee Ovoring tampuu' Daari Meekung-koo aa'pumanoo'ka,

<sup>44</sup> 'Teie Ovoringe nkaang Ovoring aa'puu', "A', ning-koo tampavine-koo ba'naniai bera ninge dakaning kare-nupoong dakaang kau'koo boonavete-koo siparampainoo'ke basi." ' *(Kena 11:1)*

<sup>45</sup> Tee' minkuvuma Deevita'ke tee Pako'pari'nii' Ovoring Kumponing-pina' basi tampuu'nung. Enang Kumponing deemparako arekee' napo' Deevita' bakanaving-koong tampaapeu'?"

<sup>46</sup> Tee' minkuvuio' naninge maku'uma kapoo' minkuvua', ee'noko te'mung-eta deto teing

ookara nantoong avoreau' Jiisuu' nii'ning niania'  
nia'koo.

## 23

*Jiisuu'ke Bakaning Ampirinumpariaroo'naang  
Orokovuru'na'*

(Mak 12:38-39; Luk 11:43,46; 20:45-46)

<sup>1</sup> Teketa Jiisuu'ke nantoong karinga ee'noko teing bakaning barevare-nupoong aa'puru',

<sup>2</sup> "Teing boto naunuka ee'noko Boto Keperuu'navitu Moosesi paariau'ning bakaang boto nau-anta-koo.

<sup>3</sup> Tee'koo diikaning ovo'ma'nuka deempariko taaraverereriaing kapoo' nauraariaining, teka kapoo'nanka teinge nkooavaining dii'ke nkoveriauka', ai' teinge tee kapoo' daankiaamaung nkognkoi siong-antavaavaung.

<sup>4</sup> Teinge tee pore'antavaarimaung mmau' boto nantoonge tareaava'naang botaarima, teka bii'ka teinge oki'noo' tareaava'!

<sup>5</sup> "Ookara kapoo'nanka teinge nkooamaing nantoonge oo-koo maroita nkooamaung. Aa'nomaung: dootuu'koong taa'ni'anta teing dapapi' dai'arikoo', ee'noko dootuu'kooning baarong-koong puraparari bakei isikeng kurumparikoo'.

<sup>6</sup> Paroro kante-koo te' ovontung biikanoo' ba'nang-koo piavorokoo'. Napo' pava dootuu'nairu-koo ba'nava'nani'nanka tampeng-koo ba'naniaakoo' nantoonge ankampaaria'naang.

<sup>7</sup> Napo' nantoong kunekune'nairu-koo  
nantoonge onkeonke'aarimaatoo'naang  
piavorokoo' 'Nau-anta Pankaing' tampaarima.

<sup>8</sup> Teka dii' teing 'Nau-anta Pankaing!'  
tantaariauka'ning, ai' diikaang Siong-anta tee  
narung masikung otong, ee'noko dii' teing  
namaia' makosinuka.

<sup>9</sup> Ee'noko napo' naning narung anke kansi'koo  
diuma tamperiauka', ai' dii' teing narung  
masikung Diuma otong, ee'noko tee tee paning-  
koo otomaung.

<sup>10</sup> Ee'noko nau-antananka pankeng tantaari-  
auka', ai' dii' teing tee narung Nau-anta Pankaing  
oto'deruring tee Kumponinge Pako'pari'nii'.

<sup>11</sup> Naning dii'koo pankaing masikung tee  
ee'nung dii'koo meu'ke pakupaku nkovuaing.

<sup>12</sup> Baa tee naning baka deto basiaramaung  
dama'ke doonko basi deemparavaing, ee'noko  
baa tee naning boonko noru'ari otomaung tee tee  
ee'nung deto basi deemparavaing.

*Jiisuu'ke Teing Boto Keperuu'navitu Ioo'uru'na'  
Ampirinumpariko'nung-koo*

(Mak 12:40; Luk 11:39-52; 20:47)

<sup>13</sup> Baka' piaaru'nuka dii' boto naunuka ee'noko  
dii' Boto Keperuu'navitu, bakei tora'kiriaining  
dii' ampirinunuka. Dii' ee'ning dii'ka muu'  
paninung-koo tuntariaruma nii'ning napo'  
taura'perereriarukoo' te' tumparipeu'ning.

<sup>14</sup> Baka' piaaru'nuka dii' boto naunuka ee'noko  
dii' Boto Keperuu'navitu, bakei tora'kiriaining  
dii' ampirinunuka. Dii'ke naeroonku biikan-  
ing kapoo'nanka pari'ererima opevurerererikoo'

kunsi isikanankai dakaraka'darima nantoonge tampa' ooraarii'naang. Tee'koo dii' teing bakei aa'na' kiimatarariaining.

<sup>15</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka. Nanununu' isipo' basi nkoverikoo' pirung-koo daue ee'noko kans'i'koo narung naning dii'koo bere'araa'naang, ee'noko tenang dii'anko pok'o dii'ke bakei dii'koo dau basina' mosianung-koo nanu'koong deeng-antaverikoo'.

<sup>16</sup> Baka' piaaru'nuka dii' kaputu'dariri nantoong taung nau-anta-koo piarorimaing aa'perima, 'Naning dootuu'nav'a pankava tampuma marakavaravaing tee kapoo' otoa', teka baa tee naning dootuu'nav'a pankava-koong koro tampuma marakavaravaing tee tee dai'ari otong tee bakaang maraka-anta dupe-anta-koo.'

<sup>17</sup> Dii' bakei kaputu'nuka mutaanang-kooning, arera teing-koo aing-koo aa'ning-koo dau basi: koro nii'noo' dootuu'nav'a pankava tee koro meeka'antavumanava?

<sup>18</sup> Napo' aa'perikoo' dii'ke, 'Naning boonturoma-koo marakavarako kapoo' nkoaravauka'nung, teka naning te' kapoo' darimpaamaung-koo marakavarara deeko' teie tee tee dupe-antavuaing.'

<sup>19</sup> Dii' bakei kaputu'nuka mutaanang-kooning, arera kapoo' pankaing masikung teing-koo, tee kapoo' darimpaamaung ai' te' boonturoma tee kapoo' te' darimpaamaung meeka'antavumaung?

<sup>20</sup> Tee'koo baa naning boonturoma-koo

marakavaravaing tee te'koo marakavaravaing ee'noko ookara kapoo'nanka teke otoroining-koo nari!.

<sup>21</sup> Ee'noko baa tee naning dootuu'nav a pankava-koo marakavaravaing tee teva-koo marakavaravaing ee'noko tee-koo Kumponing-koo teke otomaung-koo nari!.

<sup>22</sup> Ee'noko baa tee naning paning-koo marakavaravaing tee tee Kumponing bakanoo' ba'nanui tare nkromma-koo marakavaramaang ee'noko napo' tee-koo te' ba'nanui otomaung-koo nari!.

<sup>23</sup> "Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka, ai' dii'ke tee avutevu' napoka dovang oki'nareka' kivorana' tankaamperima baarauni-koo~ namanto Kumponing averikoo', sirivita' dovang ko'dompuu', teka teing kapoo' boto-koo pankeng dama'duerikoo' aa'ning: aarumo koonto'na' simpe', aarumo piaa unaa-anta-po'nung, ee'noko Kumponing masika'antavui kake'iiari oto'. Aing ee'ning teing dii'ke naro'ka nko-koo makosining.

<sup>24</sup> Dii' kaputu'nuka taung nau-anta-koo piarormimaing, oki'nareka' kapoo'nanka aa'na' pukerariri maa'erikoo', teka kapoo' pankaing opo' dunkumperikoo'.

<sup>25</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka~. Diikaning kaapunanka-koo ee'noko bantovanto'nanka-koo dama'du aa'na' kiiroraa'antaverikoo' duu'perima, teka kuung teing-koo bakiaa'ke maanto', ee'noko mono

bakaang pia narung siong.

<sup>26</sup> Dii' Boto Keperuu'navitu kaputu'nuka, tutung kuung kiiroraa'antaverimaatoai teing diikaning kaapu ee'noko bantovanto'nanka aa'noaina' dama'du nari' kiiroraa' otoai.

<sup>27</sup> Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka. Dii' kuvi dako'doma dama'du aa'na' kiiroraa'antavaamaing-pina' oro'nuka dama'du-eta tampa' oro'paraa'naang, teka kuung bakei boo'nuka-koong make'ke maanto' ee'noko amutemurii' ku'mi'nanka.

<sup>28</sup> Tee' nari' dii' dama'du-eta nantoonge koonto'nuka-pina' ooraarimaung teka dii'koo kuung ampirinunge~ maanto' ee'noko boto toto'ke.

<sup>29</sup> "Baka' piaaru'nuka dii' boto naunuka ee'noko dii' Boto Keperuu'navitu, bakei tora'kiriaining dii' ampirinunuka. Dii'ke nakaro-nupoong dako'aaru'noo' tampa' kanierikoo', koonto'nuka biikaning dako'domanairu tampa' nepunepu'erikoo'!"

<sup>30</sup> Aa'perimaung, 'Nii' tenang nakaro-nupoong niikakatauro otoroko'nang o'nori dei nakaro-nupoong dupisi'aariko pakumariarupeu!.'

<sup>31</sup> Teka daang dakaraka'darima tee' minkurariikoo', ai' diikaang aarumoi teing biurukaa' sira'durimaung nakaro-nupoong tero dupisi'aaru'ning.

<sup>32</sup> Aia' enang dupe-antaveriaing tee' nari' tee temurii' aarumo orara diikakatauroi tero nkaoaako'nung.

<sup>33</sup> Dii' borukoporonuka, boru' doparopapo'nung baurukaa', arekee' napo' donta'peripeu' tenang Kumponinge tuutunanturira mosianung-koo be'koo tanturiko?

<sup>34</sup> "Tee'koo ninge nakaro-nupoong dii'anko botoarampaing ee'noko Daari Meekung-koo norukasi'nuka ee'noko nau-antanuka. Nii'ning tee teing-koo dii'ke dupisi'erereriaining aa'barata' dovang-koo bi'erererima. Ee'noko nii'ning teing mura'ereriaining diikaning pava dootuu'nanka-koo kuunge osi kanteveri bata'ererima.

<sup>35</sup> Tee tee ookara urikupoong koonto'nuka dupisi'aariko'ning-koong tuutunang dii'ke komperiaing teing-koo Eebelo'keta bera Sakaraia'koo basinoo'ka, tee Sakaraia' tee Berakaia bauring boonturoma ee'noko meekavaro-koo meu'ka dii'ke diumaraang-koo kuunge dupisi'eru'nung te' dootuu'nava pankava-koo.\*

<sup>36</sup> Masika' naurampimang, aing teing ookara kapoo'nanka enanavarang-koo basiarako tora'kiriaing."

*Jiisuu' Orarunsiaru'na' Jerusalema'  
Kiimatanumpo' Deemparako  
(Luk 13:34-35; 19:41-44)*

<sup>37</sup> "Oi baka' Jerusalema'nupoong, Jerusalema'nupoong, dupisi'erererimaing Kumponing bakaning nakaro-nupoong, ee'noko teing dii'koo botovurimaing kapange

---

\* **23:35:** Tenaanka tutuna'nung ee'noko asi'nung nantoong tampeng orenge tavaaretu'naanka Daari Meekung-koo minkuari otoing-koo. (Pupu' 4:8; 2 Noru'anta 24:20-21)

too'pererima dupisi'erererikoo', arekee'ning batei-koo ninge dii' naro'koo karirampimaung kokoree'ke baurukaa' kupa'koo boong naro'urimana', teka dii' aroo'dariaung.

<sup>38</sup> Aing ee, Kumponinge diikanoo' osi si'during dii'ke dii'ka tare-koo bera nuampavoo'naang.

<sup>39</sup> Ee'noko naurampimang dii'ke tee ning napo' oomeriaroo'naang bera tenang batei aa'meriainang,

'Biraankenung tee naning Ovoring bakaang miring-koo pomaatomaung.' " *(Kena 118:26)*

## 24

*Taa'ni'antananka Doong Asi'koong  
(Mak 13:1-13; Luk 21:5-19)*

<sup>1</sup> Teketa Jiisuu' dootuu'nava pankava-ita siarara tenkenuko bakaning barevare-nupoong tee-anko porou' avatevaronanka-koo nau-antavaava'naang.

<sup>2</sup> Jiisuu'ke aa'puru' teing, "Aing kapoo'nanka dii'ke ee oooverimang? Masika' naurampimang, teing aing kapananka teing tuurampaavaining. Teinge piatooroi deroaama nare' nii'nare'koo daue pante'ario' sipaavauka!."

<sup>3</sup> Teketa Jiisuu' teke Olive'po'namii-koo baka ba'nanuio' bakaning barevare-nupoong tee-anko porora bii'ka otoroi nia'aama aa'pau', "Naumeriai tee are'moong tee' nkoaravaing, ee'noko taa'ni'anta aming da' poaing-koong, ee'noko aung batei oparavaing-koong taa'ni'anta aminge?"

<sup>4</sup> Teketa Jiisuu'ke maku'urima aa'puru', "Bakei, tarerariri otoriaing nantoonge poo-antaraari'neeng.

<sup>5</sup> Ai' nantoong mmau'ke tee poroma nkaang miring tampaama aa'paavaing, 'Ning tee ee'nung Kumponinge Pako'pari'nii!', ee'noko tee' nkoarima nantoong mmau' tosiaariko siompaariaing.

<sup>6</sup> Ee'noko dii'ke tee karenanka tavo'kuko ee'noko tamung minkuaako taaraveriaing, teka dii' ee'ning tarerariaing dii' domang puraaniri'neeng tee-koo, ai' teing teing kapoo' tee' oro'nanka nkoaravaining, teka botu mme' basiarava'!

<sup>7</sup> Narung kansi' i'amparama nii'nung kansi' turampuainge. Ee'noko narung muu' i'amparama nii'nung muu' turampuainge. Ee'noko napo' nantoong peera-koo booroainge, ee'noko u'mi'nanka nkoaravai nii'ning kansi'nanka-koo.

<sup>8</sup> Aing teing tamung tutuna'ning sisikeerananka manikuma mantompumana' tooto' ponto'ke due'uko.

<sup>9</sup> "Ee'noko tenang ee'nang dii' teing dai'daarira tavo'daariaining oraka' nkoraarii'naang, ee'noko dii'koo nii'ning dupisi'daariaing. Ee'noko dii' teing ookara nantoonge munte'daariaining ning nkaang miring-po'nupoong deentariko.

<sup>10</sup> Ee'noko tenang ee'nang mmau' nantoong tee biikaang masika'anta-ita dua'ariaing, ee'noko nii'ninge bii'maikorori' munte'aarima tooka kompai nii'ning kare-nupoong-koo siaariai dupisi'aarii'naang.

<sup>11</sup> Ee'noko mmau' nakaro-nupoong

oro'pariaing tenang daang Kumponing-etaining tamparima, ee'noko mmau' nantoong tosiaarima poo-antavaariai.

<sup>12</sup> Ee'noko tenang orara aarumo beremparako mmau' biikaang piaa tee ka'matompuasing.

<sup>13</sup> Ee'noko naning purimpario' bera asiran'a'mung basiaravaing deeko' domamparavaing.

<sup>14</sup> Ee'noko tee tutung tee aung doorenang tampara ookara kansil'koo daankiaavaing ookara nantoonge Kumponing bakaang muu'koo tumpariaina' taaravaava'naang, teketa tee-koo dama'due doong asi' tavo'kuaing."

*Kapoo' Maarekusi' Oro'paravaina'  
(Mak 13:14-23; Luk 21:20-24)*

<sup>15</sup> "Ee'noko tenang tee kapoo' maremaare ooverriaing meepo'ke donkonuio' teie nakaronunge Danieloi minkuvuu'na' tee te' meepo' nuampa-antavuaing." (Daari Meekung-koo deeruerira tasi'peripeu!).

<sup>16</sup> "Tenang tee donkonuio' ooaara teing a' Ju-dia'nameng-koo otoroaining miinanka-koo deto bakei navo'ka koo'ariaing!

<sup>17</sup> Naning daunavarro-koo otoaing deeko' siarara pava-koo kuung beauka' bakaang kavo nka-koo.

<sup>18</sup> Napo' naning mintoong-koo otoainoo'keta pava-koo toroaravauka' bakaang mononopa' nka-koo.

<sup>19</sup> Bakei piaaru'nuka otoroaining teing maniku' kempo'nuka ee'noko napo' teing biurukaa' noonoo'koo otoroaining, ai' teing tapotaponuka, mmari'koo makotua'.

**20** Kunsirariaing tee aung batei mmariraina'mung kamaari bakanang batei deemparavauka'na', nii'noo' Doong Uaana'mung deemparavauka'.

**21** Tee arikung te'mung tavo'kuaing tee bakei dau basi aung kansil' tutuntoma-ita nkoaru'ning-koo bera e'mung doong-koo basinoo'koo, ee'noko napo' dama'ke tee' basi otoauka'nunge.

**22** Teing doong arikeng Kumponinge apuka'antavuaruko deeko' ookara nantoong teing oparipeu'ning, teka Kumponinge bakaning miru'nisinuka piaavurima tee batei apuka'antavui miru'uu'nung.

**23** "Ee'noko tenang ee'nang nii'nung naninge aa'duriko deeko', 'Ooveriai, aung tee Kumponinge Pako'pari'ni' tavo'kuaing-koong!' nii'noo' aa'puko, 'Auntang!' tee masika'antaveriauka'.

**24** Ai' teing nakaro-nupoong ee'noko pako'pari'ni'nuka daang Kumponing-etaning tamparimaing porora taa'ni'anta pankenanka ta'nimpaarii'na' nkoavaing nantoong tosiaarima Kumponing bakaning naro'ka papaara-antavaarii'naang, tavo'arapeu'nung-pina'.

**25** Ooveriko, aung tee ninge tero uro'kanoo'ke naurampimang.

**26** Tee'koo naninge nii'nunge naururima aa'duriko, 'Auntanto mee'bora' sirakamaa'ke otomang,' te' beriauka'. Napo' aa'puko deeko', 'Aung anke kuunge otomang,' tee masika'antaveriauka'.

**27** Teka tee piping isipo'keta pipimpuma ootukunairu namu'ke siraka'pumana' tee' nari' ookarai

oomaavaing ning Tee Naning-naumpo' Paning-etaing moko.

<sup>28</sup> Are' tokoo bonku' otoainoo' teing mareoi'nanka te' oosiarima sira'paavaing."

*Tee Naning-naumpo' Paning-etaing Poaina'  
(Mak 13:24-31; Luk 21:25-33)*

<sup>29</sup> "Tenang ee'nang namu'ke manki'antananka teing doong-koo tavo'kuaining tankinuko tee duaa' tee tenang mutaanampuaing, ee'noko kaara arakavaravauka', ee'noko beento'nanka paning-eta tankavariai. Ee'noko teing purinto'nanka kapoo' paning-kooning teing dankampuriaininge.

<sup>30</sup> Ee'noko tenang ee'nang tee taa'ni'anta Tee Naning-naumpo' Paning-etaing ookara kansi' tare-koo poaing-koong oro'paravaing teke paning-koo, ee'noko nantoong ookara kansi'kooning tenang ee'nang avoreeaama orarunsiariaing. Ee'noko teinge ning Tee Naning-naumpo' Paning-etaing taa'ni'moi moko oomaavaing, purinto' ninka kamo'ke depeto aa'na' meena'moi.

<sup>31</sup> Ee'noko ninge tuuviri aa'na' karantavama~ botoarampaing teing nkaning koosinunanka, ee'noko teinge oosiaariaing teing nkaning miru'nisinuka kansi'koo ookutunairu-eta.

<sup>32</sup> "Enang tee dii'ke tee baisirovang ooverira noru'eriaing, aa'nomaung: Tenang para' nenuvara'uko noru'erikoo' teketa deto puaravuu'naang due'ka.

<sup>33</sup> Tee' nari' napo' dii'ke teing aing ookara kapoo'nanka ooverira noru'eriaing tee tee due', karanaang-anko poing.

**34** Masika' naurampimang ninge dii', aing enanavarang mme' paa'ariaruko nkoaravaing teing aing kapoo'nanka ookara.

**35** Paning ee'noko kansi' teing paa'areaining teka nkaang kara tee paa'aravauka'nung."

*Doong Ee'noko Batei Naninge Noru'ua'  
(Mak 13:32-37; Luk 17:26-30; 17:34-36)*

**36** "Nanine noru'ua' tee doong ee'noko tee batei. Koosinunanka paning-kooninge noru'aava'. Napo' ninge, tee bauringe, noru'ampa', teka teie narunge Mma'ke noru'ui otong tee batei.

**37** Tee' nari' Nooa' bakanang nkoaru'na' nkoaravaing tee ning Tee Naning-naumpo' Paning-etaing moainang.

**38** Aa'noko'na': tenang batei doua pankaing mme' poaruko taamanaama, naikaama, nampeema otoroko' bera Nooa' aaka'nareng-koo tumparu'na'mung-koo basi.

**39** Tee kapoo' nkoaravaing-koo noru' otoroa' bera douai pora teing ookara aaruvuru'. Tee' nari' ee'na' nkoaravaing tenang ning Tee Naning-naumpo' Paning-etaing moainang.

**40** Kenaankara naninka mintoong-koo otoreko narung tenaanka-koo pari'uma, narung sipuaing.

**41** Napo' manikumaara kenaankara-koo nari' iinkureko nani pari'uma nani sipuaing.

**42** "Tee'koo tanatarariri otorimaatoai, ai' dii'ke tee noru'eria' tee diikaang Ovoring poaina'mung.

**43** Teka ee' noru'eriaing dii'ke, naninge pava okovenunge tee bakiaa'nko pomanang muunga

noru'ui dei tee tee maamuari otopeu' tee bakaang pava pesi'koo taura'pua'.

**44** Tee' nari' dii' maamurariri otoriainge, ai' tee ning Tee Naning-naumpo' Paning-etaing tenang batei ning moaing-pina' noru'meriaruko moaing."

*Mirumiru' Naninka Kenaankara Mintoom-paretu'na'koong*

(Luk 12:42-46)

**45-46** "Baa tee naning matau, bakaang ovoringe bakanava tare-koo botovumaung, naning kake'iinara botovotona'a'nuka batei makosinang bau'koo miru'nisi, biraanke-antavuaing tee botovotona'a' bakaang ovoringe pora tee' nkoarako meu'pura.

**47** Masika' naurampimang ninge, teie ookutuning kapoo' okovumaing-koo tarenara deeng-antavuaing.

**48-50** Teka teie botovotona'a'ke orarai ee' noru'uaing deeko', 'Nkaang ovoring ana'aring po'koo,' ee'noko tavu' tutumpuriai teing nii'ning botovotona'a'nuka, ee'noko teing ninka nantoong naikaama kanu'arimaing ninka nari' nkoariai, teie bakaang ovoringe poma meu'puu'naang doong paapaa'ui otoaina'mung tee po'koo, ee'noko batei noru'uauka'nang.

**51** Ee'noko teie aa'na' kiimatavuaing tee, ee'noko naro' sipuai teing ninka ampirinunu ka ninka, te' ee'noo' nantoong biromparima si'da' dovang kakirinkuarimatoainoo' sisikeera-koo otoroi."

## 25

### *Mirumiru' Teing Nerai' Nanai'koong*

<sup>1</sup> “Tenang ee'nang tee tee muu' paninung tee teing pina' nerai' nanai' oro'paravaing biikaning daamunanka kompai nampeesinung kune'koo berou'ning onkeonke'aava'naang.

<sup>2</sup> Pa'noko' teing-koo mutaanang-kooning ee'noko pa'noko' matau-po'ning.

<sup>3</sup> Teinge mutaanang-kooninge biikaang daamu nkavaama karasini nari' nkavaavaruu'.

<sup>4</sup> Ee'noko teinge matau-po'ning karasininanka nari' daamu-koo nkavai berou'.

<sup>5</sup> Teka tee nampeesinung po'koo ana'aru'. Ana'ario' teing duunkaamparira aasiau'.

<sup>6</sup> Teketa meu'namang boku karou' aa'puma, 'Nampeesinung aung enang pomaang. Porira kune'eriai.'

<sup>7</sup> Teketa teing nerai' tantearira biikaning daamunanka panka'pau'.

<sup>8</sup> Teketa teing mutaanang-kooninge teing matau-po'ning karasini-koo eentavaarima aa'pau', 'Nii'ning pare'mereriai karasini-koo. Niikaning daamunanka siri'arining.'

<sup>9</sup> Maku'aama aa'pau', 'A, nii'koo aa' ookarakoo makotuaroo'naang. Makosi berira karasini baaveaamaing-ankoa moo'siiriang.'

<sup>10</sup> Teka tenang mme' nanai otoroko karasini moo'koo tee nampeesinung te' basiaru'. Ee'noko teing nerai' matau-po'ning maamuariri otoroko'ning tee ninka nari' kuung tumpariru' nampeesi-koong paroro-koo. Ee'noko beroko karanaang da'paru'.

<sup>11</sup> Napo' dama'ke teing nii'ning napo' porora aa'paako', 'Ovoring, ovoring, daate'meriai.'

<sup>12</sup> Teka teie maku'urima aa'puru', 'Masika' nau-rampimang, ninge dii' noru'dampia!.'

<sup>13</sup> Tee'koo tanatarariri otorimaatoai dii', ai' dii'ke tee doong ee'noko batei noru'eria' ning toro-maravainoo!."

*Tee Mirumiru' Mooni' Tankaampuru'na'koong  
(Luk 19:11-27)*

<sup>14</sup> "Napo' tee muu' paninung aunge minkunaae paara-anta-koo makosi. Narunge naninge ovoringe isipo' nii'nameensi'koo tenkenuma bakaning botovotonaanuka bokuvurira mooni' tankaampuru' teinge bakaang mooni' tare-eavaava'naang.

<sup>15</sup> Tutuna'nung pa'noko' kokorei'namiku avuu'. Teketa kenaanka-nung kenaanka kokorei'namiku avuu'. Teketa beenaumo-nung narung kokorei'namiku avuu'. Biikaang matau siompui tee' tankaampuru'. Teketa tenkenuu'.

<sup>16</sup> Teketa tee pa'noko' kokorei'namiku nkavuu'nung namu'ke bera teie tee mooni' mintoong-antavuu' ee'noko daua napo' pa'noko' kokorei' basi-antavuu'.

<sup>17</sup> Napo' tee kenaanka kokorei'namiku nkavuu'nung bera tee' nari' nkoaru'. Teie napo' asi'ning kenaanka kokorei'namiku basi-antavuu'.

<sup>18</sup> Teka teie naninge narung kokorei'namiku nkavuu'nunge bera kansi' nenke'ura dinkung-koo dako'uu' tee mooni' ovoring bakaang.

<sup>19</sup> Teketa pankaroompuio' tee teing biikaang ovoring toroarara baakeenevuru' teing.

<sup>20</sup> Ee'noko teie naninge pa'noko' kokorei'namiku nkavuu'nunge napo' nii'ning pa'noko' kokorei'namiku po'antavuu' nari' pora aa'puu', 'Ovoring, dake tee ning pa'noko' kokorei'namiku ameu!. Ooveko ninge napo' nii'ning pa'noko' kokorei' basi-antavantu'nung.'

<sup>21</sup> Bakaang ovoringe maku'uma aa'puu', 'Bakei tampa' nkoveu'nung, da' tee botovotona'a' tampara, kake'iinung. Aing-koo oki'ning-koo tampa' kake'iiraru'nung-koo ninge tee kapoo'nanka mmau'nanka tare-koo si'dampaing. Enang pora ni'ninka nari' dotumareaing.'

<sup>22</sup> Napo' tee kenaanka kokorei'namiku nkavuu'nung pou!. Pora aa'puu' tee ovoring, 'Dake tee ning kenaanka kokorei'namiku ameu!. Ooveko enang tee ninge napo' asi'ning kenaanka kokorei'namiku basi-antavantu'nung.'

<sup>23</sup> Bakaang ovoringe maku'uma aa'puu', 'Bakei tampa' nkoveu'nung, da' tee botovotona'a' tampara, kake'iinung. Aing-koo oki'ning-koo tampa' kake'iiraru'nung-koo ninge tee kapoo'nanka mmau'nanka tare-koo si'dampaing. Enang pora ni'ninka nari' dotumareaing.'

<sup>24</sup> Teketa napo' tee naning narung kokorei'namiku nkavuu'nung te' pou!. Pora aa'puu', 'Ovoring ee, da' tee bakei naning ivekung noru'dansi o'nong. Dakaning botovotona'a'nuka pore'oromatoko dama' pora derararaa'naang.

<sup>25</sup> Tee'koo da' dataramparura mera tee aung dakaang mooni' baku'antu' kansik'oo kuung. Ooveko, aung tee dakaang kapoo!.'

<sup>26</sup> Bakaang ovoringe maku'uma aa'puu', 'Da' bakei orara botovotona'a', kakarua'.

Tee' minkumeinaare ninge enang toro-antavama'naang da'koo. Masika' ee noru'mei otong ning naning ivekung? Nkaning botovotona'a'nuka pore'oromatoko dama' mera deramaramaung ee?

<sup>27</sup> Tee' noru'mei deeko' arekee'koo nkaang mooni' beeng-koo sipearuu', toromarara nkaning taakore'ning ninka nkavampeu'nung?

<sup>28</sup> Tee narung kokorei'namiku pari'erira tee naning kivora kokorei'namiku oto'evuing averiai.

<sup>29</sup> Ai' baa tee naning bereng-anta-nko dau basina' napo' avu'koong. Ee'noko tee naning bereng-anta-nko deeaung teing oto'evuining naro'ka pari'koonge.

<sup>30</sup> Enang dama'du dua'eriai aung botovotona'a'tamunsi'nung te' mutaanano', te' ee'noo' nantuong biromparima si'da' dovang kakirinkuari-matoainoo' sisikeera-koo otoroi.' "

### *Jiisuu'ke Dama'ke Siivenke' Nkovuaina'*

<sup>31</sup> "Tenang ee'nang tee ning Tee Naning-naumpo' Paning-etaing nkaang meenasi ninka moainang teing ninka nkaning koosinunanka ninka nari' ning tee tee-koo nkaang ba'nava'nani' pipi'daari-koo paning-koong-koo ba'nanampaing daurarong taa'ni'antamari.

<sup>32</sup> Ee'noko ookara kans'i'koo muu'nanka amutemuu' teing ning-koo uro'kanoo' oosiariaining ee'noko teka siivenke'arampaing tee' sipisipi' tarenarai sipisipi' ee'noko mee'mee' simpe'uripei'na'.

<sup>33</sup> Ee'noko aa'noai, sipisipi'nanka ning-koo tampavine-aape siparampai, mee'mee'nanka mare'aanavine-aape.

<sup>34</sup> Teketa tenang ninge dauraronge aa'parampaing teing tampavine-koo otoroaining, 'Porira dii' Mma'ke biraankeruru'ning barenku konsiiriai, ai' tee muu' paninung tee dii'koo maamu-antavuu'nung kans'i tutumparu'noo'keta.

<sup>35</sup> Ai' dii'ke tee ning tenang peeramoko bau'meriko'. Ntong-koo karaa'marako kapoo' nai-koong ameriko'. Tenang damisimai deemari o'noko kuung bokumeriko'.

<sup>36</sup> Tenang duaana o'noaruko duaameriko'. Napo' siipamoko tanatameriko'. Tenang kiimatanava-koo o'noko porima beero'meriko'.

<sup>37</sup> "Teketa tenang teinge koonto'nukai maku'aama aa'paavai tee, 'Ovoring, are'ka peeraroko oorampima bau'dampiko', ee'noko ntong-koo nekeru'kiko kapoo' nai-koong arompiko'?

<sup>38</sup> Napo' are'ka damisimai deentari otoko oorampima kuung bokurampiko', ee'noko are'ka duaana oto'deruaruko duaantampiko'?

<sup>39</sup> Napo' are'ka siiparoko oorampima nii'noo' kiimatanava-koo otoko beero'dampiko'?"

<sup>40</sup> Ee'noko ninge dauraronge maku'arama aa'parampaing, 'Masika' naurampimang dii', aming kapoo' dii'ke aing-koo mmarang-koo baru' miring otoroaing-koo nkoveru'nung tee tee ning-koo nkoveru'nung.'

<sup>41</sup> "Napo' aa'parampaing teing mare'aanavine-koo-nupoong, 'Dii' barakosi'nisinuka, beriai ning-

ankoita tee-koo nta'koo otoi oto'koo Sietani'koo ee'noko bakaning koosinunanka-koo maamu-antanisi-koo.

<sup>42</sup> Ai' ning tee peeramoko dii'ke bau'meriaruko'. Ntong-koo nekeru'kanko kapoo' nai-koong ameriaruko'.

<sup>43</sup> Damisimai deemari o'noko kuung bokumeriaruko'. Duaana-koo ata'teenko duaanameriaruko'. Napo' siipamoko ee'noko kiimatanava-koo o'noko dii'ke tee ning taremeriaruko'.'

<sup>44</sup> Ee'noko teinge napo' maku'aama aa'paavai, 'Ovoring ee, arenang nii'ke da' aa'noko oorampima pakurampiaruko', peeraroko, ntong-koo nekeru'kiko, damisimai deentari otoko, duaana-koo ata'siiko, siiparoko nii'noo' kiimatanava-koo otoko?'

<sup>45</sup> Ee'noko ninge maku'arama aa'parampai, 'Masika' naurampimang, aming kapoo' dii'ke aing-koo mmaikori'koo baru' miring otoroaing-koo nkoveriaruu'nung tee tee ning-koo nkoveriaruu'nung.'

<sup>46</sup> Teketa tee teing kiimatavariri doong kante tee' nari' otoroainoo' beroaing, teka teing koonto'nuka domampariri tee' nari' otoroainoo' beroaing."

## **Jiisuu' Siskeera Tora'antavai Dupisi'aako Napo' Domamparu'na'**

### 26

*(26:1-28:20)*

*Jiisuu' Mumunsiau'na'  
(Mak 14:1-2; Luk 22:1-2; Jon 11:45-53)*

<sup>1</sup> Teketa Jiisuu'ke teing aing karananka minku bakevura bakaning barevare-nupoong aa'puru',

<sup>2</sup> "Dii'ke noru'eri otong tee Paroro Baari'koong~ makotuu'naang doong deto ke'munta otong, ee'noko ning Tee Naning-naumpo' Paning-etaing tee naninge tooka kompui taura'muaing, ee'noko aa'barata'koo bi'maara dupisi'maavaing."

<sup>3</sup> Tenang ee'nang tee teing piristi'nuka-koo ovontung ee'noko nantoong-koo pankenanka tee piristi' pankaing bakanava-koo naro'ariru', bakaang miring tee Kaiapasi.

<sup>4</sup> Ee'noko teinge Jiisuu' aavavaara moo'aara tavaava'naang mumunsiau'.

<sup>5</sup> Ee'noko teinge aa'pau', "Na'moo paroro ninka nkoampiauka' nantoonge karingai turamaari'neenga."

*Naninge Manikumai Jiisuu' Beetania Duunie Sisi'uu'na'*  
(Mak 14:3-9; Jon 12:1-8)

<sup>6</sup> Teketa tee Jiisuu' teke Beetani-namono-koo otoko tee Saimoni' tero oramuu'po'nung bakanava-koo kuunge.

<sup>7</sup> Ee'noko tenang teke otoko nani manikuma tee-anko pou' duuninaro'\* moo' pankaing-koonaro' nkavui. Ee'noko tenie pora Jiisuu'koo bore'koo dau dakovuu' teke taamang banto'domai ba'nampario'.

---

\* **26:7:** Temurii' duuninaro' tampuing tee kapang boo'anta-koo, miring "alabasta"-koo, teka'nisinamurii'. Duuni tampa' nuuraa' miring naarada' kuung sipaako'nung, moo' pankaing.

<sup>8</sup> Tee' nkuvuio' teinge barevare-nupoonge ooaara iiravorora aa'paako', "Aung aming-koo anie tamung kera'pumaang?

<sup>9</sup> Aung duuni tee moo' pankaing-koo baavevuma mooni' nkavuma ata'oi'nuka pakukoo makosi."

<sup>10</sup> Ee'noko Jiisuu'ke noru'ura tee kapoo' teinge minkuaako'nung aa'puru' teing, "Dii'ke aming-koo ani manikuma pore'antaverimang? Anie tee kapoo' tampara masikung ning-koo nkovuing.

<sup>11</sup> Ai' teing ata'oi'nuka teing dii' ninka doong kante nari' otorimaatoaining, teka ning tee dii' ninka baru' pankaroong o'noriauka'nung.

<sup>12</sup> Tenang anie aung duuni ning-koo mono-koo dakovuma tenie tee ning dako'maavaing-koong maamu-antamuma tee' nkovuing.

<sup>13</sup> Masika' naurampimang, are'ke tokoi tee doorenang tampara daankiaavainoo'ke ookara kansil'koo tee kapoo' ning-koo anie nkovuing tee minkuaama ani norunoru'aavaing."

### *Judasie Kara Naroompuu'na' Jiisuu' Sivuko Tavaava'naang*

(Mak 14:10-11; Luk 22:3-6)

<sup>14</sup> Teketa narung teing-koo nanai'keta kenaanka-koo Judasi Kerio'nung tampaako'nung, piristi'nuka-koo pankainuka-anko beu'.

<sup>15</sup> Bera nia'urima aa'puru', "Dii'ke ning aming ameripeu' ninge tee Jiisuu' dii'anko sianko?" Tee'puio' teinge mooni'ning siliva'kooning beenaumo kivoranuri deeru-antavaara avau' tee.

<sup>16</sup> Teketa deto tee enang Judasie tooka kompui doona besi'uu' Jiisuu' teing-koo sivuainoo'.

*Ovoring Ninka Asirang-koo Taamanau'na'  
(Mak 14:12-21; Luk 22:7-14,21-23; Jon 13:21-30)*

<sup>17</sup> Doong tutuna'na'mung basiario' tee paroro Ju' biikaang berete' iisiropa-koong, bakaning barevare-nupoong Jiisuu'anko porora tee nia'aama aa'pau', "Dake are'ke nii'ke tee Taamang Baari'koong~ maamu-antavampira naiampii'naangpiaromaang?"

<sup>18</sup> Jiisuu'ke aa'puru', "Jerusalema'namono-koo berira naning narung ooveriaing ninge noru'ansi o'noing. Nauerima aa'periaing, 'Teie nau-antai aa'puing, "Nkaang batei tokompansi o'nomaung miru'nisi enang due'uing. Ee'noko ning nkaning barevare-nupoong ninka teke dakanava-koo Baari'koong Taamang naiampima norunoru'ampiaing te'mung doong."'"

<sup>19</sup> Teketa teing barevare-nupoong tee' Jiisuu'ke nauvuru'na' berora maamu-antavau' tee Baari'koong Taamang.

<sup>20</sup> Bera muumpuio' Jiisuu' teing ninka nanai'keta kenaanka barevare-nupoong ninka teke ba'naniau'.

<sup>21</sup> Ee'noko tenang taamanaama Jiisuu'ke aa'puru', "Ninge masika' naurampimang dii', narunge dii'koonge tee tooka kompui ning karenupoong-koo simuaing."

<sup>22</sup> Teketa teinge tee' taaravaara bakei orarun-siariru', ee'noko Jiisuu' naruna' doompeitaa' nia' tutumpau' aa'paama, "Tee ee ning ee, Ovoring?"

<sup>23</sup> Jiisuu'ke maku'uma aa'puru', "Teie ee'nunge ni'ninka nari' diisi-koo toonampematomatomaunge ning tooka kompui taura'muaing.

<sup>24</sup> Ning Tee Naning-naumpo' Paning-etaing tee tee' Daari Meekunge minkuvuu'na' nari' nkumaravaing, teka tee naning ning tooka kompui kare-nupoong-koo simuaing tee bakei piaaru' masikung, tora'kuainung. Bakei ponto'aravaruu'nung dei tampa'ke."

<sup>25</sup> Teketa tenang teie Judasie ee'nunge tooka kompui tee Jiisuu' kare-nupoong-koo taura'puange aa'puu!', "Tee ee ning ee, Nau-anta Pankaing?" Jiisuu'ke maku'uma aa'puu!', "Ee', da' ee'nung tee."

*Jiisuu'ke Oving Bakaang Taamang Nkooama-toaing Miru'uu'na'*

(Mak 14:22-26; Luk 22:15-20; 1Kor 11:23-25)

<sup>26</sup> Teketa tee' taamanaama Jiisuu'ke berete'nu nkavura, biraankevura, pisi'uu!. Pisi'ura bakaning barevare-nupoong avurima aa'puu!, "Nkaverira naieriai, aung tee nkaang mono makosi."

<sup>27</sup> Teketa napo' uaininareng avaako nkavura kompui tampa' tampura Kumponing-koo teing avurima aa'puru!, "Aru'koo naikiriai dii' ookara.

<sup>28</sup> Aung tee nkaang ereng nerakung kara naroong-anta pinka'anta-koong makosi, mmau' nantoong biikaang orarananka tonta'anta-koo dakoaravaing.

<sup>29</sup> Enang tee ninge ee' naurampimang, enang-eta deto naikamparoo'naang uaininaru'koo bera te'mung uaini-koong urusi' nerakung dii' ninka nari' naiampiaina'munge basi Mma' bakaang muu'koo kuunge."

<sup>30</sup> Teketa kenanayu kenavaara danto tenke-naara Olive'po'namii-aape berou' teing.

*Jiisuu'ke Piita Penkemparavaing Uro'kanoo'ka  
Sira'puu'na'  
(Mak 14:27-31; Luk 22:31-34; Jon 13:36-38)*

<sup>31</sup> Teketa Jiisuu'ke nauvurima aa'puru' teing, "E'mung ee'na'mung muunga dii'ke ookarai ning si'merira koo'darii'naang, ai' Daari Meekunge tee tero tee' minkuvuu'nung aa'puu'noo'ka, 'Ninge tee sipisipi' tanatanung tavanko teing sipisipi'nanka teing avitoitoi purarenka'ariaining.' *(Sekaraia 13:7)*

<sup>32</sup> Teka ning boo'keta daa'marara tee dii'koo uro'ke Kaaleli'nameng-koo meaing."

<sup>33</sup> Piitai maku'uma aa'puu', "Ninge tee bakei da' si'dampauka'nung bane ainge nii'ninge si'daako dakaning kare-nupoong-koo avoreaama."

<sup>34</sup> Jiisuu'ke maku'uma aa'puu', "Ninge masika' nauramaang, e'mung ee'na'mung muunga kokoree' mme' koo'kuaruko beemu'pie da' penkentaravaing ni'ninka nari' o'noremaung-koo."

<sup>35</sup> Teka Piitai napo' aa'puu', "Ning tee da'koo penkemaravauka'nung bane da' ninka nari' mompeainge." Napo' teing nii'ning barevare-nupoong ookara tee' nari' kareau".

*Jiisuu' Ketsemani-nau-koo Kunsiaru'na'  
(Mak 14:32-42; Luk 22:39-46)*

<sup>36</sup> Teketa tenang Jiisuu' teing ninka bakaning barevare-nupoong nii'noo' Ketsemani tam-paako'noo!<sup>†</sup> berou', ee'noko te' berora aa'puru' teing, "A' ba'nanirio' ning anka' mera kunsimaravai."

---

<sup>†</sup> **26:36:** Ketsemani tee Duuni Mii'doma miru'ari otong. Te' ee'noo' sinang olive'koong mii'aako'noo' duuni nka-koo.

<sup>37</sup> Teketa Piita bokuvui ee'noko Siebedi-baurinketa nari' tapotaapo' berou', ee'noko orarunsiarama domang oraka' dee'ou'.

<sup>38</sup> Ee'noko teing aa'puru', "Nkaang domang tee orarunsie bakei boo'pina' dee'antamuing. Anke otoriai ni'ninka nari' tanatarariri."

<sup>39</sup> Teketa kato oki'noo' bera te' doonko kink-inura kansi'koo teke kunsiaru' aa'puma, "Mma' ee, makosi deeko' aung kiimata-koong kaapu baari'antameaing, teka tee nkaang pia deea', da' dakaang pia siong-koo makosi."

<sup>40</sup> Teketa napo' te' bakaning barevare-nupoong otorou'noo' toroarara teing aasiaio' oovuru' teka. Ee'noko teketa aa'puu' tee Piita, "Dii' ee donkaang ni'ninka nari' tanatarariri tamung oki'noo' batei otoriarupeu'?

<sup>41</sup> Kunsirarima tanatarariri otoriaing parapaara-koo dua'dari'neenga, ai' domange tee piarori otoriaa' diikaang mono aruaru'dorimang."

<sup>42</sup> Teketa napo' kemukana' kato bera kunsarama aa'puu', "Mma' ee, aung kiimata ninge baari'koo makosi deeaung deeko', makosi dakaang pia siompansi tora'pampaing."

<sup>43</sup> Ee'noko napo' pora tee' teing aasai otoroko oovuru', duta aasi'ke taurvio'.

<sup>44</sup> Teketa napo' teka sipurira napo' beemu'pina' beu' kunsiarraa'naang tee' nari' minkuvuu'na' minkuvuma.

<sup>45</sup> Teketa napo' barevare-nupoong-anko toroarara aa'puru' teing, "Dii' ee mme' aasiri otong uaarorima? Ee aing, batei due'umaang ning Tee Naning-naumpo' Paning-etaing tooka

kompui naninge simuu'naang nantoong oreng biikaang bireng-koo.

<sup>46</sup> Aia', daa'darira meriai. Ooveriko tee aung tooka kompui ning simua'naang enang pomaang."

*Jiisuu' Moo'au'na'*

(Mak 14:43-50; Luk 22:47-53; Jon 18:3-12)

<sup>47</sup> Tenang ee'nang tee Jiisuu' tee' karoi otoko tee Judasi nanai'keta kenaanka-koong narung te' basiaru'. Tee ninka nari' nantoong karinga bainatu dovang-po'nupoong ee'noko ta'baka aa'ning kompai porou', piristi'nuka-koo ovontung ee'noko nantoong biikaning pankeu' urantanuka aa'ninge botoaaru'ning.

<sup>48</sup> Teie tooka kompui Jiisuu' kare-nupoong-koo sivuu'naang tee taa'ni'anta maamu-antavuu' aa'puma, "Tee naning ninge nuunuampaing tee ee'nung naning dii'ke bokotaanieraing."

<sup>49</sup> Jiisuu'anko namu'ke bema Judasie aa'puu', "Teie ee Nau-anta Pankaing!" Tee' minkuvuma teka nuunuvuu'.

<sup>50</sup> Ee'noko Jiisuu'ke maku'uma aa'puu', "Mmaiko', kapoo'dake nko-koo poing nkoveaing." Teketa tenang teing nantoong uro'kanoo' koo'arira Jiisuu' bokotaaniaara dai'au' tee.

<sup>51</sup> Tee' nkoaako narunge Jiisuu' bakaning-koonge bakaang bainatu barampura piristi'koong pankaing bakaang botovotona' teka'puma dome'ete'uu'.

<sup>52</sup> Teketa Jiisuu'ke aa'puu' tee, "Tee dakaang bainatu te' bakanoo' napo' sipeai, ai' teing nantoong bainatue tavu' nkoavaining teing napo' bainatue booroaining.

**53** Ai' dake ee noru'ea' ninge Mma'koo karonko bakei mmau' kokorei' koosinunanka aa' namu'ke bee'oaripeu' ning paku-koo?

**54** Teka tee' nkoansi dei tee Daari Meekung-koong kara arekee' dupearapeu', aa'pui otoing, tee' ee' nkomaamatomana' nari' nkomaavaing?"

**55** Ee'noko tenang Jiisuu'ke aa'puru' teing nantoong karinga, "Dii'ke ee ning tavu' nkoama bakiaa'kamaung deemerima bainatu dovang ninka ankonu' poring ning dai'merii'naang? Doong kante tee ning oomerio' dootuu'nava pankava-koo doonanairu-koo ba'namari nau-antamaramaung, teka teke o'noko dii'ke ning dai'meriaung.

**56** Teka aung ee' nkoaring tee Daari Meekung-koong kara nakaro-nupoonge daariau'nung dupearaa'naang." Teketa tenang teinge ookara bakaning barevare-nupoonge teka sipaara koo'ariru'.

*Ju'koong ovontunge Jiisuu' Tuumpiau'na'  
Kaka'dekeearira  
(Mak 14:53-65; Luk 22:54-55,63-71; Jon 18:13-14,19-24)*

**57** Teketa teinge tee Jiisuu' moo'au'ninge Kaiapasi-anko be'antavau' tee ee'nung piristi'nuka biikaang pankaing, te' ee'noo' teing boto naunuka ee'noko teing pankeu' urantanuka naro'ariru'noo'.

**58** Teka Piitai dama'ke isipo'keta kaarie sipuma bera te' piristi'nuka biikaang pankaing bakanava-koo uro'mang basiaru'. Bera te' kuung tumparara teing ninka Ju' biikaang piatooronuka~ ninka

nari' ba'nanui otoko' tokoona' nkooavaina' oovuu'naang.

<sup>59</sup> Ee'noko Piita te' ba'nanui otoko teinge piristi'nuka-koo ovontunge teing ninka ookara koompaara'navitu karananka mare'nii' besi'aako' Jiisuu' tuumpi-kooning kara daa'aara deeko' Jiisuu' dupisi'aava'naang.

<sup>60</sup> Teka teing kapoo' daa'aava' bane mmau' daang minku nkonankai teke donkonai kara mmau' minkuaako'. Asi'na'moong kenaanka naninka uro'kanoo' poreta aa'puretu',

<sup>61</sup> "Aunge tee aa'pumaung, 'Ninge teva dootuu'nava pankava turampamira beenang doong-koo napo' kaniampreu!.'

<sup>62</sup> Teketa tenang piristi'nuka biikaang pankainge deto donkonura Jiisuu' aa'puu', "Da' ee bari'na' oto'derua'? Sira'daravai aung-koo tuumpiramaung-koo!"

<sup>63</sup> Teka Jiisuu' tee' nari' ka'duuari otoko'. Teketa teie piristi'nuka biikaang pankainge aa'puu' tee, "Ninge tee Kumponing domantoo' bakaang miring-koo aa'damaang, naumeriai da' tee Kumponinge tero Pako'pari'nii' nii' domameri taremeriaainoo'koo deeko', tee Karistoo', Kumponing Bauring."

<sup>64</sup> Jiisuu'ke maku'uma aa'puu', "Ee', tee' ee'na' masika' minkuemaang. Ee'noko aa'dampii'naang ningee dii' ookara: Dama'ke tee ning tasi'meriaing ning tee ee'nung Tee Naning-naumpo' Paning-etaing Daari Meekunge naururimaung kamo'ke depeto pora ookara kans! tarevumaatoainung. Ee', Kumponing bakaang iri' deto basi ninka moko oomerira tee dii'ke tenang tasi'meriaing."

*(Danielo 7:13)*

<sup>65</sup> Teketa tenang teie piristi'nuka biikaang pankainge bakaang mononopa' dere'ura aa'puu', "Aunge bakei Kumponing akapeu'umaang! Nii' nantoong aung-koo kapoo' minku-koo piamoria'. Tee tee aung enang dii'ka taaravering Kumponing akapeu'uko.

<sup>66</sup> Enang bakaang kara simpe'erima arekee' noru'erimang?" Ee'noko teinge maku'aama aa'pau', "Aung tee boo'koo makosi."

<sup>67</sup> Teketa tenang oing-koo tutupaa'aama ki'bituau!. Ee'noko nii'ninge tanko'paako' aa'paama,

<sup>68</sup> "Da' tee Kumponinge teroita Pako'pari'nii' nantoong domamperi tareveriaainoo'koo deeko' tarampeerarama~ mansi'dari naumeriai baie tarui?"

*Piita Jiisuu'koo Penkemparu'na'*

*(Mak 14:66-72; Luk 22:56-62; Jon 18:15-18,25-27)*

<sup>69</sup> Tuutunang~ kuunge nkoarako tee Piita tee parang-koo kuunge pava-ita dama'due ba'nanui'o' nani nerai'na' botovotona'a' tee-anko pou' te'. Pora aa'puu', "Da' tee Jiisuu' ninka tee ninka Kaaleli'nung ninka nanrimaung."

<sup>70</sup> Teka Piita penkemparu'teing-koo ookara-koo uro'kanoo'ke, aa'puma, "Ning tee kapoo' dii'ke minkuerimatomaung noru'ampa!"

<sup>71</sup> Napo' teketa danto tuntoma-navaro-koo bera teke otoko nii'nanie napo' nerai'na'ke teka oovuu!. Oovura teing nantoong teke otoroko'ning nauvurima aa'puru', "Aung tee naning tee ninka Jiisuu' Nasareti'nung ninka nari' nanuremaung."

<sup>72</sup> Teketa napo' penkemparu' tee Piita marakavarama; aa'puu', "Ninge tee naning noru'ampa!,"

<sup>73</sup> Napo' teketa otompuuaruko teinge nantoonge teke donkonai otoroko'ninge Piita-anko masipo' berora aa'pau', "Bakei masika' da' teie narung teing-koong, ai' da' tee tee' teing-pina' karema sira'daramang."

<sup>74</sup> Teketa Piita baka barakosi'arama‡ maraka-antavarama aa'puu', "Ninge tee naning noru'ampa!" Teketa namu'ke kokoree' koo'kuu'.

<sup>75</sup> Teketa tenang Piitai norunoru'uu' tee kara Jiisuu'ke minkuvuu'nung, aa'puu'nung, "Da' tee kokoree' mme' koo'kuaruko beemu'pie penkentaravaing ni'ninka nari' o'noremaung-koo." Ee'noko teketa oko siarara aa'na' orarunsiarara biromparu'.

## 27

*Jiisuu' Pailati'anko Tavo'au'na'  
(Mak 15:1; Luk 23:1-2; Jon 18:28-32)*

<sup>1</sup> Teketa minkuaakotaa' tane'puio' ookarai aa'ninge piristi'nuka-koo ovontung ee'noko nantoon-g-koo pankeu' urantanukai Jiisuu' dupisi'aava'naang maneau'.

<sup>2</sup> Ee'noko dai'aara teketa tee Pailati'anko, tee-anko Rooma'nung ovo'ma'anko, tavo'au'.

*Judas Ke'ni'aru'na'  
(Nka 1:18-19)*

---

‡ **26:74:** Baka barakosi'arama ee' minkuarapeu', "Masikung minkuamparui dei Kumponinge tamupeu!!"

<sup>3</sup> Teketa tenang teie Judasie tooka kompui Jisuu' taura'puu'nunge tee maneau'na' oovura orarunsiaru'. Ee'noko orarunsiarara teing mooni' siliva'nanka beenaumo kivora-nuri bera torovuu' piristi' pankenanka-koo ee'noko nantoong-koo pankenuka-anko aa'puma,

<sup>4</sup> "Bakei oraka' nkomarieeng! Tee naning orararopa kare-nupoong-koo taura'pansieeng tavaava'naang." Ee'noko teinge pankenankai maku'aama aa'pau', "Tee tee kapoo' dakaang, nii' tee-koo dake manki'antameriauka'nung."

<sup>5</sup> Teketa Judasie mooni' te' dootuu'nava pankava-koo kuung dua'ura tenkenuu!. Teketa bera keni'aru'.

<sup>6</sup> Teketa teinge piristi'koo pankenankai teing mooni'nanka teka ukuaara aa'pau', "Aung tee boto-koo ee'oro'orokoari otong te'meepo' mooni' kore'doma si'koo tee tooka-koong deemparako."

<sup>7</sup> Teketa teinge narung naning utau ta'nang bakaang kansi' moo'koo kara naroompau' nantoong Ju'deeaing te'dako'aarimaatoo'naang.

<sup>8</sup> Ee'noko tee'koo ee'na'koo tevora' kansi'navora' miring tookanavora' tampaa-maung bera e'mung doonko basinoo'.

<sup>9</sup> Ee'noko tee' nkoario' tee kara teie Jeremaia'ke nakaronarai minkuvuu'nung dupearu' Daari Meekung-koo aa'puu'noo'ka,

<sup>10</sup> "Teinge beenaumo kivora siliva'nanka nkavau', teinge nii'ninge Isireeli-nupoonge miru'au'ning tee naning moo'kooning. Ee'noko naning utau ta'nang bakanameensi' moo'au' teinge, Ovoringe botomuu'na!." (*Sekaraia 11:12-13; Jeremaia*

*32:6; 18:2)*

*Jiisuu' Pailati'ankoi Donkonuu'na'  
(Mak 15:2-5; Luk 23:3-5; Jon 18:33-38)*

<sup>11</sup> Enang napo' tee Jiisuu' tee-anko ovo'ma'anko donkong-antavaio' nia'uma aa'puu' tee, "Da' ee tee Ju'nupoong biikaang daurarong?" Jiisuu'ke maku'uma aa'puu', "Tee' nari' minkueina' o'nong."

<sup>12</sup> Teketa teinge pankenankai piristi'nukakoo ee'noko nantoong-koo daang tuumpiaako kasivua' karoaruko'.

<sup>13</sup> Teketa Pailati'ke nia'uma aa'puu', "Dake ee taaravea' otong kapoo' mmau'nanka-koo tuumpiraamaang da'?"

<sup>14</sup> Teka Jiisuu'ke nii'nau' kapoo'nau'koo maku'uria'. Tee'koo tee ovo'ma' aa'na' ta'ninuu'.

*Barabas Jiisuu'ke Paari-antavau'na'  
(Mak 15:6-15; Luk 23:13-25; Jon 18:39-19:16)*

<sup>15</sup> Tenang tee teke narung aarumo ovo'ma'ke nkovuko'nung ee' oro': Ookara mare' kante-koo Taamang Baari'koong~ nkoako tee narung naning kiimata-nupoong-koo simpiri'antaevuriko' nantoong karika' piavoroko'nung.

<sup>16</sup> Ee'noko tenang ee'nang teke tee narung naning orara, ookarai noru'aako'nung miring Barabas kiimata-nava-koo otoko'.

<sup>17</sup> Tee'koo tenang nantoong karinga naro'aririo' Pailati'ke nia'urima aa'puru' teing, "Anaanka-koo arera ninge simpiri'anta-koo piarorimang, tee Barabas ai' tee Jiisuu', tee Pako'pari'nii' tampaa-maung?"

**18** Teka ee' noru'ui, teinge tee Jiisuu' mamairoita tee-anko tavo'au'nung.

**19** Teketa tenang Pailati' teke bakanoo'ke ba'nanui kara simpe'domai ba'nanuio' ba'aang botoario' narung kara tee-anko po'antavau' ee' minku, "Tee naning kapoo' orararopa dake tokoona' nkoveauka', ai' ninge tee e'mung tee-koon noone ooamira domang aa'na' manki'moi o'noing."

**20** Teka teinge pirsti'nuka-koo ee'noko nantoong-koo pankenankai dera-antavaariko' ookara nantoonge Barabas bake-antavuma Jiisuu' dupisi'antavuaing tampaava'naang.

**21** Teketa teie ovo'ma'ke aa'puu', "Anaanka-koo naninka-koo baa arera dii'ke bake-anta-koo pi-arori otong?" Teinge maku'aama aa'pau', "Tee Barabas."

**22** Teketa Pailati'ke nantoong nia'urima aa'puu', "Teka tee Jiisuu', tee Pako'pari'nii' tampaamaung, arekee' nkoama'naang?" Teinge ookarai maku'aama aa'pau', "Aa'barata'koo taakaveaing tee."

**23** Pailati'ke maku'urima aa'puu', "Aming-koo, ai' kapoo' orara aming nkovuing teie?" Teka teinge napo' baru' aa'na' bokiaama aa'pau', "Aa'barata'koo taakaveaing tee."

**24** Teketa tenang Pailati'ke tamung kariarako'nung noru'arara ee'noko nantoonge karakarare tutumpaio' teie ntong nkavura bireng duu'paru' teing-koo karika'koo uro'kanoo'ke aa'puma, "Ning tee kapoo' o'noa', aung naning bakaang ereng ning-koo biromparavauka'nunge, kapoo' dii' diikaang."

**25** Ee'noko ookara nantoonge maku'aama aa'pau', "Makosi, bakaang ereng nii'koo biromparavaing ee'noko ookara-koo niurukaa'koo."

**26** Teketa teie Barabasi simpiri'antavevuru'. Teka teie Jiisuu' mura'aava'naang botovuru' Pailati'ke, ee'noko dama'ke aa'barata'koo taakavaava'naang botovuru'.

*Piatooronukai Jiisuu' Akapeu'aako'na'  
(Mak 15:16-20; Jon 19:2-3)*

**27** Teketa tenang ovo'ma' bakaning piatooronukai Jiisuu' ovo'ma' bakanava-koo be'antavau', ee'noko ookara piatooronukai teka tapo'eera koroau' tee ee' akapeu'aava'naang:

**28** Teinge bakaning mononopa'nanka kiru'aara napo' mononopa' urumpumaung dauraronuka biikaang-pina' oro' kurumpau' tee-koo.

**29** Teketa baakopo too'murintaa'po'nung dauraronuka biikaang-pina' kaamaum paara tee-koo bore'koo kurumpau'. Ee'noko bana' kong-antavau' tee-koo bireng-koo tampavine-koo ee'noko tee-koo uro'kanoo' kinkinaako' aa'paama, "Tampara masikung, Daurarong Ju'nupoong Biikaang!"

**30** Ee'noko teinge tutupaa'aama bana' pari'aama amutemu'ke bore'koo mura'aako' teie.

*Jiisuu' Aa'barata'koo Taakavaau'na'  
(Mak 15:20-32; Luk 23:26-43; Jon 19:17-27)*

**31** Teketa akapeu'aakotaa' tee mononopa' urung kiru'au', teketa tee bakaang masikung mononopa' kurumpau' tee-koo. Teketa aa'barata'koo taakavaava'naang be'antavau'.

<sup>32</sup> Teketa beroma naning narung kune'au' Sairini-nung miring Saimoni', ee'noko teinge tee etuau' tee teie aa'barata' nkaevuu'naang.

<sup>33</sup> Teketa Kolokata' tampaamanoo' basi-antavau', miru'noo' Makupi'noo'.

<sup>34</sup> Ee'noko teka te' basiarira teinge Jiisuu' uaini nonang-koong ma'naange pitunisi avu'koo paaravau' teie naivuu'naang, teka teie tora'pura nai-koo kasivuaruu'.

<sup>35</sup> Tenang tee aa'barata'koo taakavaara teinge tee bakaning mononopa' tankaampeu' kapoo' deikoo'koong nkoaara. Tee' nkoaio' tee kara nakaronunge minkuvuu'nung dupearu' Daari Meekung-koo aa'puu'nung,

“Teing tankaampeu'nung teing nkaning mononopa', ee'noko nkaang baarong-koo deikoo'eu'.” *(Kena 22:18)*

<sup>36</sup> Ee'noko teke ba'nanai tanatavai otoroko' tee teka.

<sup>37</sup> Ee'noko tee-koo bore'koo daua teing kapoo' tee tuumpiaako'ning daariaara sipau'ee' minkuning:

AUNG TEE JIISUU', JU'NUPOONG BIIKAANG DAURARONG.

<sup>38</sup> Napo' kenaanka naninka mutaa'o tee ninka nari' taakavaaretu' teka. Narung tee-koo tampavine-aape ee'noko narung mare'aanavine-aape.

<sup>39</sup> Ee'noko nantoong teke tankinaako'ninge koovi'ai tankinaako', oraka' minkuaama.

<sup>40</sup> Ee'noko aa'paako', “Da' tee pava dootuu'nava pankava turampera beenang doong-koo kaniee'naang tantaramaung, enang daka

domaang moo'darama aa'barata'keta depeto siraravai, da' tee Kumponing Bauring deeko!."

<sup>41</sup> Napo' tee' nari' teinge ainge aa'ninge akapeu'aako' tee, piristi'nuka-koo ovontunge, boto naunukai ee'noko nantoong pankeu' urantanukai.

<sup>42</sup> Aa'paako', "Aunge tee nantoong oovuning domaang moo'urikoo', teka baka domaang moo'koo makotua'. Tee Isireeli-nupoong Biikaang Daurarong deeko' enang aa'barata'keta depeto siaravaing ee'noko nii'ke masika'antavampiaing tee.

<sup>43</sup> Bakei Kumponing bauring tamparama tee-koonaa' pinka'aramaung tamparakoo', enang Kumponinge pakuvuaing teka tee domamparaa'naang piavoi otoing deeko!."

<sup>44</sup> Ee'noko napo' tee' nari' tenaanka mutaa'o nkorai tee ninka nari' taakavaaretu'naankai poore'uretu'.

### *Jiisuu' Boo'paru'na'*

*(Mak 15:33-41; Luk 23:44-49; Jon 19:28-30)*

<sup>45</sup> Enang tee duaaki'ui' mutaanang pou' temeng ookutunameng bera kamunoo'nang-koo basi.

<sup>46</sup> Ee'noko kamunoo'nang Jiisuu' aa'na' karoma osinung karai aa'puu', "Eloi, Eloi, lama sabakatani," ee' minkuvuma, "Nkaang Kumponing, nkaang Kumponing, ning dake aming-koo si'meing?"

<sup>47</sup> Ee'noko nii'ninge nantoonge teke donkonai otoroko'ninge tee' taaravaara aa'pau', "Eliasi bokuvumaang."

<sup>48</sup> Teketa namu'ke narung teing-koo kua'parara kapoo' uaini kaaveerii'ke boovong-antavura

bana'koo dai'antavura Jiisuu'aape deto toong-antavuu' musi'uu'naang.

<sup>49</sup> Teka nii'ninge aa'pau', "Sipeko baka otoai tee. Iro' ooampiaing, Eliasie pa pora pakuvuu'naang."

<sup>50</sup> Teka Jiisuu' aa'na' napo' deto bokuma tenang ee'nang domang si'nuu'.

<sup>51</sup> Ee'noko tenang ee'nang teebaarong pava dootuu'navaa pankava-koong, meekavaroo ku'nung, meu' ke'me'aru' a'dei'keta depeto dere'arama bera a'doong kainu'. Kansi' u'mi'ke aa'na' biru'uu', ee'noko boia'nanka ke'mera'ariru'.

<sup>52</sup> Ee'noko napo' nantoong dako'aaru'nanka-koong kuvinanka daate'ariru', ee'noko nantoong meekupoong tero dako' aaru'ning biikaang mononanka domamparira daa'arira kuvi-eta bakoariru';

<sup>53</sup> Teketa Jiisuu' domamparara daa'ario' teing Jerusalema'koo kuung berora nantoong mmau'koo oro'pariru'.

<sup>54</sup> Ee'noko tenang teie piatooro daaku' tarenara teing ninka teke Jiisuu' tanatavai otoroko'ning ninka nari' tee u'mi' nkoaru'nung ooaara ee'noko ookara kapoo'nanka tavo'kuu'ning teing teing bakei aa'na' avoreau', ee'noko oita'kaama aa'pau', "Aung bakei masika' Kumponing Bauring."

<sup>55</sup> Ee'noko maniku' mmau' teke otoroko' isipo'keta tee Jiisuu' ooaitaa' Kaaleli'keta Jiisuu' siompaitaa' nari' porou'ning tee pakuaama kapoo' apuka'parako'ning-koo.

<sup>56</sup> Teing-koo nii'nani Meeri' Ma'dala-nani, ee'noko nii'nani napo' Meeri' Jeemisi namainta Josepa' beuko, ee'noko napo' Siebedi baurinketa

beuko.

*Jiisuu' Dako'au'na'  
(Mak 15:42-47; Luk 23:50-55)*

57 Muung-aapevuma nanuko naning narung te' pou' kavonanka mmau'po'nung miring Josepa' Arimatea'nung, teenoo' tee Jiisuu' bakaning-koong barevare-nupoong-koo narung deemparu'nung.

58 Ee'nung tee Pailati'anko bera Jiisuu'koong mono nia'uu', ee'noko Pailati'ke aroo'ura avaava'naang botovuru'.

59 Ee'noko Josepa'ke tee Jiisuu'koong mono nkavura teie baaronge kakaarai nerakunge boo'nuka dai'na' dai'uma nopa'uu'.

60 Ee'noko bakaang-koo kuvi dako'doma-koo nerakung-koo kuung sipuu' tee kapang-koo nenke'uu'nareng-koo. Ee'noko kapang pankaing kaavororii' kovempura te' kuvi dako'doma karanaang ku'numpuu', ee'noko tee' nkovura tenkenuu'.

61 Teni Meeri' Ma'dala-nani ee'noko napo' nii'nani Meeri' te' kuvi-eta aveteka'koo ba'nanuresi tarevuresi otoreko'!

*Tee Kuvi Dako'doma Tanatavau'na'*

62 Teketa dauna'mung teing piristi'nuka-koo pankeng ee'noko Boto Keperuu'nuka Pailati'anko berora aa'pau'.

63 "Ee pankaing, nii'ke tee tosi bauko bakaang kara norunoru'ampiring domampari minkuvuu'nung aa'puma, 'Beenang doong tankinuko ning napo' daa'maravaing.'

**64** Tee'koo dake boto sipeko te' kuvi dako'doma tanatavaavaing bera beenamparavaina'mung-koo basi, teinge bakaning barevare-nupoonge porora Jiisuu'koong bonku'noo' bakiaa'aara nantoong nauaarima aa'paa'neenga, 'Tee Jiisuu' boo'keta daa'aring.' Aung tee tee' oro' tositosi beremparavaing deeko' bakei koonto' orara masikung, tutuna'nung tositosi divu'ui otoainge."

**65** Ee'noko Pailati'ke aa'puu', "Berira tanatavaavaining bokuereriaing, ee'noko tee kuvi tampa' mataueri pinka'eriai dii'ke makosieriaina!"

**66** Ee'noko tee teinge berora tee kuvi pinka'au', aa'nou', ovo'ma' bakaang taa'ni'anta kapang-koo dau sipau' teie para'aama, ee'noko tanata nkonuka miru'aaru'.

## 28

*Tee Jiisuu' Boo'keta Daa'aru'na'  
(Mak 16:1-10; Luk 24:1-10; Jon 20:1-18)*

**1** Doong Uaana'mung tankinuio' Saandei-na'mung siraka'puma nanuko Meeri' Ma'dala-nani ee'noko teni nii'nani Meeri' beretu' tee kuvi dako'doma oovuree'naang.

**2** Tenaanka te' basiareko u'mi' pankaing nkoaru'. Narung koosinung~ Ovoring bakaang paning-eta te' siarara kuvi-aape bera tee kapang kaavororii' kato korimpuu' ee'noko tee-koo dau ba'namparu'.

**3** Bakaang oo'oo-koo piping-pina' oro'paritaa', ee'noko bakaang mononopa' aa'na' kakaara sinou-pina'.

**4** Ee'noko teing te' tareaaako'ning tee-koo aa'na' avoro'ke dai'urio' dankuranku'arima boo'pina' otorou'.

**5** Ee'noko teie koosinunge tenaanka maniku-maara aa'puretu', "Dee' arorereauka'. Noru'ansi o'nong dee'ke Jiisuu' besi'eremang, tee ee'nung aa'barata'koo taakavaieeng.

**6** Tee tee a' otoa', domamparing tee' minkuvuun'a'. Poreta oovereaing a' bempaieenoo'.

**7** Teketa namu'ke bereta bakaning barevarenupoong aung kara nauereriai, aa'pereriaing, 'Tee tee boo'keta domamparing, ee'noko Kaaleli'aape dii'koo uroi bemaang. Teka berira ooveriaing.' Tee' ee'na' masika' ninge naurampesina!"

**8** Teketa tenaanka manikumaara namu'ke tenkenuretu' teketa kuvi dako'doma-ita avororema, nka tee domang dotue maanto'uresi. Ee'noko kua'paretu' teing bakaning barevarenupoong nauaaree'naang.

**9** Teketa Jiisuu'ke tenaanka teka taunga ta'nina' oro'pari kune'ureta aa'puretu', "Dee'ke ee!" Ee'noko tenaanka tee-anko poreta bakaang kau' boko'ureta pankaing-antavuretu' tee.

**10** Teketa Jiisuu'ke aa'puretu' tenaanka, "Arorerea' bereta teing mmaikori' nauereriko Kaaleli'nameensi'aape beroai teka kune'maavaing ning."

*Teinge Kuvi Dako'doma Tarenukai Jiisuu' Domamparu'nung Sira'pau'na'*

**11** Tenang tenaanka manikumaara taunge nanuresi otoreko nii'ning teing-koo kuvi dako'doma tanatavaako'ning-koo Jerusalema'

duparira sira'pau' teing piristi'nuka-koo pankenanka nauaarima ookara kapoo'nanka nkoaru'ning.

<sup>12</sup> Teketa teinge piristi'nuka-koo pankenge teing ninka nantoong-koo pankenanka ninka naro'ke minkunaavarira teinge narung taung matauau'. Ee'noko teing piatooronuka mooni' pankainge moo'aaru' aa'paarima teing,

<sup>13</sup> "Aa'periaing, 'Bakaning barevare-nupoonge muunga aatumpirio' bakiaa'aara nkavaing.'

<sup>14</sup> Teka tee aung kara aasirieeng-koong ovo'ma'ke taaravuko deeko' nii'ke boing-antavampiaing tee, ee'noko dii' tee-koo kara-koo kiimatarariauka!"

<sup>15</sup> Teketa teinge piatooronukai teing mooni'nanka kompaara tee' nari' nauaaru'na' minkuako!. Ee'noko biikaang minkunaa tee avitoitoi beremparu' Ju'nupoong-koo meu'ke bera e'mung doong-koo basinoo'koo.

*Jiisuu'ke Bakaning Avitoitoi Nanaama Kara  
Nau-anta-koo Boto Sipuu'na'*

*(Mak 16:14-18; Luk 24:36-49; Jon 20:19-23)*

<sup>16</sup> Teketa tenang teing nanai'keta narung barevare-nupoong Kaaleli'aape berou' te' mii-koo Jiisuu'ke beroo'naang nauvuru'noo'!

<sup>17</sup> Ee'noko teinge ooaara kinkinaama pankaing-antavau', teka nii'ning keekoo'ariru'.

<sup>18</sup> Ee'noko Jiisuu' teing-anko pora aa'puru', "Ookara iri'nanka paning-kooning ee'noko kansi'kooning tee ning oko-antamuining.

<sup>19</sup> Tee'koo berira ookara nantoong amutemuu' ning-koo barevare-nupoong deeng-

antavereriaing aing aa'ning miring-koo ntong-koo minkiererima meeka'antaverererima: tee Mma' ee'noko ning Bauring ee'noko tee Tanuaang Meekung.

<sup>20</sup> Ee'noko nau-antavereriaing ookara kapoo'nanka ninge dii'ke nko-koo botoram-piru'ning siompaava'naang, ee'noko ning tee bakei masika' dii' ninka nari' o'noaing ookara batei-koo bera doong asi'noo'ke basi."

**Kara Naroong-anta Nerakung Kongarana'  
The New Testament in the Naasioi Language of Papua  
New Guinea**

**Nupela Testamen long tokples Naasioi long Niugini**

Copyright © 1994 The Bible Society of Papua New Guinea

® Faith Comes by Hearing

Language: Naasioi

Dialect: Kongara

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 18 Apr 2025 from source files dated 31 Aug 2023

0fe571ca-6209-55e0-bc3e-74b7123016b1